


6
19-c
70



6-19-c-70





SACRORUM CARMINUM

DELECTUS





SACRORUM CARMINUM

DELECTUS IN USUM

GYMNASII PISAURENSIS

curante

JOSEPHO EGNATIO MONTANARIO

POLITIORUM LITTERARUM DOCTORE

RELIQUECAVIA
ROMA
MONTANARIO




VOLUMEN PRIMUM



PISAURI
EX TYPOGRAPHEO NOBILIANO

facta Praesidium facultate

MDCCCXXXIII.



PHILIPPO MONACELLIO

PISAURENSIUM PONTIFICI OPTIMO

JOSEPHUS EGNATIUS MONTANARIUS



Cum saepenumero animadverterem, Praesul amplissime, lege cautum, ut in singulis per annum hebdomadis sexto quoque die studia omnia ad Religionem convertantur, cumque nullum fere librum per adolescentium manus, qui latinae poeseos amore inflammantur, circumferri viderem, qua sibi opportune consulerent, in eam veni cogitationem, ut selectam sacrorum carminum supellectilem undique corrogarem, atque in unum corpus congererem, quo et Religioni, et latinis litteris pro virili inesservirem. Sed cum infinitus prope illorum numerus observaretur, qui post renatas litteras sacris musis, Deo bene juvante,

*sunt cum dignitate ac laude operati, cumque omnia colligere, digerere, prae-
 loque rursus subjicere perarduum mihi, nec satis opportunum videretur, id coe-
 pi consilii, ut Italis tantummodo Poetis locum darem, et quidem elegantioribus, queis nil veritus sum Ragusinos adnume-
 rare, quippe qui eadem, ac nos, lingua loquuntur, iisdemque utuntur litteris, ita ut hoc omne studiorum genus nobiscum commune habeant non solum, verum etiam cacteris fere omnibus styli elegan-
 tia, atque candore mirifice praecellent. Non equidem dubito, fore plerosque, qui consilium improbent meum, cum videant, Rapini praesertim, et Buchanani nomina desiderari: sed apage, Praesul amplissi-
 me: jure ne, an injuria id ego praesti-
 terim, tuum omnino judicium esto. Nunquam mihi profecto in mentem venit alienigenos poetas aspernari: mihi enim semper religio fuit, eritque, dum vivam, maximi facere, quae doctorum hominum consensione commendata, litterariam rempublicam in sui administrationem non interrupta multorum annorum serie pellexere. Cum vero novum sacrorum carminum fasciculum, nomini inscriptum tuo, Italiae juventuti obtruderem, nostrates dum-*

*taxat, non externas opes illi ob oculos
ponere, mihi propositum fuit, ut veram
classicorum scriptorum recte imitandi ra-
tionem in iis, tamquam in speculo, uni-
ce introspiceret, quam neque facilem ne-
que tutam transalpinos, transmarinosque
vates suppeditare, cordatus nemo infi-
cias ibit. Praeteream, quod libere faten-
dum est, non omnibus unde undique da-
tum (perpaucos si excipias italos carmi-
num conditores) ore rotundo posse lati-
ne loqui, ita ut verissime adfirmes, a-
pud exteras gentes dum fere omnes la-
tinis scriptitant verbis, vix unum aut
alterum inveniri, qui, subacto ad vete-
rum latinorum lucernam sermone, suis
ab scriptis commendetur. Nos, nos, in-
quam, itali homines, quibus a romanis
genus, nos latine loqui, latine eloqui
facillime possumus; ut nullum quasi
nos inter, patresque nostros discrimen
intercedat. Et revera, ut quamplurimos
missos faciam, nonne Bembi, Naugerii,
Vidai Castilionei, Zanchii, Amalthei,
qui saeculo XVI floruerunt; recentioribus
vero temporibus Averanii, Zampierii,
Zanottii, Vulpü, Cunichii, Zamagnae,
Fagnolii, alique sexcenti ita scripserunt,
ut Italiam hanc nostram, parentem atque*

altricem artium optimarum, ad aureae aetatis splendorem, barbarie propulsata, repente revocaverint?

Sed haec cuique emunctae naris per se satis obvia. Quarent ex me fortasse alii, quonam consilio ad id libelli adornandum adluctus fuerim: quid enim opis, bonaeque frugis ab recentiorum poetarum studio in optimas litteras dimanet, non satis vident; cum praesto sint omnibus luculentissimi scriptores qui Augusti aevo non interituram nominis celebritatem sibi compararunt. Anne hi exilio plectendi; illi vero in scenam dumtaxat ducendi? Anne, hisce posthabitis, illi tantum studiosius consecrandi? Quibus ego: quidquid hoc est voluminis, multa me cura multoque labore concinnasse, ut Auditores nostri, studiosique omnes ediscant, quonam modo imitandi sint latini scriptores; qua ratione transferri ad nos cum dignitate possint antiquorum formulae; quo denique pacto, vestimentis, ut ita dicam, ex veteribus mutuatis, res nostrae queant et ipse vestiri atque exornari. Imitationem porro ad venustatem assequendam, et ad ornamenta, luminaque omnia latini eloquii attingenda apprime natam quis neget?

Quapropter cum tota pene hebdomade adolescentes nostri latina exemplaria diurna, nocturnaue manu versaverint, sexta die optimos legant imitatores, rationesque ducant, quomodo tantum laudis, leporis, et concinnitatis sint imitando indepti. Caveant igitur morosiores quidam, omnia qui naso suspendunt adunco, nos, consiliumque nostrum acrius reprehendere; sciantque ingenue et nos confiteri, nihil aut parum saltem, commodi sibi paraturos, qui hisce solummodo nostrorum hominum carminibus studeant, neque ad magnum sibi profectum viam inde consterni, nisi antea manum Terentio, Virgilio, Flacco, Catullo, caeterisque melioris notae admoveant, atque ad illorum exemplum sese totos componere adnitantur. Nos autem ut facilior ad illos aditus pateat, hosce, ut ductores, praeponimus.

Nec deerunt fortassis, qui oleum me operamque perdidisse autument, pleno ore dictitantes, quae indocti, otiosi-
que nedum in Thermopolio, sed per trivios etiam et angipertos mussitare gestiunt, latinam scilicet linguam mortuam esse, nihilque ab illa utilitatis in mansuetiorum musarum studia proficisci: sibi tan-

tum habeant illi, quæ cum mortuis sæpe colloqui in deliciis est: nobis italicam linguam in primis recolendum, quodque ad latinos spectat, satis nobis, superque esse, si doctore praeunte, romanas musas primo vix ab limine in scholis salutaverimus: Interea dum nobilissimæ linguae putidius obloquuntur: quam veritas ipsa et modestia patiantur, difficillimam sibi litterariae facultatis possessione facili negotio vindicasse arbitrantur, cum lexico ter quaterve oscitanter evoluto, obsoletiores, si Diis placet, voculas in rem suam deduxerint, non verba sentiis, sed sententias verbis miserrime accomodantes. Verum enim vero conviciis parcendum: cur enim aegre assentiar, ut homunciones istiusmodi despectui impure habeant, quod turpissime ignorant? Illud potius non praetermittam, italicam linguam ex latina coaluisse, scriptoresque nostros praestantiores munditiem, veneresque sermonis ab illa tamquam a purissimo fonte, sibi congestisse. Consulatur historia, primoque statim obtutu liquebit, italicas litteras, graecis, latinisque oblanguentibus, illico concidisse; tunc vero pristinae dignitati restitutas, cum hae iterum saeculo xv in vi-

tam revocari visae sunt. At pluribus hac de re, Praesul amplissime, te morari, hominis esset otio intemperanter abutentis. Addam tantum quod silentio praeterrere nefas duxerim, me doctorum sane virorum auctoritate, hortatuque manum huic operi admovisse, cui adornando perficiendoque symbolam certatim contulerunt, quos inter honoris et amicitiae caussa nominabo Caesarem illum Montaltium Caesenatem optimum latinitatis aestimatorem, scriptorem aetatis nostrae praestantissimum: cujus carmina velim ii legant qui latinas litteras aspernantur: fiet enim ut his perlectis consilium facile immutent: et Karolum Emmanuelem Muzzarellum virum clarissimum deque musis sane meritissimum, qui non consilii tantum mihi adfuerunt, sed et versus nonnullos, ita vivam, pulcherrimos, perrarosque manu conscriptos misere, qua nimirum humanitatis significatione neque dubia, neque subobscura testati sunt, quantum me diligenter, quantumque communia studia foverent. Quare nobilissimis, doctissimisque viris ab omnibus latinae poeseos cultoribus maximas esse gratias referendas, nemo non videt: cum enim illi lectissimorum poetarum

*copiam penes se habeant , plurima mihi libentissime communicaverunt nostris ut incoeptis non infelix omnino exitus facilius responderet. Quod equidem confidore , ut adolescentibus nostris bene ver-
tat ; mores siquidem ad honestatem pietatemque effingere ac confirmare ; Religionem vero colere , ac venerari operae pretium esse , ingenue sancteque profiteor. Duplex igitur libelli dos erit quam ut aequi bonique consulant , lectores rogatos volo.*

Superest , Praesul amplissime , ut , quae tua est benignitas , laborem hunc qualemcumque meum in fidem et clientelam tuam sic recipias , ut , Te studiorum omnium Pontificis Maximi providentia apud nos moderatore sapientissimo , ex horum carminum lectione juventuti mihi concreditae major in dies fiat litterarii profectus , solidaeque pietatis accessio. Vale

BUCOLICORUM

LIBER

 PETRI BEMBI

BENACUS.

Te Giberte cano, purus dum templa sacerdos
 Ingreditur, cupioque tuas attingere laudes.
 Sit modo non impar tanto sub pondere, quae me
 Musa vocat, nec eam ventura redarguat aetas
 Obscurae carmen claro tibi condere famae;
 Et magnum brevibus voluisse intexere cartis.

Nuntius ut vitreas Benaci vectus ad undas
 Muscoso subter pendentia fornice tecta,
 Atque Dei lactis implevit vocibus aures,
 Advenisse diem, quo formosissima terrae
 Ausoniae Verona sacris templisque regendis
 Demissum coelo et magnis virtutibus auctum
 Acciperet juvenem, qualem vix ipsa petebat;
 Forte pater gelido in luco silvaeque virenti
 Fontibus et rivis cubito subnixus et urnae
 Jura dabat, cui carbasei mollissima fili
 Stamina pingebant fuco, vestemque parabant
 Caeruleam, innumerae nodis ac retibus aureis
 Collectos comptae crines tempusque decorum,
 Incinctaeque auro, surasque sinusque fluentes
 Vestibulo in thalami natae, niveosque lacertos
 Nudabant operi, quo pulchro ex agmine Sirme
 Docta lyrae digitis percurrere fila canebat
 Carmen, quod totidem numeris Gardeque, Saloque
 Reddebant: sol aestivos circumvagans orbes
 Axe terens medio currum librabat olympo.
 Ergo avidis allata Deus postquam auribus hausit,
 Promissosque olim fatis sibi laetus honores
 Agnovit; tangens haerentem uligine barbam
 Demulcensque manu jussit vicina vocari
 Flumina: dein sese placidum convexa sub alta

Speluncae senior solitaque in sede recepit.
 Postera jam coelo stellas noctemque fugarat,
 Urebatque dies multo terrasque fretumque
 Lumine, cum nitidis venit Ticinus in undis;
 Piscosusque altis involvens Lambrus arenas:
 Venit et indigenis foecundans Ollius arua
 Deductus rivis; et cultos Abdua campos
 Amne secans, fulvo ripasque interlitus auro:
 Nec rapidus fluvioque Athesis spectandus amoeno
 Defuit; aut Patavi circumque intraque pererrans
 Moenia Meduacus triplici circumdata muro:
 Moenia, quae positor pugnas et bella perosus
 Musarum Iliacus studiis Phoeboque sacrauit:
 Populiferve Padus genitor, qui flumina centum
 Ipse suo accipiens vasto latissimus alveo
 Ubera terrarum cursu per pingua lapsus
 Portat, seque mari septenis amnibus infert.
 Quos tunc atque alios velatus harundine crinem
 Mintius exceptit venientes limine primo
 Obvius, atque in tecta parentis saxea duxit
 Laetifico cordis non celans gaudia vultu.
 Qui simulac udos posuere sedilibus artus
 Crystallo rigida fultis et lusside glauca;
 Continuo Nymphae mensas ante ora Deorum
 Speluncae in medio niveis mantilibus alte
 Consternunt, dapibusque onerant, Dicteaque plena
 Vina ferunt referuntque manu, calicesque madentes
 Praecingunt myrto atque implexis flore coronis
 Purpureoque rosae Medorumque arboris albo;
 Medorum quondam; sed quae nunc plurima laetas
 Benaci vestit ripas; non illa caduca
 Fronde virens, suavique auras permulcet odore.
 Post ubi prima quies epulis; Deus ipse magister
 Undosique lacus domitor praesentia, circum
 Numina respiciens his vocibus ora resolvit.
 Quod votis toties nequicquam optavimus unum
 Vobiscum divi, fausto modo sidere luces,
 Volventes luces, fatorum orbisque ministrae,
 Advexere; vehit pleno bona copia cornu,
 Largaque pomifera praetendit munera dextra.
 Quare vos primo longaevi a semine mundi

In mare coeruleum prono labentia cursu

Volvite majores vaga flumina, volvite lymphas.

Flos etenim juvenum, longa formidine saecula
Perdita qui solvat; quique adglomerata malorum
Agmina tot bellicue faces, quas vidimus ipsi,
Bactra ultra Thylenque ultra Scythiamque releget;
Quique urbes, quique arva colat, Jove missus ab ipso est.
Volvite majores vaga flumina, volvite lymphas.

Hic primum miseris viduatas civibus urbes
Accipiens, vacuosque suis cultoribus agros
Replebit numerum exaequans augensque priorem:
Oppidaque ingenti multum quassata ruina,
Prostratisque solo late moerentia tectis,
Restituet; pulchroque dabit splendescere vultu.
Volvite majores vaga flumina, volvite lymphas.

Magno namque pii juvenis devinctus amore
Hethruscus pater; excelsas qui Tibridis arces
Possidet, et nutu Romanum temperat orbem;
Illius eximias virtutes, claraque docti
Ingenii monumenta, et sancti pectoris artes
Suspiciens, obitosque invicto corde labores,
Hoc dedit, has illi rerum permisit habenas.
Volvite majores vaga flumina, volvite lymphas.

Quid memorem ut tener et primae sub flore juventae
Ingentem ad ludum properaverit auspicibus Dis:
Indole dein quanta nixus, quam fortibus ausis;
Robore ceu firmo ventorum flamina quercus,
Aut scopulus fluctus saxo excurrente marinos.
Sic undas rerum excipiens, et plena pericli
Multa diu, casus victor superaverit omnes.
Volvite majores vaga flumina, volvite lymphas.

Saepe illum abruptis in vallibus Apennini
Versantem; luctantis equi cum frangeret armos,
Praecipitansque viam obstrueret torrentibus imber:
Poeninas vel per fauces tractusque volantem
Aerios summo miseratae e vertice Nymphae
Optavere graves cohiberent nubila nimbos.
Volvite majores vaga flumina, volvite lymphas.

Saepe illi ad magnos reges mandata ferenti
Astitit unigena proles Jovis, ut bona mater,
Ut mater bona; quae caro timet omnia nato,

Et cupit in duros comitem sese addere casus :
 Tum pueri mirata oculos et verba loquentis
 Ipse meas artes jam nunc tibi dixit habeto.
 Volvite majores vaga flumina , volvite lymphas.

Testis adest triplices magnas discreta per oras ,
 Fluviorum nemorumque serax, pecudumque virumque
 Gallia , non auri , pictae non indiga vestis :
 Diversosque jugo ad ventos interque cadentem
 Surgentemque diem longo protenta Pyrene ;
 Altis quae geminas despectat cornibus undas :
 Tum dictis factisque potens illa inclyta bello
 Lataque et in latas Hispania dissita terras.
 Volvite majores vaga flumina , volvite lymphas.

Hae nam te insolita orantem , aversasque suorum
 Flectentem regum mentes Giberte videbant ;
 Acceptos conversa sonos cum vocis imago
 Redderet , et dociles iterarent nomina ripae.
 Volvite majores vaga flumina , volvite lymphas.

Testis et Hadriacus , parvo qui flumine Rhenus
 Lambit humum , testis Thuscis haud maximus undis ,
 Major prole virum , et divinos Arnus honores
 Promeritus , coelum Divisque recentibus augens ;
 Pulchros qui colles pulchramque intersecat urbem :
 Gens quorum imperio dispar nec legibus aequa
 Illius in studiis jamdudum et amore quiescit.
 Volvite majores vaga flumina , volvite lymphas.

Tu vero tu Roma tui genus ecquod alumni
 Jam non curarum , non commemorare laborum
 Una potes ? tolle egregium per saecula nomen ,
 Tolle decus ; daque alta virum volitare per ora.
 Volvite majores vaga flumina , volvite lymphas.

Quantum Trinacriae vertex se sustulit Aetnae ,
 Aut cinctus stellis Atlas , aut Caucasus ingens ;
 Tantum clara virum Romae se nomina tollunt.
 Illa novos tibi coelestum concessit honores
 Antiquis cumulans : at tu praesentia saecula
 Firmabis , veterumque abolebis damna malorum.
 Volvite majores vaga flumina , volvite lymphas.

Ecce tibi laeto vestit se gramine tellus ,
 Et tibi silva comas nutrit ; tibi pabula surgunt ;
 Foecundus mites implet tibi pampinus uvae ;

Palladis et nigrum tibi ducit bacca colorem:
 Tum spisso quem rete trahas, vel arundine longa,
 Flexivagus nostris crescit tibi piscis in undis.
 Volvite majores vaga flumina, volvite lymphas.

Accipe, quae tibi Parnasi de colle sorores
 Dona ferunt, sacram lauri de fronde coronam, (tas.
 Et plectrum, et cytharam, scriptasque ab Apolline char-
 Aeternum quas ediscant celebrentque minores.
 Volvite majores vaga flumina, volvite lymphas.

Ut Phoebus, utque Jovi confectis Graecia lustris
 Sacra olim et pleno posuit certamina campo;
 Sacra tibi, ludosque tibi sic Italia tellus
 Instituet; sic illa tuo de nomine dicet.

Volvite majores vaga flumina, volvite lymphas.

Accipe, quae calathis porgunt tibi munera Nymphae,
 Luteolum calthae florem, casiamque virentem,
 Liliaque violasque et purpureos hyacinthos;
 Haud porxisse prius poterant: bella impia bella
 Pertulimus, dulces et deformavimus agros.

Volvite majores vaga flumina, volvite lymphas.

Ut cum letiferos accendit Sirius ignes,
 Rivus aquas, hortus flores, pratum invidet herbas:
 Pallet humi nullo facies depicta colore:
 Ipsa suos sitiens foetus non educat arbos:
 Intereunt fruges siliqua labente perustae:
 Arva colit nemo siccis arentia glebis,
 Vomere et durum non admittentia dentem,
 Cuncta jacent nimio caeli contusa calore
 Tristia sic nostris aderant prius omnia terris.
 Volvite majores vaga flumina, volvite lymphas.

At postquam laetos effudit Juppiter imbres:
 Rivus aquas, hortus flores, pratum explicat herbas
 Ipsa viret tellus, ripae collesque nitescent:
 Dant segetem sulci, nemus altas sufficit umbras;
 Poma suos curvant crescentia pondere ramos!
 Ruris turba Deam venerata ligonibus udam
 Vertit humum, et putres exercet vomere campos:
 Cuncta vigent caeli foecundis roribus aucta:
 Nostras sic jocunda manent nunc omnia terras.
 Volvite majores vaga flumina, volvite lymphas.

At vos in septem discreti culmina montes :
Inque Pater Tyberine , tuum qui flumen Olympo
Devehis ; hanc olim vobis multosque per annos
Sit satis o tenuisse , meam mihi jam date partem :
Ipse dabo multis , ne sinent mea gaudia sola :
Et tandem nostris juvenem concedite terris.

HIERONYMI FRACASTORII

AD JULIUM III. PONT. MAXIMUM.

IDYLIION

Maxime Divini Pastor Gregis, inclyte Juli,
 In terris cui summa uni est concessa potestas,
 Sceptra vicesque Dei gerere, et regna infera Ditis,
 Caelorumque fores aperire, et claudere posse:
 Si tu, dum magnae Italiae, dum prospicis omni
 Europae, et vasta Mundi sub mole laboras,
 Paullisper potes a tantis secedere curis,
 Et potes agrestes pastorum audire Camoenas, (Pan,
 Nunc aures adhibe placidas mihi: Namq; ego, quae
 Pan magnus cecinit nostros ventura sub annos,
 Nunc referam, tua, Magne Pater, pars maxima
 quorum est,
 Cujus ab auspiciis Parcae nova secula volvunt.
 Nec te poeniteat pastorem audire canentem,
 Quando etiam Admeti tauros formosus Apollo
 Pavit ad Amphrysi ripas, tenuique cicuta
 Non puduit cantare Deum sub tegmine acerno:
 Et Veneri dilectus oves ductavit Adonis.
 Scilicet et tu etiam post grandia nomina Pastor
 Diceris, atque hoc in primis cognomine gaudes,
 Et pecudes curare soles, pecudumque magistros.
 Forte ego, dum medio terras sol excoquit aestu,
 Ipse Succani pastor puer incola campi
 Ducebam pastas viridi de valle capellas
 In nemorum secreta, umbras et frigora quaerens,
 Qua placidus cursu descendit in aequora Liris.



Est lucus, prisci quem sacravere latini
 Silvano: in cuius medio densa ilice cinctum
 Est pratum, agrestes ubi Dii persaepe videri
 Audirique solent: hic capripedes Satyriscos
 Pastorumque manum junctis per mutua palmis
 In gyrum canere, et laetas agitare choreas
 Invenio admirans. Medius Pan magnus ovantem
 Ad calamos, cantusque regit ducitque coronam.
 Dumque Deus canit ipse, silet tum cetera pubes.
 Dum silet ille, alii thiasos, cantusque, sequentes
 Instaurant, repetuntque Dei postrema capentis.
 Ingeminat postrema nemus, respondet et Echo.
 Tum me respiciens, mihi sanguine proximus Anthus,
 Anthus, Aquinatis pastor gregis, buc, puer, inquit,
 Huc ades, o Neore, et te his adijunge choreis:
 Aut, spectare magis si te juvat, aggere ab illo
 Prospice, dum saturae sua ducant otia caprae.
 Cui ego: Quin potius juvet hoc de cespite vestros
 Spectantem lusus, molli requiescere in herba.
 Et tum forte Deus buccas sandyce rubentes
 Inflans, et picea frontem praecinctus acuta,
 Ad calamos circumsiliens, haec carmina cantu
 Fatidico insanus latas fundebat ad auras:
 Dicite io, Satyrisci, et io geminate, coloni;
 Aurea felici nascuntur secula mundo.
 Excipiunt juvenes, iterat nemus, assonat Echo:
 Aurea felici nascuntur secula mundo.
 Tum sequitur Deus ante tamen Rex magnus Olympi
 Bellumque, horribilemque famem, diramque flagellis
 Armatam Aleto e tenebris, et faucibus Orci
 Immittet terris, genus ut mortale coercens
 Castiget, fraudesque hominum, fastusque superbos,
 Et luxus, et spes miseras, et gaudia vana:
 Dum tandem se se, atque Deos cognoscere discant.
 Mox tantum exspectatum illud, quod carmine sacro
 Tot Vates cecinere pii, felicibus astris
 Adveniet tempus, quo mons ille arduus, ille
 Mons ingens, sublimè caput super omnia tollat
 Culinina, sidereum qui vertice tangat Olympum:
 Quo neque vis ventorum adeat, non fulminis ignes.
 Dicite io, Satyrisci, et io geminate, coloni;

Aurea felici nascuntur secula mundo.

Hoc in Monte Dei pecudes pascentur et agni,
Graminis aeterni pingues, et velleris aurei.

Exsiliunt et aquae vivae, quibus ubera caprae
Grandia distendant, distendant ubera vaccae.

Non malus hic serpens, non noxia creverit herba,

Non sentes, sterilisve filix, non frigida taxus,

Sed his lecta seges, sed his gravis uva racemis.

Corticibusque cavae sudabunt balsama pinus.

Hinc magnis praestantem animis, et fortibus ausis

Fortunata nimis pastorem haec secula habebunt,

Qui virtute regat populos, et legibus aequi,

Divinas qui pascas oves et pascua late

Extendat, pecudesque ipsas, et ovilia servet.

Hic primum diram Aleto, et Cocytia monstra

Caucasea aerata religabit rupe catena.

Inde famem miseram e Latio populisque Deorum

Pellet in hostiles gentes, et barbara regna.

Tum laeta ubertas, segetumque onerata manipulis

Alma Ceres Italas spicis venerabitur aras;

Quam circum pueri salient, et rustica pubes,

Ridentesque jocos, incommata carmina dicent.

At noti Musis Damones et Alpheisiboei

Vota Patri magno, laudesque et sacra canentes

Aeternis illum numeris ad sidera tollent,

Heroemque, Deumque, salutiferumque vocabunt.

Dicite io, Satyrisci, et io geminate, coloni;

Aurea felici nascuntur secula mundo

Ille animum mox ad pacem, et discordia regum

Pectora convertet, sanctisque hortatibus iras,

Atque odia, et caecos regnorum et laudis amores,

Horrendamque sitim caedis, fusique cruoris

Sedabit, pelletque feri mala semina belli.

Tum Pax alma ferens ramos felicis olivae,

Atque Amor, et junctis pariter Concordia dextris,

Et Genius comitum, et generis Hymenaeus amator

Invisent late populos, Latii per arva

Laetitiam, risusque ferent: tum justa cupido

Bellorum, piaque arma, Dei vertentur in hostes.

Jam video augustis late plena aequora velis

Fervere, jam trepidare vagi septem ostia Nili,

Euphratemque, Tygrimque suo se condere in amne

Jam nec Bactra ipsum capiunt, non India tota
 Maumethem fugientem, ipsum non Caucasus ingens,
 Non qui tot silvas, juga tot comprehendit Imavus.

Dicite io, Satyrisci, et io geminate, coloni;

Aurea felici nascuntur secula mundo.

Quaenam, quae properant tantae per caerula puppes
 Devotae ad Tiberim, magnaeque ad moenia Romae,
 Ceu densae ad nidos latum per inane columbae?

Agnosco gentem innocuam, numerumque beatum,
 Felices animas, fatis ab origine prima

Dilectas, quae caelo olim, divisque fruuntur.

En jam sanctam urbem, jam septem in collibus aras
 Impositas, summiq; pedes Pastoris adorant.

Hos inter, video, et nostri longa aequora sulcant

Arcades, Italiamque petunt, fataliaque arva

Arcades. O soli quondam cantare periti

Pastores, quos Justitia e tellure recedens

Postremos liquit, nunc rursus laeta revisit.

O sancti, properate; vocat Deus aethere ab alto:

Vos alius jam grex, aliudque expectat ovile.

Quin venit illa dies, quum nos quoque Maenala nostra,

Arcadiamque omnem, qua immani a gente repulsi

Fugimus in Latium, longo post tempore tandem

Visamus, dulcemque auram. O placidissime Peneu,

O Ladon, vos o gelidi pineta Lycaei,

Quando ego per vestros meditabor carmina lucos?

Maenalios quando recinet mea tibia versus?

Maenalus auritas, dantesque oracula quercus

Semper habet, semper doctas ille audit avenas.

Concipe Maenalios, mea tibia, concipe versus.

Talia cantabat memorans Pan magnus: at Anthus

Haec referes, puer, inquit, et hoc tibi munus habeto

Nunc parvum: ventura dies majora reservat.

Tum mihi fiscellam dono dedit optimus Anthus,

Dicere et occasus astrorum, dicere et ortus,

Et quid quaeque ferat tellus, quae commoda Baccho,

Quae Cereri, quidnam ventos, quid nunciet imbres,

Quae tempestatum, caeli quae signa sereni:

Denique quae cunctis natura sit indita rebus.

Virtutem in primis et honestum, quemque docere;

Ac vitii ipse expers, aliena notare paratus.

Et jam tempus erat pastum deducere capras.

NIC. PARTHENII GIANNETTASII S. I.

PARTHENIS ECLOGA I.

ARGUMENTUM.

Jolas piscator Virginem, humani generis delicias, unice adamabat; qua cum dulce quaeritur, quod se ex oculis subtraxerit. Per Parthenidem, Virginem, per Jolam, religiosum virum intellige.

Parthenidem puer ardebat piscator Jolas,
 Delicias divum, atque hominum, quam saepe solebat
 Ad (1) Mergillinae vitreos invisere fontes,
 Sacrum ubi Parthenidis stat curvo in littore templum.
 Hic cum jam Zephyri ponebant murmura, et altum
 Purpureus rediens pulsabat Vesper Olympum,
 Haec dulces inter lacrimas incondita solus
 Fluctibus, et duris jactabat carmina saxis.

Jol. Quid tantum refugis, bona Virgo? quid et
 mihi tantum

Divinum avertis vultum, renisque videri?
 Ah miser, ah nostros contempnis Parthenis ignes?
 Praetulerimne aliquam tibi forsitan, Dia, vereris?
 At mihi vos, Superi, testes, si corde caducum,
 Aut unquam mortale aliquid meditatus; et ipsi
 Sint mihi vel scopuli testes, sint litora, et undae.
 Dicite vos, scopuli, vos litora dicite, et undae
 (Si sensus scopuli, si litora habetis, et undae)
 Parthenidem si semper ego piscator amavi:
 Nam voces vos saepe meas audire soletis,
 Atque repercussas mea reddere verba per auras.

(1) Amaenissima ad Pausilypum Villa in extremo orae
 Olympiae *Mergoglino*, olim Actii Syncerii, ubi celeberrimum ejus
 sepulchrum in templo ab ipso Virgini, et Divo Nazario dedicato.

Ah nostro quoties offensae murmure cautes
 Parthenidem sonuere, meos jam carmine amores
 Edoctae rupes resonare, et concava saxa.
 Et vos, quae nostro frondetis litore quercus,
 Dicite (nam sensus, et habetis numina quercus)
 Haec vestro quoties incidi carmina trunco:
 Te, Virgo, piscator, amat, et amabit Jolas:
 Et veluti hae quercus, crescent sic semper amores.
 An me tu forsán, Virgo, aspernaris amantem
 Quod pauper piscator? erat piscator et ipse
 Nonne puer, formosa, tuus, quem saepe beato
 Amplexum gremio tenuisti, et dulcia saepe
 Atque optata sacris libasti basia labris?
 Ille nec erubuit calamos, non retia, et bamos,
 Nec parvam sociis agitare per aequora cymbam,
 Cum Deus ipse, maris regnator, et aetheris alti,
 Qui nutu terras, nutu qui sidera torquet.
 Fortis amor; nostrum quis vincere possit amorem?
 Ille Deum in terras, vel ab aethere traxit amantem;
 Atque malis hominum pariter consuescere jussit,
 Et tu, Diva, meos nunc aspernaberis ignes?
 An mihi dura, quia agresti munuscula cultu
 Nulla tibi misi? misi tamen ipse rubentes
 Bissenas de more rosas tibi, Dia, quotannis,
 Et meminisse potes; namque hoc cum carmine misi
 Virgo, noster amor, tuus haec tibi mittit Jolas.
 Quin etiam variis memini misisse corollam
 Floribus intextam, et calathis quoque lilia plenis:
 Candida (novi equidem) quia sunt tibi lilia cordi.
 Sunt et plura mihi in testis; cras illa videbis
 Ante aras, Regina, tuas emittere odorem.
 Praeterea, dura quae vix de caute revelli
 Nuper oliviferae piscosa ad saxa (1) Minervae.
 Bina mihi curvos variata corallia ramos;
 Bis petiit Nisea soror, bis et mihi furtim
 Sublegere aggressa est; arca sed condita servo.
 Illa tibi multo cum carmine mittet Jolas,
 Natalem cum, Virgo, tuum lux annua reddet.

(1) Campaniae promontorium, *Capo di Massa*, o *la Campanella*.

Sed piscatoris parva haec an munera spernis,
 O Divum Regina? tibi sed munera digna
 Qui ferat? ipse suis vix dignum textit amictum
 Sol radiis; vix Luna pedes tibi lambere digna est.
 At, quia dulce sibi cor amantes mittier optant,
 Cor tibi, quod tantum restabat, misimus ultro.
 Quidquid id est, certe Deus ipse hoc munere majus
 Nec sperare potest, nec reddere possumus ipsi.
 At tibi quod totum, Virgo, jam misimus illud,
 Scis equidem, certisque potes cognoscere signis.
 Mane ego te primo, te vespere, Diva, saluto,
 Saepius atque die in medio tibi carmina dico;
 Atque tuum quoties audire, et reddere nomen
 Contingit, tunc ore fero prona oscula terrae
 Cernuus, et coeli venerabile pignus adoro.
 Nil tamen haec prosunt, dulcem si cernere vultum
 Dura negas, tantumque meos contemnis amores.
 At mihi te propria vetitum si cernere forma,
 Appicta in tabulis saltem simulacra videbo.
 Sic aliqua et nostro dabitur medicina dolori:
 Est sua conspectu vel inani blanda voluptas.
 Ah timeo (de te quoniam mihi credere tantum
 Non equidem, bona Virgo, licet) ne pectore nostro
 Quid lateat, quod, Diva, tuos offendat ocellos.
 Dic mihi quis lateat malus anguis? ut et citus illum
 Conteram, et optato dignus jam reddar amore.
 Sed tempus rutilis percurrere litora flammis;
 Nostra sed occultae depascent pectora flammae.

GENETHLIACA ECLOGA II.

ARGUMENTUM.

Zephyraeus, et Artemidorus cum ad Virginis Templum, quod in extrema Olympia ad Pausilypi radices juxta cryptam, qua via Puteolos ducit, extructum est, natali die ad pompam celebrandam, ut moris est, convenissent, illius genethliacum texunt.

ZEPHYRÆUS, ARTEMIDORUS.

Virginis Augustae ad templum sub monte repostum
(Namque dies natalis erat) convenerat omnis
Pausilypi, Megaraeque manus: Zephyraeus aprico
Pausilypo, Megara descenderat Artemidorus:
Nare periti ambo, et durare in fluctibus ambo,
Velocique vagum delphina lacescere cursu;
Et versus cantare, et acuta ludere canna.

Tum prior haec patula vitis Zephyraeus ab umbra.

Zep. Natalem, Virgo alma, tuum lux aurea vexit,
Lux semper mundo, et mihi laeta, age, Delie currus
Siste rotas properantis; aquas ne tangere tantum
Festina; pede lento ut eas, similisque moranti,
Virgo jubet, laudes celebrandae Virginis hujus.
O utinam si anno flueret mihi longior haec lux.

Virginis est Natalis, age, ede, o buccina, cantus,
O piscatores, date flores, spargite muscum,
Sacraque caeruleis altaria cingite vittis.

Et vos, o pueri, atque intacto flore puellae
(Vos amat haec Virgo) calathis nunc lilia plenis,
Pubentesque nascenti subtexite sarta Puellae.

Virginis est Natalis, age, ede, o buccina, cantus,
Candida gemma velut concrescit matris in alvo,
Et nitida aetherias coeli se prodit in auras:

Sic matris concepta utero mundissima Virgo
Candidior nive, purpureisque nitentior ipsis
Erumpit gemmis; mirantur sidera, et omnes
Coelicolae, et roseis delibant oscula labris.

Virginis est Natalis, age, ede, o buccina, cantus.
O Virgo formosa, Deo gratissima Virgo,
Jam tibi nascenti se per tua tempora flectunt
In gyrum stellae, et radianti luce coronant:
Jam tibi luna vagos submittit frontis honores;
Atque suis nitidum radiis subtexit amictum
Purpureus Titan, circumque nitoribus ambit.

Virginis est Natalis, age, ede, o buccina, cantus,
Tu magni Regina maris, tu sidus amicum
Nautis semper eris, laetum et piscantibus omen.
Se tibi submittent, ventique, atraeque procellae,
Et se se prono curvabunt vertice fluctus.
Teque homines, Divique colent, dominamque vo-
cabunt

Ac tibi dona ferent haec ad delubra quotannis.

Virginis est Natalis, age, ede, o buccina, cantus.
Haec Zephyraeus: opacae intixus protinus ulmo,
Dicite, Nereides, quae luserit Artemidorus.
Nec possum meminisse, canentem audire negabat
Turba virum stipata: nec omnia possumus omnes.

Ari. Omnia laetantur, tellus, mare, sidera, coelum,
Et Superi, atque homines: quid mirum? nascitur
orbi

Aurea nunc Virgo; ut cum matutina resurgit
Aurora, et gremio solem paritura rubescit.
Divinum et Solem nostra haec paritura Puella est,
Atque optata dabit felici gaudia mundo.
Ducite solemnes, bona pubes, ducite pompas.
Cernite, ut alma dies innubi effulsit olympo,
Et roseos Phoebi currus, aurumque revexit:
Cernite, pacatis ut rideat aequor in undis,
Et Zephyri levis aura, et saxa virentia musco.
Omnia nunc rident, gratantur et omnia Divae
Nascenti: Superique ipsi ad cunabula ludunt.

Ducite solemnes, bona pubes, ducite pompas.
Non posthac rauco Triton per caerula cornu
Horrendos pelago nimbos instare monebit;

Nec frontem Sol ipse sua ferrugine tinget.
 Nascitur en Virgo: placantur Virginis ortu
 Et venti, nimbique, impacataeque procellae:
 At sua jam mites deponunt murmura fluctus.

Ducite solemnes, bona pubes, ducite pompas.
 O summo dignata Deo, dum despicit omnes,
 Te te unam Pater elegit, divina Puella,
 Incipe jam totum risu componere mundum,
 Tullerem, freta lata maris, camposque liquentes,
 Incipe, laetae adeunt tua jam cunabula gentes,
 Annua natalis recolunt dum gaudia lucis.

Ducite solemnes, bona pubes, ducite pompas.
 Ire juvat, vitreique maris perquirere fundum;
 Vertere Tritonum latebras, et quidquid in alto
 Doris avara sinu late abdit, sive rubentes
 Murice sint conchae, aut pictis interlita punctis
 Ostrea, seu curvo ramosa corallia trunco,
 Sublegere; illa feram nascenti dona Puellae.

Ducite solemnes, bona pubes, ducite pompas.
 Haec illi: et memini venisse ad litora pisces,
 Et rigidas caput erexisse e fluctibus orcas.

BARTHOLOMÆI BOSCOVICHII.

ECLOGA I.

REGES.

Ad patrias sedes, unde aliquando abfuerat, reversus Lycidas quum exultantia insueto adparatu Pastorum mapalia offendisset, de Regum ad Infantis Dei cunas adventu a Tytiro edocetur.

LYCIDAS, TYTIRUS.

Tytire quandoquidem patriis divisus ab oris
 Externos agitare greges, et littora jussus
 Visere, qua fluctu procul alluit unda marino,
 Nunc redeo, quid nostra novo mazalia cultu
 Laeta nitent, festosque agitant vacua arva tumultus?

Tyt. O Lycida, infelix Lycida, quae tam invida
 longum
 Suasit iter fortuna, aliasque abstraxit in oras,
 Ne Regum pompas admirarere superbas,
 Et nostris ignota prius miracula sylvis?

Lyc. Quid facerem, male grata mei si jussa
 parentis
 Urgebant? Corylos, atque haec viridantia testor
 Gramina, discessi lugens, Puerumque sub antro,
 Et Pueri Matrem, fletu erumpente, reliqui;
 Sed lacrymis nil mota feri sententia patris,
 At nunc hoc etiam abfuerit, dum lentus aberro,
 Ne pompas, et tanta miser portenta viderem:

Tu tamen, ut potis es, miserum solare dolorem:
Qui Reges, unde adfuerint, da, Tytire, nobis.

Tyt. Magna petis: quid enim tot barbara nomina
gentis

Insuetæ numeret? non si foret ipse Menalcas.

Namque Arabas, Tharsosque, et patria flumina
Gangem,

Nescio quem Gangem, ni mens mihi falsa, ferebant,
Aurea Pastores tondent ubi vellera, et ipse

Inter flaventes undam rapit amnis arenas:

Hinc aderant, tantumque viae, tantumque laboris

Dulce fuit subiisse; sacrum dum Numinis antrum

Visere, dum teneris possent dare munera plantis.

Lyc. Mira refers; nam quis per tot discrimina
rerum

Errantes duxisse gradus, et Numinis antrum

Monstrare, et puerum potuit docuisse recentem,

Quem neque vicinas populi didicere per urbes,

Nec nisi jam nostrae norint resonare myricæ?

Tyt. Index fidus erat, quo non formosior alto

Prima nocte facies inducit Vesper olympos,

Nec revocat clausos ad pascua Lucifer agnos.

O Lycida, quam pulchra dies, quam celsa praeiret

Stella gradus, quam tergemini longo agmine reges

Servorumque chori lumen sequerentur amicum!

Illa, ubi ventum est ad stabulum, tremebunda per
auras

Constitit, et rutilas visa est demittere flammæ.

Agnovere locum, nec pastoralia tecti

Culmina, nec visum cultu sub paupere Numen

Detinuit: sternuntur humi, Puerique Parentem,

Et tenerum alteruo venerantur murmure Natum.

Tum clausæ promuntur opes; redolentia thura,

Et myrrhæ pingues, et copia divitis auri.

Fundunturque sacris inter cupida oscula plantis!

Lyc. Quid Genitrix tali adspectu, quid Populus
ipse?

Tyt. Populus ambrosiis subridens lene labellis

Tendebat teneros ad regia colla lacertos.

Illa verecundo vultum suffusa rubore:

Atque oculos defixa solo pudibunda modestos,

Cautes, crede mihi, ipsas, et corda ipsa ferarum
Mollisset, quercusque sacros rapuisset in ignes.

Ut demum saturatus amor, vestigia retro

Versa premunt, patriasque iterum referuntur ad oras.

Lyc. O miserum Lycidam! en quae mihi gaudia,
qualem

Praeripuit fortuna diem! Nempe hoc erat illud

Quod tantum quercu cornix clamaret ab altâ,

Quod toties offensa pedum vestigia, et ipsa

Nescio quo moesto streperet mihi fistula cantu.

At nunc nec misero jam visere sacra licebit

Antra mihi, nec vimineis, velut ante, canistris

Munera divinae ad cunas sacrare Parenti.

Illa aurum, myrrhamque, et grandia munera Regum,

Tytire, habet: campos et pastoralia dona

Contemnit, nostros et jam fastidit amores.

Tyt. Non equidem, o Lycida, non est quam
munera Regum

Prævertant, fulvo capitur nec Parthenis auro.

Illa mihi de more, sacro dum carmina Nato

Concinerem, vultu facilis, velut ante, benigno

Adnuit; et cantu nihil est jucundius isto,

Tytire, ait, pretium minimum est in munere munus:

Simplicitas, et amor fulvo est pretiosior anro.

Lyc. Ergo age, quandoquidem sic est, properemus
ad antrum,

Et quae littoreâ Mopsus piscator in actâ

Dona dedit nobis, Puero servata feramus.

ECLOGA II.

XAVERIUS.

THELGON, DORYLAS.

Thel. Mirabar, Doryla, vicinae in margine ripae
Retia dum relego, et vacuas sine pondere nassas
Quid tantum ingratos iterarent undique luctus

Halcyones, quid sola novis per saxa querelis
 Aequorei gemerent carmen miserabile mergi.
 Xaveris heu! nostri raptum decus aequoris, illos
 Xaveris ad lacrymas, et fata extrema ciebat.

Dory. Sic est: hoc fuerat Thelgon, quod littore Goo
 Dum vehimur, conchasque imis piscamur arenis,
 Scrutamurque alto rubicunda corallia fundo,
 Non quas ante suis choreas Delphines in undis
 Ductare, aut medium auderent resilire per aequor;
 Sed moesti patulo vicinum ad littus hiatu
 Nescio quo patrios complerent murmure fluctus.
 Me miserum! adspexique omen, totoque notavi
 Littore, nec tantos potui mihi fingere casus:
 Hos illi, o Thelgon luctus, haec funera flebant.

Thel. At mihi nunc spes quandoquidem jam nulla
 relicta est,
 Heu! dulces audire sonos, et visere lumen,
 Cujus ab adspectu rabidos mitescere ventos
 Vidimus, horrentesque Thetin mulcere procellas,
 Jam nec cymba placet, nec littora. Lenta jacebunt
 Retia per scopulos, et viminei Labyrinthi,
 Et levis invisâ calamus cessabit arenâ.
 Hic locus, haec nostros tantum surda aequorâ luctus,
 Concavaque immites resonabunt saxa querelas.

Dory. Quin potius, qua celsa sinu tegit urna beato
 Dilectae exuvias animae, corpusque sepulchro
 Ridet adhuc (verum nam si mihi rettulit Egon,
 Ridet, et adsueto piscantibus annuit ore)
 Pergamus, vultuque oculos pascamus amato.

Thel. Ah Doryla, haec forsân qui spes heu!
 pascit inanes
 Finxit amor: solet ille oculis inludere nostris.

Dory. Hoc Lycidas, hoc ipse Mycon, hoc et
 Polybotus,

Et senior nostra narravit Mopsus in actâ.
 Illi oculos, atque ipsa etiam sub morte serenas
 Conspexere genas: illi ridentia membra,
 Atque artus manibus contrectavere recentes,
 Et devota sacris libarunt oscula plantis.

Thel. Ergo age, si mihi vera refers, age, littore
 puppim

Solve celer, placidi quando maris aequiore toto
 Unda silet, luduntque hilares Zephyritidos auræ.
 Nulla mihi jucunda magis, quam quæ sibi tellus
 Fortunata sacros gremio complectitur artus.

Dory. En tibi laxatos collegi rite rudentes,
 Spirantesque ferunt volitantia carbasa venti.
 Interea tu si quid habes, quod taedia longæ
 Soletur taciturna viae, modularè: silenti
 Suspensum fluctu ceruis mare, lentaque nullo
 Murmure spirantis circumvolat aura Favoni.

Thel. Gmo no hæc quæ vacuo nuper resupinus
 in antro,

Cum primum, heu! luctus Celadon retulisset amarus,
 Deslevi, duraque amens in rupe notavi,
 Expediam. Tu purpureas de murice conchas
 Dona para, et plenis, Doryla, gravia ostrea gemmis.
 Fluctus, heu! noti fluctus, et litora remis
 Pulsa meis, scopulique maris, lustrataque saxa;
 Retiaque, et nassae, et toto quaesita profundo
 Muta armenta mihi, et tenui mea cymba carinâ,
 Xaveris occubuit, jacuitque exanguis arenâ;
 Flete, licet, nostris et respondete querelis.
 Quod si surda silent maris aequora, vos, age, saltem
 Spargite moerentes mea lumina, spargite fletus.
 Heu pietas! quid jam misero mihi dulce relictum est
 Denique, quid ruisero jam dulce? ipsa aequora
 sordeat,

Cymbaque, cumque suis vilescunt ostrea gemmis.
 Te, Genitor, moriente, omnis mihi rapta voluptas.

Spargite moerentes, mea lumina, spargite fletus.
 Tu mihi namque Parens, tu caligantia coecis
 Lumina demsisti tenebris: me sydera primum
 Sperare, et tuto docuisti insistere cursu
 Aetheris: et, Thelgon, dixisti, sydera, Thelgon,
 Te poscunt, certumque patet tibi limen olympi.

Spargite moerentes, mea lumina, spargite fletus.
 At nunc quis vel thura piis imponere flammis
 Edoceat, vel litoreas quaesita per undas
 Munera sacrare offenso placitura Tonanti?
 Qualis quæ viduata suo vaga cymba magistro
 Fertur in oppositas nullo prohibente charybdes,

Talis, te raptō, talis te, Xaveri, Thelgon.

Spargite moerentes, mea lumina, spargite fletus.
At saltem ipse tibi extremā conjunctus in horā
Vidissem morientem, et solā in rupe jacentem!
Frigentes fovissem artus, atque ultima verba
Inscripsissem animo, et tecum quoque forte perissem.
At nunc deserto jacuisti in litore, nec te
Adspicere extremum potui, nec membra sepulchro
Condere, eodemque, heu! lacrymas tumulare sepulchro.

Spargite moerentes, mea lumina, spargite fletus,
Hic certe vacuo statuam tibi litore saltem
Aequoreis aram conchis, algæque virenti
Surgentem; celso nam tu sublimis olympo
Regna tenes, coelumque, et lucida sydera calcas.
Hic tibi dona feram lacrymis conspersa, tuumque
Litoreas nomen resonare docebimus undas.

Claudite moerentes, mea lumina, claudite fletus.

ECLOGA III.

PARTHENIS.

Corydon Pastor, quaesita frustra per campos Parthenide, dum ejus ab antro discessum lacrymis persequitur, lustralem ad Templum profectionem ex Lycida cognoscit: tum ambo in Pueri, Virginiisque laudes alternis erumpunt.

CORYDON, LYCIDAS.

Cory. Quos aditus, quae jam refugis nemora avia
claustis
Lustrabis, Corydon, aut quos errare per agros
Institues? Vitrei per prata virentia fontes,

Sylvarumque umbrae, convexaque cautibus antra -
Dicite, quandoquidem campos fastidit et arva,
Dicite quas servet pulcherrima Parthenis urbes?

Lyc. Fallor, an arboreâ Corydon flet solus in
umbrâ?

O Corydon, quae caussa graves inopina querelas
Excitat, et misero jubet indulgere dolori?
Noune vides procul ire greges, et vindice nullo
Incustoditas per prata errare capellas?

Cory. O Lycida, nec cura gregis, nec cura salutis
Ulla mihi superest: quid enim iam caetera prosint,
Parthenide amissâ! Miseros pertaesa colonos
Illa abiit, nec quos demum diversa penates
Incolat, inveni, nec queis in saltibus erret.

Lyc. Nescis ergo sacris Infantem ut sisteret aris,
Ad delubra gradu Matrem properasse pudico:

Cory. Non equidem audieram: meliora ad pascua
namque

Ivimus, et teneros procul hinc abduximus agnos.
Nunc demum, heu! serus redeo: sed prata virentes
Si tibi sufficiant haedis pascentibus herbas,
Pergentem licuit sacras deducere ad aras?

Lyc. Et licuit; Lycidam nec dedignata sodalem
Virgo Parens: aequo tulimus vestigia gressu.

O Corydon, o qualis erat! non pulchrior ullo
Tempore divinos vultu adspirabat amores.

Ipsa, mihi credas, avulsa a sedibus imis
In Dominae occursum Solymeia currere Templa
Visa mihi, ipsa novo sacra exultare susurro.

Tum pius haud frustra tanto inflammatus ab aestu
Numinis, o Senior quae fata arcana Sacerdos
Praecinuit, quales effudit pectore sortes!

Nazareos Genitrix, Galileia regna, penates
Nunc colit, et patrias servat pulcherrima sedes.

Cory. Fortunate Puer! dulcem adspexisse Parentem
Cui licuit, misero decedentemque mapali

Adfari extremum, atque extrema adjungere dona!
Ipse etiam, ah Lycida! ni sors inimica fuisset,

Ipse comes venissem, et nostro forsitan agnus
De grege lustrales isset sacrandus ad aras;

Aut nostrâ gemeret deductus ab arbore turtur.

At modo, dum luctus quo consolemur amarus,
 Nil superest: vacuo saltem resupinus in antro
 Virginei partus cautes, et conscia saxa
 Servabo, et gracili carmen modulatus avenâ
 Illius ad notas nomen jactabimus auras.

Lyc. Ipse etiam, tenerae tondent dum prata
 capellae,

Tecum adero, et, si forte placent, alterna canemus
 Carmina; Parthenidi, memini, nam alterna placebant.
 Incipe tu, Corydon, te fistula nostra sequetur.

Cory. Muscosae cautes, et conscia Virginis antra,
 Quamvis neglecto jaceatis squallida saxo;
 Vos mihi cara domus: vestro spirare recessu
 Dum liceat, patrii vilescunt tecta mapalis.

Lyc. Felices umbrae, et manibus reptata tenellis
 Antra Deo, quamvis sylvestri horrentia cultu,
 Non mihi dulce magis campos Jordanis amicos,
 Moeniaque, et sedes Solyniae incoluisse superbas.

Cory. Hic ego divinos meditatatus Virginis igues
 Instabo ad numerum tenues ex ordine canuas;
 Haec loca Parthenidem, percussaue vocibus antra,
 Parthenidem dulci resonabunt saxa susurro.

Lyc. Hic ego divini nomen mihi dulce Puelli
 Inscribam scopulis, et cuspide falcis acutâ
 Mandabo saxis teneros in imagine vultus;
 Haec spelunca meos testabitur omnis amores.

Cory. Vere novo roseum campo Zephyritis ho-
 norem

Quum referet, varioque ornabit prata colore,
 Hic ego purpureis populatus floribus hortos
 Suspendam circum nexas de more corollas.

Lyc. Quum gravis optatâ pendebit in arbore
 fructus,

Curvabuntque suos poma autumnalia ramos,
 Hic ego lecta feram plenis pia dona canistris,
 Et sacrata omni pendebunt munera saxo.

Cory. Dulce apibus flores, viridantia prata capellis,
 Hesperus agricolis, fontes sitientibus arvis;
 Sic mihi dulce fuit cupidos in Virgine vultus
 Figere, dum nostrum non dedignata mapale est.

Lyc. Triste apibus taxi, maturis grando racemis,

Syrius et campis, et flavis messibus imbres;
 Sic mihi triste, aliis dum, Pupule, vivis in oris
 Non posse ad teneras deponere munera plantas.

Cory. Sed jam lassato Titan subit aequora curru,
 Vesper et aethereo flammis accendit olympto;
 Occidit et Titan, et nox cadet ipsa; sed unus,
 Alma Parens, nostri non occidet ignis amoris.

Lyc. Jam tacet omne nemus, volucris tacet omnis,
 et omnis

Fluminis unda silet; sileant et carmina; sed te
 Si taceant versus, taceant si carmina, Pupe,
 Hic locus, hi montes, haec ipsa arbusta loquentur.

CAROLI NOCETI.

EGLOGA.

CELADON PASTOR, LYCIDAS PISCATOR

D. PETRI APOSTOLORUM PRINCIPIS LAUDES CANUNT.

Lyc. **D**ic mihi, cur dominâ, Celadon, tam serus ab Urbe?

Nam tibi nec gelidi dura inclementia coeli,
 Nec pluviae fecere moram: formosior usquam
 Non fuit ulla aestas, nec tempore forsitan ullo
 Tam levibus mites spirarunt flatibus aurae.
 Certe ego caeruleos dum sector arundine pisces,
 Et placido vacuas demitto in gurgite nassas,
 Nunquam immota magis vidi stare aequora; nunquam
 Clarius ex imo tenues se prodere arenas.

Cel. O qualis, Lycida, qualis spectacula pompae,
 Qui cantus, festique ignes, quae gaudia denos
 Me Romae tenuere dies! quae dum omnia mecum
 Nunc etiam recolo, mihi crede, virentia sordent
 Prata, nec agrestes, cum forte in gramine molli
 Rustica turba salit, possum jam ferre choreas.

Lyc. Non equidem temere tam longo tempore rebar
 Linquere te solas voluisse per arva bidentes.
 Praesertim cum nec Pholoe, neque Chloris adesset,
 Quae pastos caulis noctu concluderet agnos.
 Verum ea quae fuerint, Celadon, da gaudia nobis.
 Auditis quoque rebus inest saepe aequa voluptas.

Cel. Hoc equidem volvo, tenui si claudere versu
 Cuncta queam, laetâ quae passim adspeximus Urbe.
 Proxima lux aderat, magnum quae Daphnin olympo
 Intulit, et numerum Divorum altaribus auxit.

Quis tamen hic primum ductam longo ordine pompam,
Perque vias strepitumque equitum, sonitumque ro-
tarum

Cantibus aequiparet? mediis quum in millibus Heros
Iret, et in templum dona ampla inferre pararet?
Vel cum quadrupedem phalerisque ostroque superbum
Principis ante pedes ipsa intra limina templi
Vectigal regnorum, atque alti nomine regis
Sisteret, et multo loculum daret aere sonantem?
Atque utinam possem tibi verba alterna referre.
Sed mea paupertas, braccatique agminis hastae
Submotum longa voces audire vetarunt.

Magnum illum tamen adspexi, qui pascua late
Cuncta tenet, cunctumque orbis regit omnis ovile;
Cui pecudes parere ferunt, pecudumque magistros.
At quanto incessit perfusus lumine frontem,
Quem se se ore ferens! Scires, pia numina terris
Daphnidis hunc posuisse loco; tantum instar in
ipso est.

Sed jam vesper erat, cum centum explosa repente
Aera tonant, magnisque lacescunt ictibus auras,
Undique et omnigenas turris vomit ardua flammæ.
Ut ruit in campos densissimus æthere nimbus,
Ut juga cōniferae cingunt montana cupressi;
Ut subito exstructis saliant de fontibus undæ,
Sic ego vidi ignes; tum longo limite sulcos
Surgere flammarum, et stellas fluere inde cadentes.
Quin etiam coelo, si quidquam credis, aperto
Vidimus ignitos, ut in aequora, ludere pisces,
Et trepidam huc illuc agitare per æra candam.
Quos tibi si, Lycida, tua fata videre dedissent,
Forsitan in superos jecisses retia campos.

Quid loquar, ut cunctis exinde urbs tota diebus
Thure vaporatas, precibusque incenderit aras
Daphnidis, et sacros templo celebravit honores?
Nec requievit enim; donec tandem extulit ortus
Nona aurora suos, radiisque retexit olympum.
Quid tamen exiguis juvat hæc tenuare camoenis?
Tu potius tantis ut plausibus adsonet aequor,
Quaque licet, dominam referant tua littora Romam,
Incipe, si quid habes, et Daphin concava portus,

Pulsati Daphnin repetant per caerula fluctus.

Incipe : piscator meruit sibi talia Daphnis.

Lyc. Immo haec, quae Latias properavi nuper ad undas,

Quaeque meus legit, neque spernere visus, Amyntas,
Incipiam : modo tu, Celadon, tua carmina nobis
(Nam pavit quoque Daphnis oves) meliora rependas.

Cel. Tecum equidem non unquam ausim certare canendo.

Quid tamen et nostrae possint in Daphnide musae
Experiar : sed tu meditados incipe versus ;
Incipe ; quando acres nullus mulcere procellas
Lenior, et motos cantu componere fluctus.

Lyc. Vellite ab invitis nodosa corallia saxis,
Ostreaque, et toto conchas perquirite ponto,
Nereides ; dignum non unquam Daphnide munus
Illius ad tumulum, sacrasque feretis ad aras.

Tollite ad astra bonum, mea carmina, tollite
Daphnin.

Dum traheret pisces, dumque aurum piscis in ore
Solveret inventum, fortasse haec dona decebant.
Postquam illum jussit summi Reguator olympi.

Littus ad aeternum potiores ducere praedas,
Gemmiferas, Divae, spoliatis oportet arenas.

Tollite ad astra bonum, mea carmina, tollite
Daphnin.

Sed quid ego haec autem neptunia numina posco ?
Fabula jam Nereus, Panopeque, et candida Drymo,
Fabula Cymothoe ; sed non et fabula Daphnis.
Ille hominum miserâ tenebras de mente fugavit,
Compulit et vanos toto orbe facessere divos.

Tollite ad astra bonum, mea carmina, tollite
Daphnin.

Ille novus pelago Deus additus ; Ille tuetur
Aetherios postes, terris Ille imperat inis.
Subdidit et parvâ circum maria omnia cymbâ ;
Atque unus tria regna sacris moderatur habenis.

Tollite ad astra bonum, mea carmina, tollite
Daphnin.

Daphni, tuam cunctas victricia vela per undas
Explicuisse ratem, Poeni, Ammericique loquantur,

Horridus Arctoâ loquitur piscator in actâ,
Atque Arabes, Persaeque, atque extremi Garamantes.

Tollite ad astra bonum, mea carmina, tollite
Daphnin.

Itæ sacrae puppes, et sceptrum Daphinis omnes,
Si qua super non nota manent, portendite in oras.
Nec signorum obitus posthac servate, vel ortus.
Ecce novum coelo processit Daphnidis astrum,
Aequore jactatis melior cinosura carinis.

Tollite ad astra bonum, mea carmina, tollite
Daphnin.

Ast ego ubi cineres felix legit ara sepultos,
Quatuor et magnæ sinuoso ex aere columnæ
Aurea fulgentis sustentant culmina tecti,
Igne sacro, et plenâ thuris venerabor acerrâ.
Votaque semper erunt, et cum tentabimus aequor,
Et cum servatas referemus ab aequore puppes.

Tollite ad astra bonum, mea carmina, tollite
Daphnin.

Tu tamen ætherei servas qui limina portus,
Sis pius ol bone Daphni, tuis: bella (aspice) venti
Dira movent, coecasque occultant marmora cautes.
Da faciles auras, et cursum, Daphni, secunda.

Tollite ad astra bonum, mea carmina, tollite
Daphnin.

Fallimur? et coeli Daphnis de parte serenâ
Intonuit laevum? non fallimur: auribus hausi
Ipse sonum; nec semper amans sibi somnia fingit.

Sensit ab axe bonus, mea sensit carmina, Daphnis.
Cel. Grande sonas, Lycida, nec ab alto murmura
malim

Labentûm fluviorum, aut cum per caerula cauri
Praelia saeva gerunt, fremitus audire marinos.
Fortunate Senex! jam te non magnus Aretas,
Non ingens Oritus vincat; nec, quis fuit ille?
Quem cecinisse olim resonantibus omnia sylvis
Nescio quam dicunt Auroram, arcumque bibentem;
Nos tamen et contra nostra hæc quaecumque canemus.
Et mihi si nostræ cedunt in carmine musæ,
Non animis etiam celebrando in Daphnide cedent.

Lyc. An quidquam nobis cantu sit gratius isto?
Et te Pierides vatem fecere, neque ulla

Dulcior arcadiis resonat jam fistula sylvis.

Cel. Quas mihi nunc rupes, montesque recluditis
altos,

Aonides? quae grandiloquae mihi munera voc's
Phoebe pater, quas tu insuetas in carmina vires
Sufficies nunc, Phoebe, quibus sublimior agris
Tollar, et attritae spernens rude murmur avenae.
Incipiam dignos meditari Daphnide cantus?

Despice bucolicos, mea fistula, despice versus.
Nos mortale pecus miserae per pascua terrae
Ducimus, aut pecori fragiles apponimus herbas,
At gregis aeterni felix custodia Daphnis
Longe alias et noscit oves, et noscitur illis.

Despice bucolicos, mea fistula, despice versus.
Ilas non Dametas olli; non tradidit Egon,
Non opulentus agris, et abundans lacte Menalcas;
Ipse sed in terras demissus ab axe Theander
Pasce meas, dixit, sacris in montibus agnas,
Pasce, tuumque mihi sic, Daphni, probabis amorem.

Despice bucolicos, mea fistula, despice versus.
Perge pecus felix procedere; nunc bene gramen
Carpitur: innocuos Daphnis tibi praestitit agros;
Praestitit et tutas sinceri fluminis undas.
Pocula jam serpens non inficit ulla veneno,
Nec cythis inter livent aconita salubres.

Despice bucolicos, mea fistula, despice versus.
Huc, huc o cunctae properate ex orbe capellae:
Nulla salus aliis, ne quis vos fallat, in agris.
Pascua namque, bonus, quae non tenet, extera,
Daphnis.

Omnia virus habent; omni latet anguis in herba.

Despice bucolicos, mea fistula, despice versus.
Nullaque vana suae praetendat nomina culpaе,
Causeturque sacras se non dignoscere caulās.
Qualiter aërio se se dat clara videndam
Urbs imposta iugo, cunctis spectabile terris
Daphnidis aeternum sic se alte ostendit ovile.

Despice bucolicos, mea fistula, despice versus.
Nec metus, exhaustis unquam ne foetibus omnis
Deficiat soboles, et inania prata relinquant,
Sed licet ut coelum semper vaga sydera pascet,

Semper ut aequoreas decurrent flumina in undas;
 Daphni, tuae sic semper oves, et rura manebunt,
 Damna nec interitus unquam sensura, nec aevi.

Despice bucolicos, mea fistula, despice versus.
 Ergo quid immites orci de faucibus ursi,
 Quidve lupi, obscuris huc tot properatis ab antris?
 Frustra eritis: sancto, Daphnis quod servat, ovili
 Ulla nec Eumenidum poterit vis saeva nocere,
 Quotquot et infernae fundant monstra horrida portae.

Despice bucolicos, mea fistula, despice versus.
 Quid miser adspicio? mille, heu! per vulnera Daphnis,
 Ut tutetur oves, vitam cum sanguine fundit.
 Macte tamen pulchro, Pastor macte optime, letho.
 Non ovibus poteras majus dare pignus amoris;
 Nec vitâ solum aequiparas, sed morte Magistrum.

Despice bucolicos, mea fistula, despice versus.
 At nunc post vitae tantos, obitusque labores
 Sub pedibus solisque vias, atque aurea Daphnis
 Astra videt; foribusque alti praefectus ovilis
 Divûm ad septa vocat terris ex omnibus agnas;
 Atque intro meliore haedos compellit hybisco.

Despice bucolicos, mea fistula, despice versus.
 Quid volui demens? majoraque viribus ausus
 Magna Deûm parvis tenuavi facta cicutis?
 Non mihi si calamos det Tytirus ipse sonantes,
 Queis cecinit dignas romano consule sylvas,
 Daphni, tuas possem laudes aequare canendo.

Rursus ad agrestes redeas, mea fistula, versus.

Lyc. Et tu non mecum audebas contendere cantu?
 O nimium, Celadon, o de te injusta locute.
 Pieridas superant nostras tua carmina tantum,
 Quantum ululas Cycni, quantum Philomela cicadas.

Cel. Has in te potius, Lycida, convertere laudes
 Me decet; Ausoniâ quando te Phoebus in omni
 Rectorem vatum, et cantus dedit esse parentem.
 Sed jam, age, surgamus: verso nam pronus olympo
 Me vocat ad caulas, te jacta ad retia vesper;
 Et celeris volat hora, neque audit tempus habere pas.

CAROLI ROTH.

DE SANCTO ALOYSIO GONZAGA.

IDYLLION.

—

Saepe Dionaeis Gonzagam incessere telis
 Nequicquam expertus Veneris puer, aeger, et amens
 Errabat, luctuque animum pascebat amaro.
 Olli non curae lascivum fingere crinem,
 Non myrto vincire caput; prope lapsa trahebat
 Spiculaque, pharetramque humeris: utque ales iniquo
 Imbre gravis, pressis ibat demissior alis.
 Tum primum Nymphae in silvis, et Oreades altis
 Montibus Arcadiae puerum risere petulcos
 Dejicentem oculos, incedentemque modeste.
 Nec minus aequalis fratrum, lascivaque Amorum
 Huc illuc manus assultans, occursat eunti,
 Moliturque moras, et pulvere conserit alas.
 At Venus, ut vidit moestum, horrentemque capillos,
 Implentemque sinum lacrymis, aggressa jacentem,
 Parce, puer, dixit lacrymis, exporrigere frontem;
 Neu tantum moerere velis, quae causa serenos
 Faedarit vultus, animumque absorbeat aestu,
 Nota mihi: Mene incapto desistere victum?
 Nec posse unius transfigere pectus Ephebi?
 Qui quondam in silvis, interque horrentia claustra
 Nestoreis illusi annis, iucanaque menta
 Silvicolam sed enim, modo fidae dicta parentis
 Nate, velis audire, viam qua denique vincas,
 Ostendam. Puerum telis, ne nescius erres,
 Iocassumque iterum pugnes, incessere noli.
 Namque illum intacti servatrix Diva pudoris,
 (Heu caput invisum Veneri! qua praelia mecum

Vi gerat, et quoties nos fregerit improba, nosti.)
 Haec igitur, vitae primas ubi venit in auras
 Exceptum gremio fovit, mentitaque vultum
 Nutricis, falsasque ostentans vertice vittas,
 Multa manu miscet, Puerique potentibus undis
 Membra lavans ullis fecit non pervia telis.
 Ergo illum inmisit frustra aggressure sagittis
 Diversa grassare via: sepone pharetram,
 Spiculaque illa, puer: non omnes omnia vincunt,
 Insidiisque aliis captemus oportet,
 Si nos digna manet speratae gloria palmae.
 Ergo age deposita pharetra paulisper, et arcu
 Opportuna magis cape retia (retia coram
 Explicat, ostentatque leves imitantia nubes)
 Eque meis, addit, (noli sprevisse) capillis
 Facta vides: feci ipsa manu, longique laboris
 Taedia sustinui: nec poenitet: utere laetus
 Matris Acidaliae donis: his instrue dextram,
 His venare, puer: certa est victoria: vidi
 Retibus haerentem, qui spicula fugit Amoris.
 Dixerat, et nato lacrymas siccavit abortas,
 Permulsitque manu pennas, atque oscula fixit.
 Explicuit frontem, laetasque procacius alas
 Jam non tristis Amor: manibus vaga retia torquet
 Exsultans, fraudique accommoda tempora captat.
 Nox erat, et serae puerilia pensa Minervae
 Reddiderat; studiisque animum Gonzaga remittens,
 Aequales inter ludo certabat ephebos,
 Cui secus innocui succederet alea Martis
 Ertandoque minor discederet, ille superbi
 Hostis ad arbitrium penas de more ferebat.
 Victus eras Gonzaga: Ter oscula protinus illi,
 Victor ait, desige umbrae: projecerat umbram
 Parietem in adversum roseo virguncula vultu.
 Risit Amor: plaudensque alas, nunc retia tempus
 Tendere, ait: retis non aspectabile textum
 Explicat, et media furtim disponit in umbra,
 Inseditque locum: tum ne quid fraudis omittat,
 Interea fundo conversae e pyxidis imo
 Incestas aspergit opes: collegerat illuc
 Narcissi lacrymas, illuc suspiria Thisbes,

Immistumque cruore illuc morientis Elisae
 Fletum infelicem : diversorumque furorum
 Seminaque, causasque, et quidquid fletis amantes.
 At Gonzaga ; doli quamvis ignarus, et artis
 Tartareae ; trepidare animo, incertusque morari,
 Quid faciat ? praestetne, umbram libare puellae,
 Aut magis abnuere imperium, legesque superbi
 Victoris ? Sancti praeses Dea casta pudoris
 Dilecti capitis sensit discrimen et ora
 Ora, habitumque tuae simulans, Gonzaga, parentis
 Quid meus, o, cunctaris, ait, nec jussa facessis
 Victoris ? nempe illa procul deformis imago
 Apparens, oculos terret, gressumque moratur.
 Verum age, et ut possis certis discernere signis,
 Num quae justa tibi tanti sit causa timoris,
 Hanc cape crystallum : caelesti purior astro
 Lucebat, dignamque Dea cognoscere posses.
 Vix dum illam adversae Gonzaga objecerat umbrae,
 Quum subito occulti patefacta Cupidinis arma
 Fallentesque plagae, laqueique, nigrumque venenum
 Ostensum, caecam quo tinxerat improbus umbram
 Exspuit ; avertitque oculos : ac ocyor Euro
 Proripiens se se caecis penetralibus abdit.
 Macte fuga generose Puer ! molire triumphos,
 Aligerosque ad frena voces : viden ? ora Cupido
 Verberat infrendens, indignaturque dolosas
 Nil valuisse artes : at vultu Diva sereno
 Gratatur ; dextraque tibi, quae nunc quoque praefers,
 Lilia dat gestare, nives vincentia primas.

FRANCISCI CONTOLI.

LYSIAE PASTORIS DE EXCIDIO SOLYMAEO.

LAMENTATIO.

Emenso Phoebus jam decedebat olympos,
 Suspensumque jugo referebat taurus aratrum,
 Cum viridi in prato terebinthum subter opacam
 Ingenti Lysias confossus corda dolore,
 Idem pastorum Lysias, pecudumque magister,
 Talia jactabat resonantibus undique sylvis.

Accelera o magni lux splendentissima mundi
 Sol rerum pater, occiduo caput obrue fluctu;
 Et reditus aurora novos cum sedula poscet,
 Abnue depulsis terras lustrare tenebris;
 Aut procul a nobis currus averte nitentes:
 Aeternam praestat dulci sine lumine noctem
 Ducere, quam tantos patriae spectare labores;

Obrue, Sol, caput occiduo celer obrue fluctu.

O Solyme, o Superum quondam dilecta Parenti
 Urbs alias inter tanto praestantior urbes,
 Purpureis quantum cedit saliunca rosetis!
 O virgo Isacidum eximio laudata decore,
 Quam mille ardebant pastores, et sibi quisque
 Optabat, castum licuit dum jungere foedus!
 Quis Deus, aut quae te duri inclementia fati
 Impellit miseram tam diros volvere casus,
 Obsessamque pati gentis fera bella cruentae?

Obrue, Sol, caput occiduo celer obrue fluctu.

Non tot sub brumae glacialis tempora prima,
 Undique devectis cum squallent frugibus arva,
 Lapsa cadunt folia, et sylvae sternuntur opacae,

Millia quot Latiis venerunt agmina ab oris
Isacidûm campos populari, avertere praedam,
Et longe captos servitum abducere cives.

Obrue, Sol, caput occiduo celer obrue fluctu.

Quid miser, heul faciam tanto in discrimine rerum?
Quae mihi spes superest, aut quae via certa salutis?
Circumstant acies dextrâ, laevâque latinae:
Agmine nulla caret pars, quamvis abdita, ruris:
Culmina montis habet pedibus vix obvia nostris,
Et nemora et valles, et prata virentia miles.
Non precibus, lacrymisque sinunt se barbara flecti
Corda, nec in nostros quaecumque paravimus usus.
Diripuisse sat est: districtis corpora telis
(Horrendum dictu!) invadunt, et spargere certant
Agrestes dirâ miserorum caede penates.

Obrue, Sol, caput occiduo celer obrue fluctu.

Saepe pater mihi consilio maturus et annis,
Dum teneros ovium foetus deferret ad urbem,
Debita qui caderent placandis hostia divis,
Cuncta animo recolens veterum praesagia vatum
Obscuros memini jam tum praedicere casus.
Namque cauebat, uti nullo mitissima cultu
Ferret humus germen, ramis felicibus olim
Quod tegeret late populos, bona si modo noscent
Tuuc sua, nec fatis obstarent forte paratis.
His quoque Judaeam regali stirpe Puellam
Nescio quam addebat, nullos quae passa viriles
Attactus pareret, casti nec damna pudoris
Ulla subire queat, praeclarum matris honorem
Virginitate pari servans, jurataque pacta.
Nec minus indignâ narrabat caede necandum
Agnum, qui moriens veteris contagia culpae
Dilueret, longâ solvens forinidine terras:
Pro qua caede tamen Solymeae civibus urbis
Impendere graves referebat Numinis iras.
Haec mihi commemorans verba inter singula multas
Fundebat senior lacrymas, dextrâque prehensâ,
Heu! quos, Nate, inquit, nobis actate superstes
Casus, quae saevae spectabis funera gentis?
Evenere: Deus veteri jam fraena relaxat
Irae, et nos fato perituri urgemur acerbo.

Obrue, Sol, caput occiduo celer obrue fluctu.

Quid juvat ætatis laudes meminisse prioris,
 Virtutemque Patrum? teretis cum verbera fundao
 Torquens immani sternebat mole gigantes
 Pastor, et armato referens ex hoste triumphos
 Otia reddebat campis, et pulsa trementi
 Corda metu exhilarans pacem sperare jubebat.
 Tempestate illâ mentemque animumque benignum
 Ostentans Deus, Isacidûm res ipse fovebat,
 Pollicitique memor pactum servabat amorem:
 Nunc miseros ultro saevum mutatus in hostem
 Insequitur: tanti caussas sciet ille furoris.

Obrue, Sol, caput occiduo celer obrue fluctu.

Obrue, dicebat; subitum cum desuper imbrem
 Colligit adveniens nox: magno murmure coelum
 Miscetur late, et crebris micat ignibus æther;
 Effugit ille, cayum trepidusque recedit in antrum,

ANGELI TINELLII.

MAGDALENÆ FLORATUS.

ECLOGA.

Carmina Bethanicae referamus moesta Puellae,
 Carmina, quae quondam memores audita notarunt
 Cimberius simul et Liscus, piscator uterque,
 Qua velox Rhodanus se lata per ostia fundit;
 Massiliaeque procul fruticosa cacumina montes
 Ostentant pelago: piscosis scilicet illis
 Littoribus soliti peragrarè, ac tendere nassas:
 Quin etiam experti, vicina ubi stagna redundant
 Mugilibus, quos ut capias, nil retia prosunt:
 Per vada nam fugiunt in apertum, voce vocati
 Ni magna, adversum properent delphines ab alto
 Ad praedam socii, capturae et fercula ovantes.

Illi sub tacita peterent dum nocte propinqua
 Oppida laturi contexto in vimine pisces,
 Intervalla viae vario sermone levabant:
 Nuper Idumeis rate parva e finibus illa
 Ad freta cum redivivo advectas fratre sorores,
 Quos odia exegere superstitiosa suorum:
 Et ritus docuisse novos, unde aurea surgit
 Religio, atque huic tam multas se adjungere gentes,
 Quam multas zephyrus conchas ad littora cogit,
 Sanguineis vernat quot lotos aquatica baccis.

Talia dum memorant, non longe apparuit illis
 Rupe sub aëria vasto spelunca recessu,
 Fons ubi per vepres praeruptaque saxa volutus
 Murmure raucisono nocturna silentia rumpit.
 Ecce autem ex antro species veneranda puellae

Prodire aspicitur vultu radiante per umbras,
 Squallidula veste, ac longis per colla capillis,
 Confecta illuvie macieque: sed omnis ab illa
 Non tamen abscessit rari sua forma decoris.
 Haec Magdalis erat, quae dudum huc advena solis
 (Ut fama) in specubus vitam luctuque trahebat.
 Tunc illa ardentes oculos ad sidera tendens,
 Anxia praeiebat dulci suspiria cantu.

O divine, inquit, mea lux, mea vita Magister,
 Heu quibus in terris, qua te regione revisam
 E nostris ereptum oculis, postquam astra petisti?
 At licet absentem, te certe semper amabo,
 Nec minus os oculosque tuos ac verba recordor,
 Quando me tua complexam vestigia pacis
 Foedere donasti commissa piacula solvens:
 Imo etiam nostrum non dedignatus amorem
 Bethanicas hospes subiisti saepius aedes;
 Voce potens animam fratris revocare sepulchro.
 Me quoque ut electa meliori parte probasti,
 Dum recolô, quae me coelesti affabilis ore,
 Quaeque alias cymbae insiliens matresque virosque
 Collectum aprica docuisti vulgus in acta.
 Mox in olivifero nocturnis colle tenebris
 Quod sibi non licuit tristissimo adesse Magistro,
 Illa dolet, guttasque abstergere fronte cruentas;
 Sedula quae melius vigilasset opemque tulisset,
 Quam fusi per humum comites somnoque sepulti:
 Dum morti ac manibus non inscius ille furentum
 Perfidia ac scelere obicitur venalis alumni.
 Hinc visu lacrymanda refert spectacula, ut illum
 Viderit exedra ostensum Praetoris ab aita,
 Viderit ipsa suis oculis immania passum
 Verbera, et ulceribus lacerum, et ludibria vestis
 Purpureae, et genus heu cruciatus! tempora dumis
 Saucia confixis: tamen illi extrema precatur,
 Instigante astu procerum, senibusque maligna
 Supplicia acclamans ingrati turba popelli.
 Nescia tam misero adspectu mansuescere corda.
 Post haec immeritam ad mortem comitatur euntem
 Durum humeris truncum necis instrumenta trahentis
 Saepius ad saxa offensum, genibusque labantem,

Foemineos inter gemitus , quos inter et ipsa
 Alma Parens, sed enim certo quae numine nosset
 Id fieri, invicto premit altum corde dolorem ,
 Spectatura sui crudelia funera Nati.

Inde animo visam sublimi in imagine pugnam
 Narrat difficilesque obitus , quando ille laborat
 Infando affixus ligno: mirabilel vitam
 Protegere augustam visa est Aphtarsia Diva ,
 Ore vicens juvenili , aeterno haerentibus alis
 Nexu elata ab humo , viridi pulcherrima veste
 Aurea perpetuo contexta monilia circlo ,
 Purpureisque gerens sertum immortale amaranti.
 At contra coelestis Amor stellante corona ,
 Armiger adstabat cui strenuus ales, aperto
 Dilectos pascens pelicanus pectore natos ,
 Ardebat culpas populi ferale merentis
 Exitium, Juvenis Divini morte piare.
 Tela hujus crebrosque ictus Dea nescia mortis
 Fatalem clypei opponens adamanta retundit.
 Quum Superi horrerent, tenebrisque ac motibus orbis
 Concussus validis tremeret certamine longo
 Exsuperat tandem vis omnipotentis Amoris ,
 Qui sacrum in corpus coniecta cuspide , summus
 Immortale Patri caput immolat , atque ita fatur :
 En Amor hanc animam luctantem corpore solvo.
 Talia Cimberio , Liscoque stupentibus, illa
 Dum meminit plorans , aurora in vertice montis
 Incipit , ac longe tremulo illucescere ponto.
 Compressit vocem ac gelido se reddidit antro.

VINCENTII FUGÆ

ECLOGA I.

MENSIS MAJUS MARIE VIRGINI DICATUS.

CORYDON, MELIBOEUS.

Cor. **D**ic mihi (nam Phoebus nondum duodena
peregīt

Signa poli, patriis ex quo depulsus ab oris
Hec miser exiguo pectori nova pabula quaero)
Quid tantum, Meliboe, nemus collesque propinqui
Pastorum insueto respondent undique cantu?
Num vos quandoquidem Majae venere calendae,
Formosae haec laetos Florae celebratis honores,
Felicemque agris, pecorique exposcitis annum?
Cui properat Nymphae, quos undique rustica nuper
Carpebat pubes, in sarta nitentia flores?

Mel. O Corydon, dulces cantus, quibus assonat
aether,

Et nuper vario contextas flore corollas
Non florum matri pastorum turba paramus,
Nec cuidam ex Nymphis, quales errare videmus
Per lucos passim, aut fluviorum emergere fundo.
Nympha alia, aut Diva his potius celebratur in oris,
Omnis cui tantum concedat Nympha decore,
Quantum rivus aquae Tiberini fluminis undae,
Cum superat ripas hiemalibus imbribus auctus.
Nec solum Majis resonant huic festa calendis

Carmina: sed donec mensis laetissimus anni
Florescet, pubem hanc nova texere sarta juvabit,
Tollere et ad caelum Nymphae immortalis honores.

Cor. Quid tantae, Meliboeae, mihi quoque nomina
Nymphae

Non pandis, cur et tam longo tempore, et isto
Praecipue tantos illi tribuatis honores?

Ipse etiam Nymphae, norim modo, sarta pararem,
Illius et nostra haec caneret quoque fistula laudes.

Mel. Parthenis est nomen Nymphae, qua dignior
unquam

Nulla fuit, nostros cui consecremus amores:
Utpote quae superis quondam divinitus auris
Afflata, aeternam, Virgo, sub luminis oras
Ediderit prolem, per quam pastoribus atras
Cocytii ripas, dabiturque evadere Avernii
Squalentemque lacum atque arduos sulphure cam-
pos;

Tum superos sperare agros, et rura beata.
Insuper hoc quodcumque boni speramus agrestes
Parthenis id sperare jubet. Bona Parthenis agris
Dat gravidas segetes, laetis dat gramina pratis,
Pabula dat pecori, teneris lac sufficit agnis.
Demittit caelo pluvias, et nubila pellit.

Ergo inter menses, qui formosissimus anni est,
Hunc illi merito pastorum turba dicamus,
Illi quae Nymphas inter dignissima cultu est.

Cor. Quae rupes, Meliboeae, cavis quae in montibus
antra,

Aut quae desertis habitans in vallibus Echo
Parthenidis famam ignorent, atque inclyta facta?
A primis et ego suevi pueriliter annis
Hanc colere ante omnes, et parva huic munera ferre:
Hunc tantum haud noram vos inter qui viget usus.
Sed novisse juvat; patriosque revisere fines
Si misero annuerint superi, collesque beatos,
Hunc morem instituam, et quoties caput efferet
arvis

Florifer omnigenos effundens Majus odores
Parthenidi toties sollemnia sacra novabo.

Mel. Quin age, et hinc placitum, Corydon,
mecum incipe morem.

Incipe Parthenidis modo tollere carmine laudes,
Quandoquidem dulci invitat nos murmure rivus,
Et praebet quercus patulas cantantibus umbras.

Cor. En adsum: voces cantu modo flectere suetus
Incipias, Meliboeë, prior: tua carmina nostras
Iam pridem resides acuent ad carmina musas.

Mel. Incipiam: modo cantanti mihi Parthenis adsit.
Irrigui fontes, et qui per gramina serpis,
Rivule, Parthenidem canimus. Dum cantibus illam
Tollimus, undarum quaeso compescite murmur.

Cor. Auræ, quæ circum strepitis plaudentibus
 alis,

Carmina Parthenidi sacramus, versibus illam
Dum colimus, vestros quaeso cohibete susurros.

Mel. Qualis puniceis invecta aurora quadrigis
Exoritur, camposque et prata virentia late
Mane novo roris caelesti munere ditat,
Talis virgineo prodit se Parthenis ore.

Col. Qualis fulgenti vectus super aethera curru
Auricomus Titan ridenti in luce coruscat,
Purpureoque imas convestit lumine terras,
Talis virgineae resplendet gratia frontis.

Mel. Vicinis redolet myrtus gratissima in hortis;
Majores sed Virgo Parens diffundit odores.

Cor. Suave rubet laetis rosa formosissima campis,
Suavius at Virgo suffunditur ora rubore.

Mel. Dulce sonant grato labentes murmure fontes;
Dulcius at resonant nobis tua nomina, Virgo.

Cor. Dulce sonant quas ingeminat Philomela
 querelas;

Dulcius at laudes mulcent mihi Virginis aures.

Mel. Laeta rosas Jericus, Sion dat clara cupressus,
Jactant proceras Libani juga frondea cedros:
Lilia Virgo cupit: cupiet dum lilia Virgo,
Despiciamque rosas, et odoro cortice cedros.

Cor. Sublimes Reges turres, laqueataque cives
Auro tecta colunt, miratur marmora vulgus:
Parthenidi dum simplicitas, et rura placebunt,
Despiciam regum turres, laqueataque tecta.

Mel. Carpite certatim pecudes laetissima campi
Gramina: dum rura haec defendet Parthenis,
 herbae

Nec vobis, nec deficiet lac mollibus agnis.

Cor. Pastores gaudete: polo dum Parthenis alto
Vos bona defendet, scabies non dira nocebit,
Nec rabidus teneris lupus insidiabitur agnis.

Mel. Desine plura, puer, jam se demergit in undis
Phoebus, et obscuro consurgit vesper olympo.
Ad caulas pecudes saturas jam ducere tempus;
Cras quoque, ni refugis, tete arboris hujus ad
umbram

Exspecto: plura heic fors et meliora canemus.

ECLOGA II.

IN FESTO S. ALOISII DIE.

CORYDON, TITYRUS.

Cor. Tityre, quid patrii celeres Anienis ad undas
Lentus agis, nec sublimes adscendere ad arces
Tiburis ulla movet te cura, ut visere pompam
Tu quoque in urbe velis, qua splendent Daphnidis
arae?

Quid segnis tumulto ex isto, dum gramina tondent,
Cernis oves, viridique moraris in aggere ripae?

Tit. Immeritum dictis, Corydon, me carpis amaris,
Segnitiumque mihi temere objicis. Ipse superno,
Ipse puer Daphnis qui me despectat olympo,
Novit quam multo ardebat mihi pectus amore,
Ut possem tutas alio custode per herbas
Linquere oves, urbemque adscendere, Daphnidis
aras,

Magnaue visurus sacrae spectacula pompae:
Sed vetuit precibus non exorabilis ullis
Dura parens; dixitque, puer, cave, Tiburis arces
Adscendas; cave te populo immiscere frequenti

Sic temere; nolo te in tanta pericula mitti:
Quid faceres, Corydon, talis tibi si quoque mater
Esset, et ex hoc te campo discedere nollet?

Cor. Non ego te arguerim servantem jussa parentis,
Nec matrem nato quaecunque adversa timentem.
Verum age, quandoquidem meritos tibi reddere
honores

Divino haud licuit juveni; nec fervida cordis
Ardentis, dextra sacras revolutus ad aras
Lilia protendens, potuisti expromere vota;
Illius egregios mores, atque inclyta facta
Ne saltem pigeat dulcis modulamine cantus
Tollere, et e collo pendentem inflare cicutam.

Tit. En ultro incipiam, tu deinde sequare;
canamus,

Si placet, alternis: cupiunt alterna Camoenae.
Quamvis stellantis teneat jam limina caeli,
Daphnis, et aeterni saturetur nectaris haustu;
Ille tamen nostro celebrari carmine gaudet.

Cor. Quamvis siderei sedeat jam vertice olympi
Daphnis, et ambrosiae roseo bibat ore liquores,
Pastorum curas oculis tamen adspicit aequis.

Tit. O mihi si caelo tantum delapsus adesset
Daphnis, ut ardentis recrearer lumine vultus!

Cor. O mihi si volucris liceat super aethera curru
Scandere, ut augustae contempler frontis honores!

Tit. Ante oculos juvenem, quum me sopor altus
haberet,

Ipse ego conspexi, bene olenti candida fronde
Lilia gestantem, niveaque in veste nitentem.

Cor. Vidi ego, dum prima captarem nocte quietem,
Purpurea juvenem praecinctum veste, coronam
Gestare, atque novam dextra protendere palmam.

Tit. Pallentes violae surgunt per opaca locorum,
Et rosa Pestanis gaudet concrescere in hortis.
Lilia Daphnis amat: dum lilia Daphnis amabit,
Despiciam violas, biferique rosaria Pesti.

Cor. Moenia magnifici gaudent sublimia cives
Incolere, et celsis surgentes turribus urbes.
Daphnis amat silvas: dum silvas Daphnis amabit,
Despiciam tures, et celsas moenibus urbes.

Tit. Si bonus hos campos defendet Daphnis ab
alto

Aethere, quis possit timuisse mapalibus ignes?
Non illum ignis edax est ausus tangere, somnum
Dum capit, et stramen flamma crepitante cremaret.

Cor. Quis timeat campis, adsit modo Daphnis,
aquarum

Diluvium, nimio quum crescit flumen ab imbre?
Illum inter fluctus lapsum, famulantibus undis
Incolumem flava exposuit Ticinus arena.

Tit. Ne seges eludat messem fallacibus herbis;
Magna sed in magno veniat tritura calore
Tu facies, vacuas reple qui frugibus arcas.

Cor. Tu qui testa oleo facis ut crescente redundet,
Flatus ventorum tumidos cohibebis et imbres,
Ne baccae viridis putrescant semper olivae.

Tit. Desine: jam Phoebus medio successit olympos
Igneus, et querulae rumpunt nemora alta cicadae.
Arent prata, caput lassoque papavera collo
Demisere: umbras pecori jam quaerere tempus.

ECLOGA III.

PARTHENIS.

Partheniae Musae, quae fortunata tenetis
Arva Palestinae, dulces quando ordine laudes
Dicere Jessaeae et sublimia facta puellae
Suadet amor, faciles precor adspirate canenti,
Et dignum tanta concedite Virgine carmen.
Tuque adeo, ante omnes summus quam diligit
unam

Rex superum, trepidum tanto sub pondere vatem
Alma regas, pedibusque adsis, o Diva, secundis,
Inter Idumaeos quis nescit Pastor Amyntam?
Parthenidis casto flagrantem pectus amore,
Et doctum calamis deducere carmina Amyntam?

Saepe illum patrios mulcentem cantibus agros,
 Parthenidemque cavas rupes resonare docentem
 Audivere olim Lycidas et pulcher Jolas,
 Ducebant ut forte pecus Jordanis ad undas.
 Dumque novis vacuas implet concentibus auras
 Coniferae nutant silvae, sua flamina venti
 Compescunt, liquidas pecus obliviscitur undas.
 Nam canit, ut, dulces quum nondum luminis
 auras

Parthenis hausisset, nondumque immania brutae
 Pondera telluris librasset in aere mundi
 Conditor, ex nihilo lucem, solemque creanti
 Haereret tamen illa Deo, et componeret orbem.
 Ipse Deus maria et terras caelumque profundum,
 Sidereasque faces et clari lumina solis
 Educens, oculos gaudens figebat in illa.
 Tum memorat comitata choris ut mille per auras
 Aligerum formosa anima ad nova munia vitae
 Venerit, et purae in ventrem se immiserit Annae
 Purior ipsa: hominum fortunatissima quando
 Communem labem, et colubri fatale venenum
 Vitavit, stygiiue ausus compescuit hostis.
 Nascere Diva, tuoque aegris mortalibus ortu
 Affer opem, culpas et primae dilue matris.
 Te tellus cupit impatiens; tibi ab ubere fructus
 Submittitque sinu, et laetos effundit odores;
 Adventuque tuo laetantur et aequora ponti,
 Et nemora et fontes, et pictis nubibus aër.
 Illis addit, vix tres hiemes divina puella
 Permensa ut patriamque domum veteresque penates
 Liquerit, et dulci capta immortalis amore
 Numinis ad templi sese devoverit aras,
 Virgineum nullo non servatura pudorem
 Tempore, contactusque omnes osura viriles.
 Tum plectro graviore sonans connubia sancti
 Numinis aggreditur immortalesque Hymenaeos,
 Virgineiue uteri pondus mirabile narrat:
 Utque novem postquam Phoebe reparaverat orbes
 Divinos tandem partus (mirabile dictu)
 Ediderit, positusque Infans sub rupe jaceret,
 Mollibus haud sotos cunis, sed frigore saevo,

Sed gelida ventorum anima pulsatus et imbre.
 Hinc memorat lacrimas, atque alte vulnus adactum
 Parthenidi, primum octava sub luce cruorem
 Quum vidit nati; consolaturque dolentem,
 In templo Senior, quum fatis ora futuris
 Solvit: seu rediens sacris quum forte peractis
 E templo, amissum natum non repperit usquam;
 Et relegens iter omne, et longo fessa labore
 Nequicquam voces ad sidera jactat inanes.
 Ceu quum dilecta viduatur compare turtur,
 Aut qualis celsa queritur Philomela sub alno,
 Durus ubi implumem nido detraxit arator
 Progeniem: non illa petit jam pabula nota,
 Non gelidos curat fontes, sed robore celso
 Moesta sedens longis implet nemora alta querelis.
 Sed non hic lacrimis finis: majora dolenti
 Vulneraque et luctus restant in funere Nati.
 Jamque refert concussa gravi, non victa dolore
 Prolem ad supplicium ut mater comitatur euntem,
 Dilectam mater prolem: ut videt ipsa gementem,
 Lapsantemque gravi Natum sub pondere trunci;
 Viribus atque impar oneri succedere vellet.
 Crudelis frustra conanti plurima miles
 Increpitat genitrici, et longa summovet hasta.
 Heu quid agis miseranda Parens? quid moesta do-
 lentem
 Prosequeris Natum celsi ad crudelia montis
 Culmina? Qui poteris tantum perferre dolorem?
 Perdit te miseram pietas tua. Perfida clavos
 Turba parat: sonuere ictus, moribundaque Nati
 (Heu pietas!) duro pendent e robore membra.
 Jamque ipsas tangit rupes quoque funus acerbum,
 Illius et mortem deplorant saxa: dolorem
 Testaturque suum tellus magno excita motu,
 Nigrantique comas obnubens Phoebus amictu.
 Ah mater, jam non mater! quid vulnera nati
 Conspicis, exanimosque sinu complecteris artus!
 Vos matrum pia turba, hinc vos abducite matrem,
 Ne vitam dolor abrumpat, mortemque sub ipsam
 Dilaceret materna atrox praeecordia luctus.
 Tum lacrimis cessans, meliori et carmine adorsus

Parthenidis laetus memorat nova gaudia, quum mox!
 Ante oculos stantem claraque in veste nitentem
 Ipsa suam prolem videt, et notum decus oris
 Conspicit, et ductos audit de morte triumphos.
 Quid flammis flammis, adjectosque ignibus ignes
 Commemorem, quando caeli de parte serena
 Cum sonitu illabens orantem Spiritus illam
 Afflavit, totumque replevit numine pectus?
 Jamque novum molitus iter ridentis olympi
 Caelestes aperit valvas, vectamque per auras
 Parthenidem claro deducit in aethera curru.
 Nec silet, ut gemmis claroque educta pyropo
 Mœnia, chrysolithûmque urbem splendore coruscam
 Intranti, superûm chorus adsurrexit omnis;
 Utque illam caelestis Amor, Natusque, Paterque,
 Sidereo in solio, regnique in parte locarint,
 Unde homines, terrasque imas, pelagusque pro-
 fundum
 Ardua, despectatque ipsos supera alta tenentes.
 Quae dum cuncta canit, cursus compescit aquarum
 Jordanes, tacet aura, silent nemora avia, et alte
 Restituunt vocem cautes rupesque propinquae.

Bucolicorum Finis.

JESU · CHRISTO
SOSPITATORI
DEIPARÆ · QUE · VIRGINI
VARIORUM ELEGIAE
—
ELEGIACORUM LIBER I.

JO. JOVIANI PONTANI

AD CHRISTUM REDEMPTOREM

Annua jam redeunt patriis sollennia sacris,
 Et sauctum referunt tempora certa diem.
 Luce bona simul et pueri, innuptaeque puellae,
 Et simul assidua foemina virque prece,
 Sollennes celebrate aras, atque ore favete,
 Omnia et aeterno sint operata Deo.
 Prodeat in Tyria spectandus veste sacerdos,
 Et chorus ornatas prodeat ante fores,
 Velatique comas, albenti et tempora lino
 Decantent laudes, maxime Christe, tuas.
 Te sors dura hominum generis, te cura laborum,
 Immitem subiit mortis obire vicem.
 Dum trunco affixus, cuneo et trajectus aheno,
 Sensisti geminum vulnus utraque manu.
 Sensisti fixas ferrato stipite plantas,
 Horruit et capiti spina cruenta tuo,
 Et cava mortiferum senserunt ilia ferrum,
 Vulnere manavit lympa merumque tuo.
 Quumque sitim cuperes nostra sedare salute,
 Torpuit arenti fellis in ore sapor;
 Atque inter geminos crudeli sorte latrones
 Iudae pateris jurgia saevitiae.
 Donec desesso decedens spiritus ore
 Clamavit, quid me deseris alme Pater?
 Hinc manes, Stygiosque lacus, loca terra silentum,
 Infernique subis limina dura fori.
 Inde pias animas, et coelo digna secutas
 Eximis, et superum munera ad alta vocas.
 Tertia lux aderat, roseo quum lactus Eoo
 Surgis, mox victor sidera clara petis,

Consortemque capis patrio cum Numine curam,
 Dextra tenens, dextro conspicuusque loco.
 Hunc igitur precibusque piis studioque fideli
 Placemus, nostro det veniam sceleri:
 Det pacem; mala cuncta procul, morbosque famemque
 Pellat, et hostiles det superare manus.

DE CHRISTO.

Quod varios pelagi casus, coelique procellas
 Exsuperas, nanti quod data terra tibi est,
 Oceanique minas, et saeva pericula vincis,
 Ac sospes patrio redderis Eridano;
 Haec Pari non ars ipsa hominum, aut sollertia praestat,
 Non labor; at summi cura paterna Dei.
 Quantula enim nostra est industria? cede periclis,
 Cede mari, Christi ni pia dextra juvet.
 Ille regit nostros cursus, auramque ministrat,
 Sollicitaeque offert littora tuta rati.
 Quare age thure pio, flammisque liquentibus aras
 Ipse adole, et plena fumet acerra manu.
 Adstet conspicuus Tyrrhena in veste sacerdos,
 Et peragat patriis mystica sacra modis.
 Pax homini, tibi Christe decus, tibi gloria soli,
 Vera Dei proles, verus et ipse Deus.
 Te colimus, tibi divinos largimur honores.
 Et nomen felix ducimus esse tuum.
 Tu casus, tu damna levas, tibi munera terrae,
 Et tibi se fontes, se tibi debet aqua.
 His igitur placare Deum, superosque memento,
 Et tua cum pura solvere vota prece.
 Nil auro Divis opus est, sed mente fideque,
 Haec nos una homini copulat, illa Deo.

TITI STROZAE.

JESU CHRISTI DEI OPTIMI MAXIMI.

GENETHLIACON.

O nimium felix, vereque beata, nec ulli
 Pro meritis digno nox celebranda sono!
 Venturae quae mox aurorae praescia, quod fas
 Credere, tentasti lucis habere vicem
 Ne tantam audires, coram sed ut ipsa videres
 Virgineos partus, angelicosque choros.
 Sed licet absueris, inter praesepia nasci
 Cum magnus voluit Rex veniente die;
 Admiranda tamen coeli mysteria, totque
 Gaudia credibile est nota fuisse tibi.
 Lucifer astrorum fortunatissime, qui dum
 Caetera jam pulsa sidera nocte fugas,
 In statione manens quidquid gereretur olympo,
 Novisti, et terrae gloria quanta foret.
 Testis es, humanos Deus ut sibi sumserit artus,
 Sed non mortali semine factus homo,
 Et genibus positus asinumque boveinque repente
 Ante sacros Domini procubuisse pedes.
 Tu quoque pastorum felix manus, aethere ab alto
 Quaerere jussa humilis culmina parva casae.
 Matribus o Genetrix multum praelata beatiss,
 Atque parem nulla parte habitura tibi:
 Quis tibi digna dabit pro tali munera partu?
 Quis referat mentis gaudia magna tuae?
 Vix sacer in lucem completis venerat Iufans
 Mensibus; arrisit Virgo beata tibi,

At tu labe carens, supplex, expersque doloris,
 Continuo partus es venerata tuos,
 Et tibi, quo fatis praesentibus orta volente es:
 Lactandum omnipotens se dedit, alma, Puer,
 Tum veneranda gerens canentem ad pectora barbam
 Secum animo voluit quae videt acta senex,
 Divinique memor monitus te laetus adorat,
 Poplitibus flexis, progeniemque tuam;
 Et parcente manu teneros avidissimus artus
 Tangit, neve aliqua possit obesse cavet.
 Quis dubitet libasse illi mille oscula? nec se
 Dulcibus a lacrymis abstinuisse senem?
 Non hic Attalicis opibus fulgebat, et ostro,
 Sublimis Pario marmore nisa domus:
 Non auro paries geminisque nitebat Eois;
 Non Arabi thalamus plenus odoris erat:
 Non ullum mensae argentum, non stragula mollem
 Velabant Phrigio picta labore thorum.
 Juncus, et adgestae filices, et canna palustris,
 Felicis tuguri nobile tegmen orant.
 Rara sed et vento textura patebat, et imbri;
 Claudebat totum flexile vimen opus;
 At putris limi tunica circumdata sepes,
 Ponere jam veteres ceperat exuvias.
 Et crebras, oculis spectandum pervia, rimas
 Fecerat, hirsuto non satis apta gregi.
 Omnis inhaerebat paucis, rudibusque columnis,
 Quas faber haud multa finxerat arte, casa.
 Angulus haud ingens, rigidi quo straminis hospes
 Fasciculos paucos accumularat, erat.
 Hoc cibus, et lectus pecori fuit: hoc tibi Virgo,
 Substravit senior, composuitque thorum.
 Talibus in plumis coeli regina quievit;
 Nec tamen inde procul bos, et asellus erant.
 Hunc sibi nascenti rerumque, hominumque creator
 Contemptis opibus legerat ipse locum;
 Ut sacram expleret regio Bethlemica sortem,
 Fatidicis vatum nobilitata modis.
 Dumque simul studiis ingentibus ordine certo;
 Factori adstant cuncta elementa suo;

Purpurei veris tepidos acquasse calores,
 Hiernum solem, credere velle, pium est.
 Scilicet inimici ne frigore (namque ibi nullus
 Ignis erat) puero saeva noceret hiems.
 Quem Dea dum pannis involveret, omnibus illa
 Facta est apricis gratior ora locis.
 Credibile est volucres, ea dum mirantur ab alto,
 Alarum celerem sustinuisse fugam :
 Vicinasque truci sedata protinus ira
 Spectasse attonitas tot pia facta feras.
 Parva quidem. Stella praeunte, mapalia Reges
 Aeterni jussu tunc adiere patris.
 Atque sacrum oblato venerati munere Numen,
 Mutati facies obstupuerunt suas.
 Quos vitare mali sedes Herodis iniquas,
 Jussere ex alto somnia missa polo.
 In patriam laetos eadem quos stella reduxit,
 Atque alia tellus Iuda petita via est.
 Barbare, quid tunc tot puerorum millia ferro
 Occidi, hunc unum dum petis ipse iubes ?
 An quia pro nostro mortalia crimine membra
 Induit, et coeli venit ab arce sui,
 Creditur esse Deo minor, et violabilis ulli,
 Sponte sua terris donec abire velit ?
 Illic aliquid majus, quam quod mortalibus ullis
 Contigit, adsumtum jam semel, intus habet.
 Intus habet, quod non sit dimissurus, et idem
 Spiritus in Nato permanet atque Patre.
 Non puer hic gazisque tuis, regnoque potiri
 Vi cupit, inque tuum non parat arma caput.
 Hunc majora manent : ubi fundamenta salutis
 Iecerit humanae, crimina nostra luet :
 Atque docebit, uti purgata labe renasci
 Possit homo, et sancta faeda lavabit aqua,
 Inde novae gentes alios condiscere mores
 Admonitae incipient, et meliora sequi.
 Prisca superstitio, simulacraque vana Deorum,
 Hoc duce, firmata religione cadent,
 Sponte sua post haec se tristibus offeret aris
 Victima sacrilega percutienda manu.

Fulgida sidereis ardebunt lumina flammis :
 Adspectum nec qui perferat hujus, erit.
 Excusso manibus remo, cymbaque relictâ,
 Diffugiet pavidus per vada nigra Charon.
 Pandentur foribus pallentia regna revulsis,
 Praecipitem rapiunt agmina dira fugam.
 Tartareis trepidans immania guttura custos
 Claudet, et extendet grandia membra solo.
 Herculeaeque aliquid pejus quam verbera clavae
 Formidabit : atrox concidet ille furor.
 Nec minus extremo comitata sororibus antro
 Occulet anguigerum torva Megaera caput.
 At sontes poenis laceratae immitibus umbrae,
 Quas dirum exagitat mente tremante nefas,
 Ut procul adspiciant venientem in luce corusca,
 Pulsabit justus noxia corda pavor.
 Et tenebris abdi cupient : sed abire vetabunt
 Dura catenarum vincla jubente Deo.
 Praecipitis nec non ima de sede barathri
 Horrendum Pluto proferet ipse caput.
 Et procul insolitae miratus lumina lucis,
 Agnoscent Domiui territus ora sui;
 Quem non ignorans, Erebi de carcere tetro,
 Ducturum sanctos ad pia regna Patres,
 Saucius attonitam fremet acri vulnere mentem,
 Obvius audebit nec tamen ire Duci.
 Expectata piis igitur cum venerit hora,
 Secum Rex hilares ire jubebit avos :
 Et citius dicto, comitum stipante suorum
 Agmine, se recta tollet ad astra via.
 Quod si non magnis componere maxima rebus,
 Atque humana sacris aequiparare licet;
 Laetitiam coeli talem fore credere fas est,
 Cum steterit magnum Filius ante Patrem :
 Qualem, cum domito referebat ab orbe triumphos,
 Urbem, Roma, tuam concelebrasse ferunt :
 Ausus es huic igitur puero, crudelis Apella,
 Non una indignam fraude parare necem ?
 Tune Redemptorem (nisi malles perfidus esse)
 Tentasti infanda tollere morte tuum ?

Qui vitae quaesitor erit , poenaeque nocentes
 Addiciet , justis praemia digna dabit ?
Taliamoliri sed quis mirabitur ausum ,
 Qui fuerit nati pestis acerba sui ;
At tu sancta dies , coelo quae mitteris alto ,
 Adventuque refers annua festa tuo ;
Hercule cum natis , et fratre , et conjuge cara
 Sospitibus , nobis candida saepe redi ,

HIERONYMI VIDAÆ.

JESU CHRISTO.

OPT. MAX.

Et solus late locus est, et fletibus aptus,
 Et rediit, quā non moestior ulla, dies.
 Ipsi etiam montes, densae hac in rupe cupressi,
 Ipsae etiam quaerulo vertice flere jubent.
 Tunc etiam silices durum sensere dolorem,
 Et rupti ingenti dissiluisse sono.
 Tunc etiam sed jam erumpit mihi pectore fletus,
 Et lacrimas oculi fluminis instar agunt.
 Flere juvet saltem, lacrimisque explere dolorem,
 Quando aliud nil est quod tibi persolvam:
 Mutua nec satis est, vitamque rependere vitae,
 O qui nostra tuo funere damna levas.
 Nos Patris aeterni nostra irritavimus iras
 Fraude, cruore tuo tu probra nostra lavas.
 Nos dulces vetita decerpimus arbore foetus,
 Distentus dira tu trabe furta luis.
 O nimium nostros nimium miserate labores,
 O nostri nimium, nil memor ipse tui.
 Non genus humanum, non mundi machina tanti,
 Non tanto merces digna labore fuit.
 Scilicet aeterni Proles aeterna Parentis
 Factus homo, soutes ne moriamur obis?
 Quem Pater ipse sui, sine origine, concipit iustar,
 Dum sese aeterno cogitat usque animo.
 Me miserum, quae te pietas, pulcherrime rerum,
 Tam nova, qui quaeso, tam novus egit amor?

Ah sat erat te sidereis de sedibus actum
 Taedia virginei longa tulisse uteri,
 Aut hinc mortales eductum in luminis auras,
 Cum pecore, agresti delituisse casa,
 Inde vagum huc illuc nostros adiisse labores,
 Dum mundum ad leges et nova jura vocas:
 Neve ignominias memorem, aut quae plurima inultus
 Passus es indigno corpore ludibria,
 Hei mihi non avibusve ferisve cubilia desunt,
 At rerum Auctori desit ubique locus.
 Sola fuit tibi quae nodosis roboribus crux
 Heu nimium durum praebuit hospitium.
 Haec fuerat servis poena olim, haec furibus aequa,
 Quos tecum cerno mortem obuisse parem.
 Quae tam dira manus? quae nam tam barbara porro
 Gens, tantum obtusis sensibus ausa nefas?
 Quo ruitis miseri? qui tantus mentibus error
 Insidet? in vestrum tenditis exitium.
 Me potius, meme qui feci hoc perditte ligno.
 Hic nihil admisit: fraus mea, furta mea.
 Tene ita cum duris pendere latronibus, omnis
 Vitae cursus cui sine labe fuit?
 Qui neque contactu intemeratae virginis alui
 Contraxi antiquae signa luenda notae.
 Sed Genitrix pura coeli concepit ab aura,
 Nec potuit facies dissimulare genus.
 Ut sileam benefacta, tot et miracula rerum,
 Quae non humana perficiuntur ope,
 Insigni poteras forma, et juvenilibus annis
 Immissae pectus reddere molle serae.
 Pulcher luce magis, vel sidere matutino,
 Oceanus liquidis quod modo lavit aquis.
 Sed quem hic te aspicio? haec facies tuane illa serena?
 Hinc oculi? hic roseo gratus in ore color?
 Aureane haec menti lanugo? hoc verticis aurum
 Propexum? hic toto corpore priscus honos?
 Qua modo cumque ibas, blandi nova semina amoris
 Jactabas, dulci in ore sedebat amor.
 Huncne ego conspicio te formosissime rerum?
 Heu color, heu species quam tua facta alta!

Squalidula ut facis, ut lassula lumina livenť.
 Languidula ut cervix, mortua ut ora jacent.
 Non ea caesaries, concretaque sanguine barba,
 Non est is plane qui inodo vultus erat.
 Serta tamen capiti, regisque insignia cerno,
 Sed quae vulnificis sentibus hirta rigent.
 Et pictum video corpus juvenile rubore,
 Sed quem haustus flagris sparsit ubique cruor.
 Ne palmas morer; aut terebratas cuspide plantas,
 Hei mihi, quam latum pectore vulnus hiat?
 Quod tulit aes, quae nam hasta tuo intepuisse cruore?
 Nec tum aes delicuit? nec fuit hasta cinis?
 Cum sol ipse caput nitidum abditus obscurarit,
 Et vasto tellus sit tremefacta sinu?
 Debueras sol aeterna ferrugine coelum
 Occulere, et terris usque negare diem.
 Debueras tellus aeterno percita motu
 Collabi, humano haud ultra adeunda pede.
 At vos monstriferi quid tunc o barbara ponti
 Condita desertis, aequora littoribus?
 Quae vos quae tenuere morae? quibus abdita claustris
 Hic nulla effusis signa dedistis aquis?
 Vos tum diluvio mersas absumere terras
 Aequum erat, atque hominum fluctu abolere genus.
 Nam quid enim coelum, atque ultores aetheris ignes
 Flebilibus precer hic in mea vota modis,
 Cum Pater et coeli, rapidi moderator et ignis,
 Qui poterat flammis omnia diluere,
 Ipse suum Gnatum pro nobis jussu ultro
 Supplicium infandae morte subire trabis?
 Agnus eras sacer ille, sacram mactandus ad aram
 Pro nobis aeterno hostia sacra Patri.
 Fixum erat id coelo, nulla pote mole moveri:
 Nil sol, nil tellus, nil maria alta juvent.
 Tu quoque te nostrae es largitus sponte salutis,
 Et tibi pro cunctis dulce obiisse fuit.
 Atque ideo orabas moriens veniam hostibus ipsis,
 Ne foret hoc ulli munus inane tuum.
 Hoc quoque nos fruimur, grato sed amore dolemus,
 Et memores tumulo solvimus exequias.

Tu tamen exutus, quae morti obnoxia, vivo
Sedibus aethereis corpore sceptrā tenes:
Venturus nostras extremo tempore noxas
Quaesitum, cum res funditus igne ruent:
Aspice nunc bonus, et dignos nos effice quos tunc
Exemptos poenis in tua regna vehas.

M. PUBLII FONTANAE

DE NATIVITATE JESU CHRISTI.

Virgineo teritur, miseros quae prima parentes
 Elusit serpens, nunc pede pressa solo.
 E coelo effusis immani pondere nimbis,
 Constructa ex Arca pura Columba volat.
 Abram Aegyptiacas felix descendit in oras,
 Numinis admonitus, consiliumque sequens.
 Parvus Joesphus patrio spoliatus amictu,
 Invidia fratrum mittitur in foveam.
 Spes matris Moses vagitu exponitur undis,
 Fiscella exceptus scirpea; et inde natat.
 Emicat igne procul frondenti ex arbore, vires
 Oblita urentes flamma corusca suas.
 Quod prius e coelo mixto cum rore cadebat,
 Auro manna cibus conditur angelicus.
 Mittitur in Marath lignum, ingustabile flumen;
 Quo mutat latices Doris amara suos.
 Finibus e Canaam praegrandem in vecte racemum
 Impubes pressi pondere terga ferunt.
 Virga Sacerdotis summi florescit Aaron:
 Floret Jessaeo Virga oriunda Sene.
 Nunc ducis egregii firmatur spes Gedeonis:
 Nocturnus vellus ros cadit in niveum.
 In mare fluctisonum excitus jactatur Jonas:
 Aequora se ponunt exagitata Noto.
 Objicitur Daniel infensa ante ora leonum;
 Quem rabie haud audent, nec lacerare fame.
 Magna mole ruens nunc se demittit ab alto
 Monte silex; statuam, et conterit aere gravem.

Exortus terras de semine terret Juda
 Prae longo excussus membra sopore leo.
 Ante oculos positum vellus jam jam amoveatur;
 Et caecae noctis nubila tetra cadant.
 Expectata diu surgit lux aurea mundo;
 Orbatis profert flammiferumque jubar.
 Nubibus excussis nunc magni sidus Jacob
 Nascitur; et rutilans astra minora premit.
 Umbra vetus cedit, variis quae lumina nostra
 Lusit imaginibus: numine Christus adest.
 Jam veteri haud culpanda situ, labisque malignae
 Expers sola parit Virgo Deum, atque hominem.
 Filius ille Dei aeternus; Patris ille superni
 Sermo; qui rebus jussit adesse modum;
 Divino haud reserans intactae Virginis ortu
 Claustra pudica; gemit nunc puer in paleis.
 Miratur stabulum angustum; mirantur et ipsi
 Noscentes Dominum bos asinusque suum.
 Et stellae, et gemino suffultum cardine coelum
 Obstupet, et tellus nobilitata Deo.
 O pietas, o magna Dei dilectio! Servi
 Ob noxam Dominus venit ab arce poli.
 Dant superum choreae concentus agmine denso;
 Stant venti aeolii; mobilis aura silet.
 Empyreo solio, laetumque per aera tantum
 Excelsis canitur gloria magna modis.
 Et nox insolito multum irradiata nitore,
 Fixa pedes, miros concipit aure sonos.
 Laetitia exultans, atque inculcata voluptas
 Exercent choreas, unanimesque volant.
 Applaudunt laeti facies cantusque, chorique,
 Rectus amor, decori gratia juncta manus.
 Hos inter medios residens concordia, plausus
 Accendit; voces ingeminantque poli.
 Et passim valles resonae, et cava saxa resultant;
 Balatuque implent pascua laeta greges.
 Pastores moniti optati ad cunabula Regis
 Monstrata accelerant, adspiciuntque licum.
 Vestibuli ante aditum procumbunt ocyus omnes;
 Et fundunt tacti numine voce preces.

Advelant antrum exesa sub rupe cavatum.
 Frondibus, atque rudi earmine plectra movent.
 Haec laeta accipiunt imis in sedibus Umbrae;
 Quique pii Patres haec fore crediderant.
 Letati psallunt alternis vocibus omnes;
 Saepe veni: repetunt eripe nos tenebris.
 Dat gemitus Phlegeton, Cocyti et littora plangunt,
 Undaque sulphureis pertremefacta vadis.
 Corruit et solio sublapso corpore Pluton;
 Ominc cui tanto concutit ossa pavor.
 Mors lymphata metu properat per devia quaeque,
 Et tenet aeterna nunc sine falce manum.
 O nox fausta nimis; ferrato cardine postes
 Panduntur: cunctis coeli aditusque patet.
 Per genus humanum serpens, obnoxia morti
 Aeternae, sceleris tollitur illuvies.
 Placatur Deus omnipotens, facilisque precando
 Redditur; et populis parcat ubique suis.
 Candida Pax vultum, magnas expandit et alas,
 Quae nectit summis ima, Deumque viris.
 Occurrere sibi Pietas, et Justitia, et Pax,
 Dulcia concordēs oscula dantque genis.
 Rorarunt coeli; nubes justumque dedere:
 Protulit et tellus germen aperta suum.
 Non tacti multa stillant dulcedine montes,
 Quae Syriae valles balsama odora ferunt.
 Nunc per odorati Libani alta cacumina plantae
 Decutunt foliis roseida mella suis.
 Dant virides palmae fructus; dant lilia valles;
 Spargit odoratas terra benigna rosas.
 Involvunt liquidum currentia flumina nectar:
 Et bona cuncta polo nunc potiora cadunt.
 Pulchra Sion quid moesta jaces? jam filia luctus
 Mitte: tuae lacrymis sat maduere genae.
 Sat cinere es conspersa caput; sat mollia tristis
 Sprevisi; dum te terra aliena tenet.
 Tu secus Euphratem vultum defixa moraris
 Adnumerans fluctus praetereuntis aquae.
 Atque incursantes tacito sub pectore curas
 Excipis; et menti non datur ulla quies.

Fessaque nec multa clauduntur lumina nocte :
 Tot curis somno quis locus esse potest ?
 Arboribus suspensa manent psalteria ; Nablum
 Non solitos laxis dat fidibus modulos.
 Non psalmos captiva potes cantare : superba
 Dum quaerit miseram ludere te Babylon ;
 Sed lacrymis dulces Solymae haud oblita penates
 Saepe vocas ; horrens tot mala monstra Deum.
 Non poterit Pharius bos , aut latrator Anubis ,
 Ex animo , aut Belus , verum abolere Deum ?
 Fausta Sion , dilecta Deo , laetare : salutem
 Attulit ista dies : Rex tuus ortus adest.
 Hic est , quem veterum divina oracula patrum
 Praedixere ; malis gaudia magna tuis ,
 Quae Babylon strinxit , veniens hic vincula solvet ;
 Ipse hostis duro compede vinctus erit.
 Sub cuius magni venient vestigia Reges ;
 Ad cuius nutum cernua regna cadent.
 Sola potens magnum incedes Regina per orbem ,
 Regnaque te excipient plausibus innumeris.
 Intextus gemmis tot te velabit amictus ,
 Quot coelo aethereo sidera clara nitent.
 Quippe tuum capies aeterno e lumine solem ;
 Quo tibi semper erit magnus in ore nitor.
 Postque tuos gressus vestis spirabit odorem ;
 Quem nec mollis Arabs , nec genuit Syria.
 Natarumque chorus regum famulabitur astans ;
 Qui cupiet jussus accelerare tuos.
 Surge , age , rumpe moras , lacrymantia lumina terge ,
 Excussa et vestis tendat ad usque pedes.
 Formosum nectant stellata monilia collum :
 Et caput ornatum pulcher inauris amet.
 En nunc quale decus Aurorae fulgeat ortu ?
 En , roseo qualem fundat ab axe diem ?
 Salve vera Dei proles , decus addite terris ;
 Salve iterum mundi Christe benigne salus.

FRANCISCI MACCABELLI.

DE PUERO IESU

ELEGIA.

Nam quae se obijciunt oculis spectacula nostris?
 Dulcia quae circum carmina dulce sonant?
 Proh, Superi! Aerios percurrunt agmina campos,
 Agmina linteolis fulgida purpureis.
 En video non visa prius nutantia coelo
 Sydera, quae insueto lumine clara micant.
 Scilicet; aetherae nec nos oracula sedis
 Fallunt: haec nobis omnia pacis erunt.
 Haud equidem dubito: Deus haec certissima monstrat
 Signa, et pacato numine dexter adest.
 Dexter adest, dulcique simul succensus amore
 Nos tandem infernas non sinit ire domos.
 Certa fides: Infans summi dominator olympi
 Nascitur, ut terris aurea saecula ferat.
 Iam redit et Virgo, redeunt Saturnia regna,
 Atque optata diu candida Relligio:
 Occidit et serpens: nostros quae prima parentes
 Elusit morbis turgida lethiferis.
 Ergo signa manent praeae contagia labis,
 Si nondum pulsa est vana superstitio,
 Depellet Puer hic, soboles aequaeva Parenti,
 Qui coelum, et coeli lucida signa regit.
 Quo nato, fera bella ruunt: fulgentior ipse
 Phoebus ab Eoo littore surgit ovans:
 Flavescent laetae brumali tempore messes;
 Et viret in gelido fertilis herba solo;

Florescunt violae , narcissus floret , et alba
Lilia , et intonsas pandit oliva comas :
Undique pubescunt frondenti gramine ripae ,
Et fontes leni lene sonant strepitu.
Pastores mixtis texunt jam sarta corymbis ,
Atque hilares plenis sarta ferunt calathis.
Hinc alii ramis cingunt viridantibus antra :
Hinc pressi lactis pocula multa parant.
Candida balat ovis , gestit lasciva capella ;
Saltat depulsis hoedus ab uberibus.
Undique responsant sylvae ; late omnia rident ;
Candidulum nubes laud tegit ulla diem.
Quisquis , io plaudat , laetus pia carmina quisquis
Cantet , seque Deo solvere vota paret.
Hoc Patris pietas poscit , qui pignora nobis
Tanta dat , humanum ne omne genus pereat.
Hoc Nati pietas , summi qui jussa Parentis
Accipit , aethereas pandat ut ipse fores.

VINCENTII MONTHII.

DE CHRISTO NATO.

ELEGIA.

Irriguae valles, gelidacque in vallibus umbrae,
 Et blando trepidans vitrea lympha pede;
 Auraque per virides spirans placidissima colles,
 Antraque muscosis roscida pumicibus.
 Dum tristi canos glacie concreta capillos
 Tellurem immitti frigore adurit hyems;
 Et fontis cursum, sinuosaque flumina sistit,
 Moestaque hyperboreis arva tegit nivibus:
 Dicite quis vobis luctum, brumasque rigentes
 Dispulit, amissum restituitque decus.
 Dicite mella cavae cur sudent dulcia quercus,
 Leniter et rivis lacteus amnis eat.
 Scilicet egreditur Jessaeo e stipite virga,
 Magnus Idumaei virga decor Libani.
 Rore fluunt coeli, demittunt nubila Justum,
 Et Deus e casta Virgine natus homo est.
 Sancte Puer, tune aeterno devinctus amore
 Induis humani corporis exuvias?
 Tune Dei soholes magnum patris incrementum
 Ut posito per te, qui fuit ante, situ
 Pristina naturae redeat cum foenore forma,
 Tune jaces gelido squallidus in stabulo?
 At tibi, qua potis est, tanto pro munere tellus
 Grata pruinosas fert ubicumque rosas.

Narcissumque crocumque immortalesque amaranthos
 Submittunt facili mollia prata sinu.

O utinam in tenuem mutarent me quoque florem

Numina labentis propter aquam fluvii!

Tunc me conspicuae felicem munere formae

Mulceret tacito rure beata quies.

Spernentemque Euros, et nimbosos Aquilones

Succuteret blandi penna levis Zephyri.

Tunc quoties aurora diem reseraret olympo,

Aurorae nitidis pascerer a lacrimis.

Atque apis ad flores alis adlapsa sonoris

Nectar dulce meo sugeret e calice.

Quin et vicino decurrens vertice pastor

Visurus natum sole oriente Deum,

Nocturno legeret me totum rore madentem,

Et Pueri teneros ante pedes jaceret.

Aut potius sacris fato meliore capillis

Necteret, intacto crederet aut gremio.

Me ne igitur fronti divinae insistere, cui mox

Extruet hebraeus spineaserta furor?

Me ne latus largum cui quondam vulnus hiabit,

Me ne sinus Domini tangere posse mei?

Invideant nostram fulgentia sidera sortem,

Invideant cuncti ex aethere celicolae.

Quid loquor insanus? Quid mecum suavia fingo

Somnia successus non habitura suos?

Parce precor, Puer: in niveum si fata ligustrum,

Si renuunt mollem vertere me in violam:

Ah saltem liceat frigenti in stramine nudum

Pectoris afflatu te refovere meo.

Et sexcenta tuis me figere basia labris,

Atque oculis dulces dicere blanditias.

Donec victa levi declinans lumina somno

Materno recubes molliter in gremio.

BENEDICTI ACCOLTI.

DIVÆ VIRGINI MARIE.

Alma Parens, summo Nati quæ numine torques
 Sydera, et hoc, quicquid cingitur Oceano,
 Qua tibi, per dumeta, jugis consurgit Etruscis
 Templum et Lunensi marmore fulget opus,
 Hic tibi, depulsum ob morbum, florentia sarta
 Demetit, intacta Thusca Camilla manu.
 Tu puram illius mentem, faciemque decoram
 Esse sinas, pulchri, perpetuo effigiem.
 Dum fugat exoriens tenebras pulcherrima Acanthis,
 Sol ubi se in magnum condidit Oceanum,
 Et lucem reddit flammantibus inclyta ocellis,
 Auroræ superans ore nitente jubar;
 Tum licet, imbutos pulchri fine, atque beati,
 Divum fortunis omnibus affluere;
 Et juvet Eois solem considerare in undis,
 Uberius siquidem proximus iste beat?

LUDOVICI SERGARDII.

DE CONCEPTIONE B. M. V.

ELEGIA.

1670-763

Illecebris postquam, vafri decepta colubri
 Explevit sacram foemina prima famem,
 Respicit ad truncum, diri qui poma saporis
 Protulit, et vetita fertilitate necem.
 Cum subito longis tabescere lumina guttis
 Sentit, et ignoto rore madere genas.
 Nescia adhuc proprio dicat quo nomine fletus
 Flet tamen, et tepidis ora rigantur aquis.
 Tergere conatur vultum: sed filia culpae
 Lacryma de cordis fonte perennis erat.
 Ergo ubi se tanto cognovit crimine sontem,
 Miscuit et lacrymis verba dolenda suis.
 Felices agri fortunatique recessus,
 Et formosa oculis arva beata meis!
 Dum licuit vestra, sylvae, spatiabar in umbra;
 Lambebat nostras mollior aura comas.
 Quaque ibam violas tellus calcata ferebat
 Sponte sua, et teneris lilia mixta rosis;
 At nunc horrentes dum, coecisque latebris
 Sola tenent oculos aspera saxa meos.
 Quocumque aspicio labuntur ab arbore frondes,
 Et viduus laeto truncus honore viget.
 Si fontes lustrare placet de fontibus unda
 Prosilit, et rauco murmurat illa sono;
 Restabat coelum, sed coelum sidere torvo
 Intentat saevas in mea damna minas.

Nam stricto propius me fulminat Aliger ense ,
 Et procul à caris sedibus ire jubet.
 Scilicet hoc meruit pomi scelerata cupido
 Me miseram , satius quo caruisse fuit !
 O utinam tunc cum decerpit ab arbore fructus
 Haesisset subito pendula dextra gelu !
 Non ego divino caruissem stulta favore ,
 Nec quereretur sobolis facta noverca meae ;
 Nam quod peccavi tetigit quaque culpa nepotes,
 Et mea fatali crimina morte luunt.
 Quodque mihi placuit virus descendit in omnes ;
 Et succo venas inficit usque suo.
 Proh dolor ! ast coelo Genius mihi dexter aperto
 Advolat , et laetos solvit ab ore sonos.
 Cum formosa Deo Virgo placitura parahat
 Naufragio portum taeda secunda tuo
 Vera parens erit ista ; tuae non conscia culpae
 Decretum mundo nec subitura jugum.
 Calcatoque prius qui te deceperat angue
 Virgineos lambet lingua trisulca pedes.
 Illa genus saevo rapiet mortale tyranno ,
 Atque aditum soboli pandet ad astra tuae.
 Terge igitur lacrymas tenebris et morte fugata
 Crimine parta tuo nascitur orbe Salus.
 Pulchra famés pomi : frangit si culpa catenas
 Et reserat coeli gaudia culpa placet.

CAROLI ROTH

DIVINO INFANTI

POETA COR SUUM D. D. D.

ELEGIA.

Non myrrham tibi, Magne Puer, non divitis auri
 Pondus, non Arabum mascula thura damus.
 Talia dent Reges, quorum fortuna beata
 Divitias, aliis quas dare possit, habet.
 Nudus ego tua castra sequor; nec gloria parva est,
 Si mihi te propter despiciuntur opes.
 Quod si te, sensusque tuos, pulcherrime, novi,
 Plus tibi, quam Regum munera, corda placent.
 Illa petis, plurisque facis, quam mascula thura,
 Quam myrrham, et flavi dona beata Tagi.
 Et merito, quoniam si cor gens dura negemus,
 Caetera nil pretii, quo capiaris, habent.
 Hoc equidem (nec fallo) volens tibi, Dive, sacrarem:
 Sed miser heu dira terreor illuvie.
 Olli Livor edax succos aspersit amaros:
 Afflavit fumo Historia falsa suo.
 Difficilesque lavi sordes allevit habendi
 Ardor et incesto contigit igne Venus.
 Tum mala desidies ter pigro in gurgite Lethes
 Mersit, et infestas addidit Ira faces.
 Quin illic fodere larem Fraudesque Dolique,
 Criminaque, et Stygii caetera monstra lacus.
 Hic status est, haec forma mei tristissima cordis;
 Nec quid agam, ratio, consiliumque subit.
 Tu fer opem potius, qui nutu vertere cuncta
 In melius, nulla vi prohibente, potes.

Quod non effusi septena per ostia Nili
 Flumen, non totis fluctibus Oceanus,
 Nec gravis undanti vastis fornacibus igni
 Fibris incoctum deleat Aetna nefas,
 Discutis ex facili: nec quamvis dura, vocanti
 Materies surdis auribus esse queat.
 Quum libet, Assyrios quae potavere colores
 Certarint nivibus vellera Sithoniis;
 Quemque repperctum radiis plaga solis iniqui
 Urit, candentem vincat honore Paron.
 Mille vias nosti, per quas informia corda
 Alpina fiant candidiora nive.
 Injice tres Fidei radios: tres injice Amoris,
 Quae vitium exurant funditus omne, faces.
 Spem quoque Divinam, tenerum quae pascat Amorem,
 Et sanctum, qui Spem temperet, adde Metum.
 Illaque praeterea praeclari semina honesti
 Adjice, proventu non caritura suo.
 Hoc mihi si dederis, non tu celabere: facti
 Auctor, iol venies multus in ora virum.
 Ultra anni, solisque vias diceris: et a te
 Nata coronatis fama vehetur equis.
 Ergo age, Magne Puer, tua si te gloria tangit,
 Sancta recudendum dextra laboret opus.
 Scilicet hoc nolit, tecum qui praelia, Pluto,
 Cumque tua semper gente superbus habet.
 Sed sine tartareis illidens cornua muris
 Frendeat aeterna pallidus invidia.
 Fallor? an ex toto? non fallor; saeda retexi.
 Ex toto vitae sentio fila meae.
 Sentio diffingi sensum vetus, in-que novari
 Cor mihi; contempto vita pudore vale.
 Jam tristes abiere notae: jam rursus imago
 Eminent artificis Patris inusta manu.
 Jam vigor, et firmæ serpunt in pectore vires,
 Cordaque nescio quis spiritus intus agit.
 Non non humanae labor est, et gloria dextrae:
 Plaudite, io! Domini dextera fecit opus.

AD BEATAM VIRGINEM

IN DIE FESTO PURIFICATIONIS

Ergone vulgares inter lustranda maritas
 Virgo Palaestinae templa Sionis adis?
 Parce viae: non ulla tui sunt februa partus;
 Serviat his matrum caetera turba sine.
 Non tua par ratio: cupide licet omnia quaerat,
 Nil, te cur possit carpere, livor habet.
 Amissos, puto, Virginitas tua quaerat honores,
 Quae magis a partu nobilitata nitet,
 Muta, viden' ? natura pavet, convulsaque rerum
 Miratur magno jura puerperio.
 Vidit et hoc Moses, qua tempestate bidentes
 Pastum Jethraeis egerat a stabulis,
 Tum quum visa viro est innoxia serpere lapsu,
 Ausa nec ardentes urere flamma rubos:
 Idem etiam, ne forte putes te lege teneri,
 Cavit mirandi conscius augurii.
 Semine suscepto foetis purgamina sunt;
 Sic ait, et latae formulae legis habet.
 Quod si forte tuos nil tangunt talia sensus,
 At certe famae consuluisset decet.
 Unane multarum censeberis illa Tonantis
 Illa nec amissa Virginitate, Parens?
 Quisquis et occupat venienti, nempe notatam
 Te quoque comuni labe fuisse putet?
 Ah ne te mediis immisce femina princeps
 Matribus, incoepo parce, relerque pedem.

Sic ego. Sic contra respondit regia Virgo;
 Dum loquitur, tenerum spargit ab ore jubar.
 Nil agis: incoepo nec terreor: omnia cedunt
 Vana; per has leges Mater oportet, eam.
 Durius humano si iudicer ore, feremus:
 Laus mea sub magno Vindice tuta manet.
 Viderit haec si quis, non me dispendia famae,
 Dum coelo dicar grata fuisse, movent.
 Neve adeo Mariam (superum modo certa voluntas)
 Poeniteat totis erubuisse genis.
 Nam quod mi leges Moses non dixerit ullas,
 Gratum est, et facili, quo datis, aure bibo.
 At puto, qui Matri leges non dixerit, idem
 Sustinuit Nato dicere jura meo.
 Nec minus injusso gaudens succumbere cultro.
 Suscipit octava non sua sacra die.
 Et vaga, contemnens injustae murmura famae
 Magno primitias obtulit ille Patri;
 Exemplumque dedit, ne quis dum numina placat,
 Inspiciat solas acrius in tabulas.
 Ergo, quum legi, quamvis non subditus, ille
 Serviat, id Matrem, stulte, decere neges?
 Dixerat, et Templi foribus (dilectus Joseph
 Pone subit) niveos intulit illa pedes.

AD S. SIMEONEM.

Rumpe moras, Simeon: viden' ? ut lustralibus undis
 Spargitur, aeternum quae tulit alma jubar?
 En puer: en longum tota quod mente cupisti:
 Pasce oculos, voti copia facta tui est.
 Nec vidisse satis: licet in tua brachia tollas,
 Praemia promissis uberiora ferens.
 Fortunate Senex: post talia gaudia nempe
 Non immaturum mortis adibis iter!
 I felix: manesque ima tellure repositos,
 Quorum spes animos longa perurit, adi.
 Justus Abel, magnusque Abras, ac vulnere Jacob
 Tardior, et Moses, Jessiadesque Pater;
 Multaque praeterea sanctorum turba Virorum
 Occurret festis excita liminibus,

Tum dabit amplexus ; atque oscula dulcia figens
 Ecqua sibi portes omina laeta ? roget.
 Ergo ubi discendi studio glomeretur , et arcte
 Circumstet medium te pia turba Patrum ,
 Narres , ut coelo nuper demissus ab alto
 Ille tot aetatum vota , laborque Puer.
 Venerit : afflictam qui longa solvat Idumen
 Compede , qui luctum tergat , agatque procul ;
 Qui caecam expellat noctem , qui fortia bella
 Pugnet , et Isacidum nomen in astra ferat.
 Quin etiam in templo , veteri quum februa more
 Susciperet certo tempore magna Parens ,
 Hisce oculis illum venientem , dicito , vidi ,
 Vidi illum , amplexu continuique meo.
 Libavique genas , atque oscula mollia carpsi ,
 Oscula per longas ingeminata moras.
 Addas , et positum late fulgentibus aris ,
 (Audiatur hoc nostri sanguinis auctor Adam)
 Oblatumque Patri Infantem , ac mercede redemptum
 Exigua , ut cunctis jam bene possit emi.
 At tu dum medio referes haec laeta Senatu ,
 Laeta nec auditu cognita , quantus eris !
 Laetitia , plausuque fremens pia Curia Patrum
 Annuat in verbis pondus inesse tuis.
 Intentusque haerens Vatum chorus , omnia penset ,
 Consonaque anguriis sentiat ire suis.
 Atque aliquis forsitan tabulis gavisus apertis
 (Adstruat ut dictis pagina lecta fidem)
 Edoceat , narrata sibi multo ante fuisse
 Cognita , quosque legas , indicet ipse locos ;
 Teque recognoscas , cupidisque intentus ocellis
 Laetitiae releges praescia signa tuae.
 Ergo age , et ad manes felicia dicta reportes ;
 Gravior in toto non erit umbra choro.
 Interea Pario constructa e marmore moles
 Surgat , honorato quae tegat ossa loco.
 Absint pallentes larvae , nudisque rigentes
 Ossibus , et miris tristia signa modis.
 Laeta decent : tumuli super aggere sancta voluptas
 Rideat , et manibus florea sarta gerat.

Hanc circum volitent roseis bona Gaudia pennis,

Et Jocus, et Risus labra decenter hians.

Ipse autem laeti media sub parte sepulchri

Stabis inaurato conspiciende sinu.

Lucentes faciam vultus, lacrimasque beatum

Quae deceant, santis molliter ire genis.

Eque tuis faciam Puerum pendere lacertis

Tendentem parvas ad tua colla manus.

Iam ne forte oculos tumuli nova forma moretur,

Grandibus incidam talia verba notis:

Hic situs est Simeon causam et solatia Lethi

Cui dedit in terris Publica visa Salus.

RAIMUNDI CUNICHII S. I.

DE PUERO JESU AD AQUILONEM

ELEGIA.

At quae te in Puerum dementia, quis furor egit,
 Saeve Aquilo? o gelidâ frigidior glacie,
 Quam celsâ in Rhodope, aut in nubifero Apennino
 Durat hyems longis aspera frigoribus!
 Num tibi, stat quouiam sic insanire, patentes
 Camporum tractus, num juga, num sylvae
 Ingentes desunt? qua caerulea amphitrite,
 Quaque pater fluctus explicat Oceanus,
 Cuncta patent. Illic dignam tu nactus arenam
 Conare adversis obuius ire notis,
 Et fluctus propelle, altum et quaecumque per aequor
 Occursant, rapido turbine frange rates;
 Tum male jactatos allide ad littora nautas,
 Ut lubet, aut mediis obrue gurgitibus.
 Parce tamen Puer: per luctisonos vagitus
 Obtestor, per suspiria, per lacrymas,
 Infans turgidulis frustra quas fundit ocellis;
 Jugis ut aërio liquitur a lapide,
 Roscidaque adsidue, muscoque adoperta virenti
 Saxa rigans laevi labitur unda pede.
 Ah! satis est coecâ matris quod conditus alvo
 Pertulit obscurae taedia longa morae.
 Cognata satis est quod fastiditus ab urbe,
 Adspectuque procul, colloquioque hominum,
 Desertas pecudum sedes, atque aspera dumis
 Tesqua colit; quae nix desuper alta cadens

Consternit; manansque humor de pumice raro
 Concrescit longam frigidus in glaciem.
 Hoc, saltem hoc, inter tot dura, atque aspera te te
 Ah minus inuitem sentiat ille sibi:
 Seu mitem potius placidumque. Hoc, hoc age quamvis
 Asper, et immani praeditus ingenio.
 Pone iram, saevosque boues dedisce furores:
 Hoc fac, seu fieri non pote, sive pote.
 Sed pote. Piraei portus, vicinaque portu
 Testis erit primarum urbs genitrix segetum.
 Illic nativumque ferunt mollesse rigorem,
 Atque tuas olim te posuisse minas,
 Quum Pandioniae gliscens amor Orithyae
 In vestra ardentem impulit ossa faces.
 Ut tibi tunc inuas pervasit flamma medullas!
 Ut mitem e saevo reddidit, et placidum!
 Nam neque tam verni genitabilis aura Favoni
 Leniter umbrosis ludit in arboribus;
 Nec Zephyrus tam leni almam Titanida flatu
 Antevolat, quam te tum dominae in foribus
 Vix strepere adsuetae perhibent connubia frustra
 Orantem blandis non sine lacrymulis.
 Tene igitur flexit formosa puella, Tonante
 Editus hic durum sentiet usque Puer?
 Pulchrior hic multo, et magis dignus amari est.
 Quae geminis certant lumina syderibus
 Aspice, lacteolasque genas, et eburnea colla,
 Pectoraque intactas vincere nata nives;
 Quique nitor sanctis pellucens undique membris
 Coeleste ignotum non sinit esse genus.
 Ut quamquam in nimbos lucis pater aethereus sol
 Vultumque, et currus abdidit igniferos,
 Attamen obscurâ frustra in caligine se se
 Occultans densis involuit tenebris;
 Namque comas piceo, diamque obnubit amictu
 Dum faciem, ipse suis proditur a radiis,
 Qui sese offusis e nubibus erumpentes
 Spectantum incurrunt denique luminibus.
 Parce, ferox: nescis tua quem dementia contra
 Arma ferat, nescis quod facinus facias.

Auctorem laedis rerum, coelique potentem,
 (Nec tremis admissi conscius?) e nihilo
 Qui coelum, terramque olim, camposque liquentes
 Undarum nutu condidit omnifero;
 Astriferumque orbem stellis fulgentibus ornat,
 Astrorum et varias temperat usque vices.
 Quem saepe ignifero percurrentem aera curru,
 Terrentemque alto corda hominum tonitru,
 Aligerum volitant subter mille agmina, mille
 Post subeunt, totidemque antevolant acies,
 Et regis nutum observant, et jussa capessunt,
 Sive urbes fundo vertere sacrilegas,
 Seu pestem populis, bellumque immittere jussit,
 Miscere et subitis omnia funeribus.
 Ille austrum, zephyrumque, ille et te condidit
 idem.
 Pergis et auctorem laedere, saeve, tuum?
 Ille velit, potis est damnatum carcere coeco
 Te penitus rupes abdere in aeolias,
 Et potis est durâ vel te vincire catenâ,
 Vel procul arentes pellere in Aethyopas,
 Nusquam ubi, queis aleris, queis gaudes, frigora
 nusquam
 Aut glaciem, aut patrias jam tibi, dure, nives
 Cernere erit, sed quos vicinâ lampade semper
 Torret, ed assidue Phoebus hiulcat agros:
 Regnat ubi semper, luditque tepentibus alis
 Illa tibi invisi scilicet aura noti.
 Haec Puer, et maiora potest; teque improbe, quavis
 Perdere, vel quovis excruciare modo.
 Et faciet, pergis quoniam saevire, nec ullum
 Heu, facis irarum, stultiaeque modum.
 Nec te divinus durum Puer, optima nec te
 Virgo movet largis fletibus uda sinum,
 Muta metu, tremefacta animi, externata fragore
 Horrifico, tua quem flabra cient; Puerum
 Ah! dulcem Puerum tua ne mala flamina perdant
 Usque timens totis anxia pectoribus.
 Sed jam sive metu, dulci seu victus amore,
 Seu nostrâ motus constitit ille prece,

Non antrum horrisonis resonat plaugoribus: en ut
 Vix siccae huc illuc pervolitant paleae,
 Vana loquor: gravius rursum, et crudelius urgens
 Ah! miserum, ah! flentem conficit, et lacrymas
 Illius et vanos questus, atque irrita nostra
 Discerpit campos dicta per aërios.

EJUSDEM CUNICHII.

DE ACERBISSIMO CHRISTI CRUCIATU, AC B. V. MATRIS
 MOERORE.

ELEGIA.

En iterum tristes ad fletus, flos ubi vatū
 Annua divino sacra refert tumulo,
 Adsum, magna vocant quo me tua jussa, Neralce (1),
 Etsi nec versus pangere suavidicos,
 Moesta nec Aoniā praecingere tempora lauro,
 Fila nec auratae pellere nunc cytharae
 Optarim; dulci sed me subducere coetu
 A comitum, et solas quolibet in latebras
 Abdere, vel parvi subter fastigia tecti,
 Vel densum obscuris in nemus ilicibus,
 Aërias aut in rupes, Solymeia-montis
 Quae juga de Domini caede cruenta mei
 Mi referant. Illic laxarem fraena dolori,
 Atque hoc pro cantu fundere luctificos
 Praestaret gemitus, mista et suspiria crebro
 Singultu: abjectumque, aegrum animi, adtonitum

(1) Nomen amplissimi Praesulis Josephi Herculani in Arcadia Principis.

Nil fari, sed perpetuo tabescere fletu:
 Qualis sollicito qui lapis in Sipylo
 Usque madet, lacrymas nec cessat fundere salsas,
 Quem subter casu stillicidi adsiduo
 Fons sonat, et rauco trepidans per scrupea saxa
 Murmure nescio quam conqueritur Nioben;
 Magno quam perhibent victam obriguisset dolore,
 Desilentem prolis fata cruenta suae.
 Illa suam fleuit prolem; tabescere largis
 Me iuvat in Domini caede mei lacrymis.
 Mi quisquam flendi tam caro in funere leges
 Dicat? me ne isthaec tam fera supplicia
 Cernere tam cari capitis, misere nec lamenta,
 Et gemitus imis rumpere pectoribus
 Moerentemque, udumque genas, luctuque furentem?
 Quid Mater? qua nil dulcius esse potest:
 Illa Dei, illa hominum Mater formosa priorum,
 Incassum quae flet, quae gemit anxifera
 Curarum sub mole. Tuus, Virgo aurea, non me,
 Virgo, tuus non me vulneret iste dolor,
 Possit qui chalybis duram vim frangere? non tu
 Pressa tot aerumnis, non tua Progenies
 Divina hunc animum luctu demergat amaro,
 Exprimat his juges ex oculis lacrymas?
 Atqui bruta etiam tellus concussa fragore
 Ingenti, scisso moesta sinu, ingemuit;
 Fluminaque ingemuere, et montes, et nemora hirta,
 Littoraque, scopulique, et mare monstriferum.
 Ipse etiam coelo fleuit sol aureus alto
 Fulgentem et claro caesariem capiti
 Detraxit, lucisque almae volitantia longe
 Tela dolens atram condidit in nebulam.
 Haec olim: nunc multa itidem post saecula novamus
 Ploratum ingentis moestitiae comitem.
 Nam tamen etsi Heros magnam semel exantlavit
 Aevumnam, illaque tot praeteriere mala;
 Nec quidquam superest nisi laus, et praemia laudis,
 Etsi jam templis victor in aethereis
 Jam victor, domitâ jam clarus morte, laborum
 Nec memor aeternâ vescitur ambrosia;

Et mater dulci Gnato comes inter ovantūm
 Pulchra sedet laetas coelicolūm choreas;
 Mens tamen haec moestis ignorat cuncta diebus:
 Tempore in hoc laetum nil meminisse potest.
 Illa modo series magnorum immensa dolorum,
 Quotque tulit Gnatus, quotque tulit Genitrix,
 Obscurat, moestâque meum caligine pectus
 Opplet: cuncta ipsos nunc fieri ante oculos,
 Cuncta meo penitus inâ fixa in corde videntur;
 Usque adeo moestis fervet imaginibus,
 Horreâque, aegrescitque animus, nec cernere Patris
 Summi proboso in robore Progeniem
 Suffixam foede, miseram nec cernere Matrem
 Sustinet infandis luctibus implicitam,
 Pallentemque, aegramque, informi proxima trunco
 Dum stat, dum Gnato proxima stat gelidâ
 Rupe super, gemitusque audit, cervitque cruorem,
 Omnibus e venis qui fluit, et niveos
 Irrigat exundans artus, rivoque repente
 Sulter humum, duros irrigat et lapides.
 Nate Deo, nostri nimium memor, immemor eheu!
 Ipse tui, divi siquid adhuc superest
 Sanguinis, ah! cohibe: jam large fluxit, et una
 Humanum potuit gutta piare genus.
 Nostra salus nimio constat tibi: pone labori,
 Pone modum, et vitae, lux mea, parce tuae.
 Ista, velis, nil te jam crux, clavique trabales
 Laedent, nil densis texta coroua rubis.
 Vanescet tumor hic, vanescent vulnera, nusquam
 Livor erit, tua qui candida membra notat.
 Membra olim puro diae quae sanguine Matris
 Ipse suis formans finxit amor manibus,
 Addidit et rerum formae decus. Hei mihi! quonam
 Forma? tuo quonam fugit ab ore decor?
 Purpureae quonam fugit flos ille juventae,
 Quo lepor, et dulci dulcia melle magis
 Verba, humeris densum quae vulgus nuper avehat
 Excipere: ut patrias millia multa domos
 Linquebant! montesque, et desertas cotivalles
 Complebant coetu, littoraque, et scopulos

Mirantes, dulcesque epulas, et munera somni
 Obliti! formae tantus in ore lepos,
 Tanta inerat vultuque, et blandis gratia verbis.
 Nunc tacitum, exsanguis corpore, semianimem,
 Tristi perfusum tabo, plagisque tumentem
 (Credo equidem) vix te noscere, quae genuit,
 Ipsa queat, matrum, quot sunt, laetissima quondam,
 Nunc moesta, et largis uda sinum lacrymis.
 Vae miserae: ut tristes exercent pectora curae,
 Infixusque alte venit ad ossa dolor!
 Non secus ac duro si quis praecordia ferro
 Transadigens ipsam sedem animi rigido
 Cor petat ense, secetque in partes, et ferus addat
 Usque nova inflictis vulnera vulneribus.
 Scilicet hoc prisco patrum de more Puella
 Cum dulcem in templo sisteret Unigenam,
 Magnus seniloquo portendit carmine vates;
 Hos matri luctus dixit; hic ille dolor,
 Hic gladius, moesta adtonitus quem mente canebat
 Ora pio fletu cana tepefaciens.
 Vera, Senex, nimium tua sunt oracla; Parenti
 Trajicit en molles cura, dolorque sinus.
 Illa quidem durum constanti mente laborem
 Perfert: nec flavam solvere caesariem
 Conspecta est, tennesve humeris abscindere amictus;
 Non fesso ad terram corpore semianimis
 Concidit, extremo gnatorum in fuere matres
 Qualia moestitiae promere signa solent:
 Sed pallens, sed turgidos non dejicit aegra
 Usquam oculis dulci a Pignore; sed gemitibus
 Interdum incoepat, materni parva doloris
 Indicia, et luctus maxima pars penitus
 Obscuris animi penetralibus abdita gliscit,
 Curarumque intus millia multa latent.
 Quas inter medius residet, Gnatique cruentam
 Effigiem in laevo sculpsit amor latere;
 Immanesque adigit procusa cuspide clavos,
 Texit et hirsutis spineaserta rubis;
 Pingit purpureum, qui defluit inde, cruorem,
 Pingit quaeque suis vulnera saeva locis,

Liventesque notas flagrorum. Exemplar imago
 Jam retulit, jam se Filius, atque suas
 Materno cernit poenas in corde, nitenti
 Ceu totum qui se conspicit in speculo,
 Atque suam agnoscit faciem, formamque, habitumque,
 Et quae sit species, qui sit in ore color.
 Quae prius in purâ crystallo cuncta figurant,
 Dein reduces oculis insinuant radii.
 Acer amor, si fas, operi jam parce cruento;
 Heu Gnatum, heu Matrem perdis! imago duos
 Sauciat una: procul, procul isthinc ducite Divam,
 Humani sensus si quid inest animo,
 Quisquis ades: fidae comites abducite Divam
 Vos longe; Matrem Filius, heu! miseram
 Vulnerat aspectu; maternum sanciam pectus
 Aspectu Gnatum vulnerat illa suo.
 Ah! nobis, ah! quid fiet, si tempore in uno
 Utraque deficiat vita? quod, heu! superest
 Solamen fessis hoc rerum in turbine? cuinam
 Linquimur? haec potui dicere, docta Cohors, (1)
 Quod restat, si quis tam firmum pectore vates
 Robur habet, moestis versibus expediat.
 Me juvat hic tacitum largo tabescere fletu:
 Odit sollicitus verba diserta dolor.

(1) *Intellige de Arcadio Coetu.*

ALEXANDRI FAGNOLII

AD

VIRGINEM DEIPARAM

*annos post centum**a Lue Forocornelio propulsata.*

ELEGIA

CAMILLO ZAMPIERIO

POETAE ELEGANTISSIMO

INSCRIPTA.

Si quidquam studio praestandum, et carmine vatum
 Usquam est, id certe ipsum esse, Camille,
 putem

Divorum magnas quandoque adtollere laudes.

Et pietate eosdem prosequi, et obsequio;

Res ut, inexhausto ceu quodam fonte, secundae

Inde fluant, et opis, et benefacta hominum.

Non etenim Deus illâ homines ratione creavit.

Eque luto pulchram effinxit in hanc speciem

Supra omnes, et tot vitam producere in annos,

Divinâque dedit mente, animoque frui;

Qui cum naturae latebras, atque abdita longe

Principia, et causas est pote multiplices,

Ac rerum motus introspicere omnigenarum,

Seque facultatum propterea instruere

Ornatu vario, atque artium splendore bonarum ;
 Nec toties ideo ferre solent Superi
 Rebus opem nostris, cum turres fulmina in altas,
 Quae nostrum certe saeva caput peterent,
 Inruere, aëriosque jubent incendere montes,
 Tot nos propterea munerum ut imminores
 Nil faciendum, nil dandum contra curemus,
 Ne ulla quidem grati signa, bonique animi.
 Verum ut de iis enitatur bene quisque mereri,
 Quoque potest summo semper honore colat,
 Qualem equidem tua sese patria praestitit omni
 Tempore, cuncta implens obsequii officia :
 Quem latuit quantâ fuerit reverentia in illos,
 Et rerum dominam praecipue in Mariam,
 Cujus ope e mediis toties erepta periculis
 Felix saepe fere prae omnibus est habita.
 Atque, reliqua ut taceam, quæ non obnoxia fati,
 Quæ non natorum obnoxia funeribus
 Illa fuit, stygiis qua tempestate cavernis
 Horrentes setis anguinæ Eumenides
 Emersere, et tot (proh nomina dira !) nefandæ
 Secum Erebi pestes stragibus innumeris
 Irrupere italos (visu miserabile !) fines
 Omnia miscentes lethifero ore loca.
 Heu, quot tartareo urbes infecere veneno !
 Heu, quot dirâ homines interiere lue !
 Jam risus, dulcesque joci, facilesque cachinni,
 Jucundumque prius quod fuit, omne aberat.
 Templâ modo adspicere deserta, viasque silentes,
 Ejectisque fora horrere cadaveribus ;
 Nilque unquam audires, nisi lamentabile, quidquam
 Nil nisi singultus, et gemitum, et lacrymas.
 Quî tunc non terror, quæ tunc miseranda, Camille,
 Mortis imago tuâ non fuit in Patriâ ?
 Ah, quoties flevit longo externata dolore,
 Pavit et extremum civibus exitium !
 Verum quid pietas, quid non ardentia vota
 Illius, atque humiles non potuere preces ?
 Indoluit Maria, et duros miserata labores
 Crudeli tandem evadere caede dedit.

Mitescit jam virus, jam afflat purior aër,
 Lethaeosque petunt jam fera monstra lacus,
 O urbs, digna hominum cui tunc Regina, Deūmque
 Tantam in tanto discrimine ferret opem,
 Scilicet hoc virtus meruit tua, tempore nullo
 Deleri ex animo cum benefacta sinas!
 Hinc per saecula olli tot nunc spectacula, totque
 Sollemnes ludos magnifice instituis.
 Hinc aulaeae sacris splendent insignia Templis;
 Hinc arae multo thuris odore calent;
 Hinc et equos, auroque graves per compita currus,
 Et totā exultantem urbe vides populum.
 Effusis Mariae plaudentem vocibus illam,
 Illam ego nunc optem qualibet evehere
 Carminibus; quis enim satius canere haud modo ducat
 Tot Mariae laudes, tot decora eximia,
 Quam libeat mediis sortes Heroas in armis
 Miscere, et magnorum acta referre Ducum?
 Aeacidamque furem, atque adversa omnia late
 Sternentem, dum acer militum in innumeras
 Fulmineo ruit ense manus, aut fraudibus aptam
 Laertis prolem, quam, Phrygiarum opibus
 Eversis, errantem, et curis tristibus actam
 Traxerunt toto bis duo lustra mari:
 Aut etiam Laertiadis mirā arte, dolisque
 A matre abductam dicere Tantaliden;
 Nempe Agamemnonis pacata ut sanguine Phoebe
 Argivis pestem averteret agminibus:
 Quae tamen ut mactanda fuit, divinitus aris
 Improvisam ajunt insiluisse feram;
 Hancque olli caesam, pulchramque Mycenida demum
 Transvectam ad fines, Taurica terra, tuos.
 Nam quid sunt isthaec, nisi Graeae somnia gentis,
 Quae sibi molita est vana superstitio?
 Quid poterat Phoebe, quo pestem avertere pacto
 Monstraque tot Danais, nulla si ubique fuit?
 Tu potes hoc Maria: testes Vatreñides undae,
 Et quicumque Italos irrigat amnis agros.
 Te puram, sanctamque colunt, rerumque potentem
 Coelique, terraeque, et rabidus Phlegeton.

Hic ego nunc, olim quo numine polluit ingens
 Pindarus, hoc ipsum mi quoque inesse velim.
 Hoc ego nunc mihi inesse velim, hoc venerarier ipso:
 Di magni, numeris fertur ut ille suis!
 Ut sermone fluit vel non imitabilis, utque
 Verba olli immensa luxuriant serie!
 Sea victorem olea, pinuque apioque coronet
 Quaque geris cinctas arbore, Phaebe, comas
 Verum ego qui hoc potero nunc, cum jam fracta
 cadat mens,
 Ipsaque vox trepidis haereat in labiis?
 At tu facundi quem dulcis musa Catulli
 Edocuit claris artibus instituens,
 Unde merae veneres, puri pusique lepores
 Ore tuo et nitidum profluit eloquium,
 Qualis inotano veniens de pumice rivus
 Qui per adesa levi saxa fugit sonitu,
 Cujus sit umbroso projectus margine pastor,
 Dum mage sol urit, cum grege jam saturo
 Tranquillos captat platani sub tegmine somnos,
 Cum interea leni aurâ acta strepunt nemora:
 Tu hoc, inquam, praestes, et tecum Poggius,
 ille, (1)
 Quam mihi perpetuo foedere amicitiae
 Par studium junxit: proh quanto numine fervet,
 Olli ubi corda ignis percita Apollineus
 Conripit! o cultae quam tunc praestantia linguae,
 O quam tum docti vis micat ingenii!
 Ille sophocleo modulatur digna cothurno,
 Ille et thebana carmina digna lyrâ.

(1) Simon Antonius Poggius S. J. tragicorum, lyricorum-
 que modorum gloria nulli poetarum sui temporis secundus.

MARIAE VIRGINI MATRI

PATRONAE

BERNARDI ZAMAGNAE

ELEGIAE X.

—

ELEGIACORUM LIBER II.

AD MAGNAM DEI MATREM

Cui dabo exiguum pium libellum
 Nec satis lepidum, nec expoliturum?
 Virgo dia, tibi: tuas libellus
 Quum laudes habeat, tuus libellus
 Dici vult: satis ille se putabit,
 Si non displiceat tibi, beatum.
 Quod si fors placeat; nec impolitus,
 Jam nec illepidus, perennis aevo
 Plus uno sibi plaudet, et libellos
 Omnes, quot fuerunt politiores
 Auroque, et minio, et cedro elegantes,
 Vincet exiguus pius libellus.
 At nisi auxilium tui repertum
 Illi erit decorisque, nominisque,
 Vix notus tineis, araneisque
 Inter multa pusillus impiorum
 Grandia illa volumina, ac venena
 Atris in tenebris jacebit usque;
 Vel tractu melior liquentis aurae
 Unâque (1) aeriam ratem secutus
 Ibit ludibrium Favoniorum.
 Quare illum tibi habe; tuus vocetur;
 Sit tuus. Sub Herâ quid oro tantâ
 Vel sibi metuat, vel optet ipsi
 A me jam fieri mage expetendum?

(1) Locus hic referendus ad aliud auctoris poema sane luculentissimum, et ad Lucretianam lucernam elaboratum, cui titulus — *Navis Aëria* — Impressum fuit Romae elegantissimis omnino formis a Paulo Giunchio anno 1768 in 8.vo
 C. M.

ELEGIARUM MONOBIBLOS

ELEGIA I.

AD VIRGINEM SINE LABE CONCEPTAM

Primam qui vetito matrem decerpere ramo
 Poma malus vaftris impulit insidiis;
 Qui suo mortale genus late omne parentis
 Unius ob noxam subdidit imperio
 Lethiferum inspirans virus, quod corpore fustum
 Atque animâ omnigenûm monstra creat scelerum:
 Idem ille in colubri faciem conversus et ora
 Hostis atrox veteri te quoque posse capi
 Credidit arte, Infans rerum purissima: non spem
 Tantaë illi potuit demere laetitiae
 Criminis, aut ultrix diri promissa (1) Virago
 Impresso elidens monstra nefanda pede;
 Aut rubus ille vetus (2) flammâ crepitante cremari
 Visus, sed nullam passus ab igne notam;
 Unave (3) diluvio referens te, Diva, carina
 Illa jugis tandem sospes in armeniis;
 Proxima vel tellus largo dum rore madescit,
 Aridulum, ac nullo vellus (4) ab imbre madens;
 Sunt rata signa tuæ foecundâ matris in alvo,
 At non maternae conscia labis, ades

(1) Cornelius a Lap. in illud Genes. cap. 3 ipsa conteret caput tuum, et tu insidiaberis calcaneo ejus etc. id etiam de B. Virgine intelligendum affirmat.

(2) Exod. cap. 3.

(3) Requievit Arca super montes Armeniae etc. Genes. cap. 8.

(4) Judic. cap. 6.

En concepta, prius caelesti lampade sanctus
 Nempe amor exussit terque quaterque luem
 Incretam, et stygii exemit mala semina tabi:
 Tum niveâ finxit candida membra manu
 Sanguinis ipse legens guttas, qui purior, et qui
 Matris erat toto in corpore vividior.
 Ah fuge jam coluber: viden', ut dia emicet infans?
 Te petit illa, tibi bella necemque parat.
 Hinc amor, hinc tutam custos tegit altera pulcrum
 Gratia (1) stellanti corpus amicta togâ,
 Spesque fidesque simul, flos ille merus virtutum,
 Formosam laeto circumeunt thiaso.
 Infans ô felix salve! quid vota moraris?
 Annae jam nascens egredere ex utero.
 Nunc infans, olim virgoque parensque futura
 Digna Deo; ex te una est nostra oritura salus,
 Unaque tu generis lapsi pars integra, et una
 Quam merito e nostro vix rear esse satu.
 Scilicet Isacides priscum genus heroinae
 Tantum omnes cedunt laudis honore tibi,
 Quantum sublustri rutilantia sidera nocte
 Fulgori cedunt cuncta hyperionio:
 Qui quum se eoâ mane extulit amphitrite,
 Obruta inextinctis ipsa latent radiis,
 Nec caelo apparent, nec pingunt aurea templa;
 Ille suo tantum fundit ab axe jubar.
 Et merito: nam quae parili se jactet honore,
 Quae se laude tibi conferat? anne (2) Sara,
 An formosa Rachel, an Debora fortis, an illa
 Assyrio referens quae redit exuvias
 De duce sanguineâ caput a cervice revulsum?
 Quae prius, eximiae quam retulere decus

(1) Riccardus a S. Laur. super Eccl. omne enim, ait, genus gratiarum, et omnia charismata virtutum intrarunt in Mariam etc.

(2) De Sara in Genesi mentio in cap. 11 et seq. De Rachel Gen. 29 dicitur, quod erat decora facie, et venusto adspectu, quam etc. Jud. lib. 4. Erat autem Debora prophetis: uxor Lapidoth, quae judicabat populum etc. Vide etiam librum Judith etc.

Virtutis, dederant stygiis captiva catenis
 Et phlegethontaeo colla premenda jugo:
 Omnibus ille draco malus ingruit, omnibus ante
 Cervicem impositis pressit atrox pedibus.
 Cujus tu contra sprevisisti sola furorem,
 Nec de te exuvias perfidus hostis habet.
 Quin stygio quamquis epotum in te vomat amne
 Virus si qua ortus laedere fraude tuos
 Possit, conantem frustra vincis tamen hostem
 Innocuo calcans livida terga pede,
 Insultansque, magis, magis o precor usque scelestum
 Auctorem, a quo sunt omnia nata mala,
 Omnia sunt nobis felicitis gaudia vitae
 A quo rapta, magis, dia puella, preme.
 Ille suo ereptum per te nostrum genus iri
 Infrendens frustra jam sciat imperio;
 Et sciat et doleat vesanus: cur bona cessant
 Gaudia? vicit io magna puella stygem,
 Vicit, et attonitis laetum mortalibus omen
 Iris (1) vicinae nuncia pacis adest.
 En iterum, quales nondum ullo crimine foeda,
 Anguineo nondum perditâ flagitio,
 Terra dabat, flores parit undique versicolores:
 Illi autem, circum dulce sonans Zephyrus
 Dum volat, arguto foliorum murmure discunt,
 Ut merita es, laudes dicere, sancta, tuas.
 Dicite jam laudes, jamque una crescite flores,
 Quos alit alma suae terra parens dominae,
 Quosque in sarta legens dicam, tibi munera prima,
 Lux mea, pro domitâ dat styge noster amor:
 Addam etiam cantus, sed quos nec Pieris ulla,
 In sylvis Phoebus nec docet aoniis,
 Humor hiantae qua defluit hippocrenes,
 Et vatum epoto corda ciet lactice.
 Ingenium dabis ipsa; unam te nostra sonabunt
 Carmina; tu nostri carminis auctor eris.

(1) Hoc est signum foederis. : : : : arcum meum ponam
 in nubibus etc.

ELEGIA II.

AD VIRGINEM NASCENTEM

Qualis noctivagae phoebes (1) nitor almus olympto
 Emicat, ac niveis invehitur bijugis;
 Qualis ab eois nimbo conspersa rosarum
 Memnonis illa parens prosilit aequoribus;
 Qualis et imbriferas ubi guttas auricomus sol
 Permeat, in vario lumine versicolor
 Post hyemem jam depulsam post nubila tetra
 Formosae facies iridos exoritur;
 Talis ades nascens: quid talis? ne boua saevi;
 Quin potius vati parce, puella, tuo.
 Pauperis hoc vitium linguae, quae nescia fari est,
 Quod videt attonitis sensibus in te inhians
 Mens animi, puras quum primum lucis in oras
 Matris felici laberis e gremio:
 Conatur tamen ipsa, potis si dicere, et omnes
 Verborumne quidquam anxia versat opes,
 Vestigatque undas, poti queis ducere vates
 Suerunt ismariis culminibus nemora,
 Aque Hebrum, Tanaimque inhibere: heic deficit
 humor
 Pegaseus, fons heic aret apollineus;
 Rerum nulla refert species te, Diva: ventustum
 Nil est, quo non sis tute venusta mage.
 Quippe venis, qualem voluit Sator ille supremus,
 Et voluit, qua nec pulchrior ulla fuit,
 Nec melior, volvens te (2) aeternâ in mente, priusquam
 Mundi libravit moenia ponderibus,

(1) Cant. cant. 6 cap. 6. Quae est ista, quae progreditur, quasi aurora consurgens, pulchra ut luna etc.

(2) Proverb. cap. 8. Ab aeterno ordinata sum etc. quando etc. vide expositores in hunc locum.

Effuditque auras late, certisque revinxit
 Terrarum clausum finibus oceanum,
 Sidera et immisit caelo; tu namque fuisti
 Illud opus, majus quo nihil ipse Deus
 Condidit, et solem quamvis et sidera promsit,
 E tot inexhaustae mentis imaginibus;
 Tantaque virtutis tua sunt (1) exordia, nondum
 Nata omnes omni ut decore antevoles.
 Nil igitur conferre tibi sese audeat: atqui
 Non ideo has humiles sperne puella domus;
 Has tibi praecipue rerum Pater ipse paravit,
 Praecipue tellus condita et astra tibi.
 Aspice fulgentem lunam, quae dum aurea coelo
 Ducit sidereas, nocte silente, faces,
 Optatum per lassâ dabit tibi membra soporem
 Pallidula teneros luce fovens oculos.
 Aspice et aurorâ: rubuere ardentia coeli
 Tempa, rubent longe culminaque et sylvae:
 Haec tibi solis erit praenuncia, jam nova rerum,
 Quoquô oculos vertas, se facies aperit:
 Tethyos en purâ prodit sol altus ab undâ;
 Vanescunt tremulis sidera luminibus;
 Nusquam atrae est facies noctis: tantum ille cōruscans
 Litore ab eoo litus ad hesperium
 Spicula diffundit lucis volitantia; quae se
 In septem postquam stamina dissolunt,
 Omnibus ille suus rebus color, omnibus illa
 Et forma et species floribus enituit.
 Tum Libani te (2) cedri, et sioniae cyparissi,
 Tum vocat atque ingens palma, oleaeque viror,
 Et riguo platanus campo, Hiericunctis et illa
 Ambrosium os rubro tinta lepore rosa:
 Dumque vocant, placidas zephyris motantibus auras,
 Adsonat omne avium per nemora alta genus,
 Colluditque iterans blando tua nomina cantu.
 O quae tam felix nasceris, haud metuas

(1) Fundamenta ejus in montibus sanctis: D'ligit Dominus portas Sion super omnia tabernacula Jacob. Psal. 86.

(2) Eccl. cap. 24: Quasi cedrus etc. Lege sis Rupertum etc.

Heic habitare ; tuo si nunc dignabere terram
 Adspectu , veterem se induet in speciem ;
 Qualem habuit , miseram quam nondum perdidit Heva
 Decepta inferni fraude mala colubri.
 Omnia sunt illi primum hoc de fonte coorta
 Tot mala et omnigenae semina nequitiæ :
 Quae cunctis natura parens infausta suorum ,
 Hausere ut primae tempora vitae homines ,
 Insinuat penitus : tibi sed , quae colla draconis
 Presseris in carae matris adhuc gremio ,
 Haud unquam insevit : semper curaeque metusque
 Longe aberunt , falsae et gaudia laetitiae ,
 Et spes et desideria atque aestus animorum ,
 Transversos qui nos turbine conripiunt ,
 Absorbentque ; atrum in barathrum : tibi pectoris
 omnes

Motus pax certo foedere certa reget ,
 Nullo inconstantis fortunæ agitabere casu ,
 Nulla tuum invadent nubila consilium :
 Quae sunt recta , voles ; atque inter recta sequeris
 Optima quaeque ; in te candida lux inerat ;
 In te dius Amor , puram qui saepius auras
 Te levis hinc pennis evehet aureolis
 In superas alte volitans , ubi purior aether
 Et supra Sinain et juga Thaborea
 Ridet , et haud ullo concessus turbine saevit.
 Illic tu nigris altior et nebulis ,
 Altior et nimbis ventisque furentibus omnes
 Despicias casus , despiciasque minas ,
 Quae humilis regio hac miscetur. Quare age laeta
 Regina o terras ingredi , ipsa decus ,
 Ipsa aderis magnum columen mortalibus aegris.
 Quos inter quum me videris , affer opem
 Jactatoque vagoque : orto jam sidere tanto
 In medio incolumes ibimus oceano.

ELEGIA III.

AD VIRGINEM DEO SE IN TEMPLO DICANTEM

Tantane te capiunt carae fastidia matris?
 Sicne audes patriis cedere liminibus?
 Ah properos cohibe gressus, quo, dia puella,
 Te rapis? an celsae templa petis Solymae?
 Virginibus (1) virgo decus accessura? quid eheu
 Te sine jam mater, te sine jam genitor
 Heu quid agat? tecum solatia rapta senectae,
 Omnis tecum una lucis abibit amor,
 Iste tuus praesens quem pridem adspectus alebat,
 Nunc absens multa perdit amaritiæ.
 Et quamvis te non teneant, suspirat uterque
 Attamen, ac tepidis ora rigat lacrymis.
 Ire tamen tu pergis: eunti ignoscite, tristem
 Et fletum uvidulis tergite luminibus.
 Illam ducit Amor: dio quis pugnoet Amori?
 I, quo tantus agit, sancta puella, Deus:
 Ipse fores reserat, dextram tibi porrigit ipse,
 Ut facili valeas limen adire gradu
 Auratum templi limen, magis aptus in orbe
 Istis quo nullus moribus esse locus.
 Nulla potis mage digna domus, tu candida nempe es
 Illa (2) columba, olim missa per imbriferos

(1) Multa sunt hac in re aut obscura, aut incerta; magna-
 que est opinioinum varietas inter auctores, qui de hujusmodi ar-
 gumento scripsere. Nihil tamen heic dictum est, quod cuiquam
 temere dictum videri jure possit; quum ea fere omnia, quae
 describuntur, non levis auctoris alicujus nomine atque auctori-
 tate nitantur.

(2) Genes cap. 8. Emisit quoque columbam post eum, ut
 videret quae quum non invenisset ubi requiesceret pes
 ejus, reversa est ad eum in arcam etc.

Quae tractus, nondum quum sederat aestus aquarum,
 Abdita queis tellus maxima delituit,
 Ut sedem haud reperit late omnia circumspectans,
 Qui ret ubi niveos ponere lassa pedes,
 Extimuit, plusumque alis fugiens dedit, et se
 Laeta iterum navi reddidit incolumem.
 Scilicet in terris alibi num sistere posses,
 Heic ubi commixtum fas simul atque nefas:
 Tot scelerum facies, tam multae unde undique pestes
 E stygio excitae circumeunt barathro:
 Quarum nulla tuos poterit corrumpere mores,
 Nulla isthuc inferre ausa pedem poterit
 Te puram terrere: audin' ? jam numen in alma
 Aede sonant, numen carmina sacra canunt,
 Thureus ante aras dum se vapor evehit alte.
 Tu divino adflatu intus adusta animum
 Suspirasque, ardesque, atque uno numine gaudes
 Ora sinumque tepenti imbre mædefaciens.
 Qualis ubi aurato subnitens cerea lychno
 Concepit flammae vim sacula igniferam,
 Illa quidem mollita liquescit ab igne, simulque
 Cuncta renidenti luce loca exhilarat.
 Huic similis flesque ardesque; et jam vix capis ipsa
 Plenam exultanti pectore laetitiam,
 Qua socias inter gaudes jam sede recepta
 In templi: at verso cardine jam crepuit,
 Postibus ocllulis, heu janua! quis mihi tete
 Invidet, et cupidis subtrahit ex oculis?
 Pande fores nimium immitis quicumque minister:
 Men' longe posse hac Virgiue abesse putas?
 Ergo te numquam posthac formosa videbo,
 Abstrusam in magni numinis obsequio
 Nunquam ego te adspiciam posthac? at mente tuebor,
 At certe gratis pascar imaginibus;
 Haud aliter quam si manifesto in lumine praesens
 Praesentem obtutu conspicer assiduo.
 Ac modo sidereâ (1) suffusam luce videbo
 Ardenti sanctas fundere ab ore preces,

(1) Aliqua heic officia atque munera referuntur ex iis, in quibus puellae, quae aiebantur in templo, juxta verosimiliorem opinionem exercebantur.

Quas alacer charitum circumvolitans chorus omnis
 Excipit, ac sedes evehit ad superas
 Astra super solisque jubar : modo sacra canentem
 Carmina, vel prisci temporis historias
 Volventem, ac memori fingeutem in corde tuorum
 Illa tot adspiciam grandia facta patrum.
 Saepe etiam cernam, superum famulante coronâ,
 Adposita in tela ducere ab arte notas;
 Ut varii immensos per caeli didita tractus
 Numinis ad nutum fulserit haec species
 Et nihili novus e latebris emergerit orbis,
 Non qualis nunc est dira lues hominum,
 Cunctarumque simul virtutum triste sepulcrum,
 Nescius ast ipsis cedere sideribus.
 Saeva parens, tantine fuit decerpere pomum?
 Te miserans coeptum forte remittit opus
 Nunc mea virgo, tuosque horret dum effingere casus,
 Daedala acus saepe illi excidit e digitis;
 Flet quoque, et anxifero suspirat pectore: quid fles?
 Non tibi, sed nobis saeva parens nocuit.
 Aurea quin tenui rursum velamina filo
 Pinge age et artificii pollice rursus acum
 Docta cape: en quatuor video de partibus omnes
 Caeruleo sedes tramite dividere
 Elisias, tempe felicia; ver ubi semper,
 Puraque ubi caelo lux sine nube micat.
 Illic princeps est ille hominum; circa volucrum vis
 Plaudit, et agnoscit terra suum dominum,
 Agnoscuntque ferae omnigenae, floresque videntur,
 Qua se fert, prono vertice suppliciter
 Ipsi etiam venerari: aliâ stat parte puella
 Pulcra os, ac flavis conspicienda comis,
 Quas inter zephyrus ludit lascivus: at illi
 Non coma, non curae est jam decus oris; hians
 Arbore sub viridi tantum stupet aurea mala,
 Quam formosa, legi non minus apta manu.
 Illam anguis blande cernit, ramoque volutus
 Mala inter squamis enitet aureolis.
 Heu quid agit! niveam poma ad fatalia dextram
 Porrigit: ah isthoc, dia puella, precor,

Mitte opus ! heic Heva pro tristi , missa Virago
 Illa polo potius magna locum teneat ;
 Quae premet inferni collum fatale draconis
 Siderea in flavo sarta gerens capite.
 Hanc tu dum pinges , supplex venerabere , et unam
 Quot fuerunt , quot erunt , matribus anteferes :
 Hanc , ego te venerans , semper venerabor , et ipsam
 Esse velim , vates cui placeam ante alios.

ELEGIA IV.

AD VIRGINEM NUBENTEM.

Non temere insonuit laetis concentibus aura ,
 Clarior et solito lumine tota nitet :
 O venias mea nympha ; sacras Hymeneus ad aras
 Ecce tibi casti vincula conjugii
 Aëreum caeli croceis fidens iter alis
 Et gerit , et tali laude superbus ovat
 Caelicolum in thiaso : viden' , ut pars candida nectit
 Puniceis pulcre lilia taeniolis ,
 Pars in sarta rosas addit tibi suave rubentes ,
 Quas prius ambrosio rore rigavit Amor ,
 Dius Amor , numquam visus qui laetior ante
 Fulget inauratâ candidus in tunicâ ,
 Sidereoque faces succensas igne coruscans
 Jam cupit optanti tradere te socio.
 Ne dubites , huic , Virgo , tuam concedere dextram ;
 Flagrat , at innocuo flagrat amore animum ;
 Dicetur jamque ipse tuus , diceris et ipsa
 Jam sua , sed primum stabit utrique decus ,
 Virgineus sed stabit honos , devotaque caelo
 A primo aetatis vere pudicitia.
 Hoc felix tibi conjugium Deus auctor olympo
 Spondet , et hunc socium destiuat ipse tibi :

Hos etiam placidi vitream Jordanis ad undam
 Inter plaudentem Naiadum choreas
 Felices dulci cantu celebrare hymenaeos
 Est suetus Salomon, ille tuus proavus
 Magnorum soboles pulcherrima Jessidarum:
 Ille amor hic fuerat castus, et almus hymen,
 Cujus saepe novâ capti dulcedine colles
 Palmiferi exiluire et juga cedrisera.
 At tu cui talem fatorum arcana dicarunt
 Nuptam, justitiae (1) praemia magna tuae,
 O nimium felix gaude; tibi tradita cura
 Illius est purae Virginis, ulla fuit
 Qua neque amabilior superis, neque carior usquam,
 Nec mage virgineo nobilis ingenio.
 Nam quodcumque facit, quoquo sua lumina flectit,
 Admovet illa virum sensibus omnigenae
 Virtutis stimulos, castique accendit amoris
 Non prius expertis vota cupidinibus.
 Nunc tamen haec eadem tactus exosa viriles,
 Certaue non legem frangere virgineam
 En tibi se credit, nec dedignatur amantem.
 Quippe illi in te uno tanta reperta fides,
 Omnia qui tenerae praestes bona commoda nuptae
 Atque eadem intacto corpore tecta colas:
 Ac veluti amplectens vitem ulmus tristia flabra
 Ventorum, validae sustinet atque hyemis
 Immota incursum; carae tu nempe puellae
 Sis tale in duris casibus auxilium.
 Hoc faciet, mens haec illi; socialia tecum
 Partiri vitae commoda cuncta volet,
 Atque tui decoris (2) custos, atque additus una
 Moeroris, virgo, laetitiaeque comes
 Caetera connubii tibi cedit jura, sat uno
 Munere contentus, quod tuus esse queat.
 Hoc ipse an potuit majus contingere votum,
 An quidquam melius poscere coelicolas?

(1) Joseph autem . . . quum esset justus etc. Luc. cap. 1.

(2) Desponsata est viro justo non violenter oblaturus, sed potius contra violentos custodituro etc. ait Augustinus de Sancta virginit.

En qua regna patent Phoebi flammantis ad ortum,
 Quaque idem hesperio tingit in amne rotas,
 In terris facies non hac formosior ulla,
 Non est et virtute auctior ulla anima,
 Fulgere cuique magis rerum illa aeterna potestas
 Eximiae semper laudis honore dedit.
 Quare agite unanimi quos jungit foedere taeda
 Pura ferens puris gaudia conjugibus,
 Consulite o terris ambo: jam candida caeli
 Stillantis dio nubila rore pluent,
 Jam tellus inarata almo foecunda vigore
 Pollicitum tumido proferet e gremio
 Florem (1) Jesseum, suavem qui sparget odorem
 Stellarum sedes ultra hyperionias:
 Illaque lucidulo clausae se cortice conchae
 Gemma nitens pulcris exeret aequoribus;
 Cujus naturamque simul miratur et ortus
 Doris, et invisi seminis unde vigor.
 Aetheria certe nascetur origine proles,
 Nascetur qui vos nomine saepe vocet,
 Teque suum dicat patrem, tibi candida nympha
 Parvus ab admotis pendeat uberibus.
 Tunc animus quis erit vobis? quae mens bona purae
 Laetitiae admirans gaudia concipiet?
 Illa specus bethlea, illud mihi testis et antrum,
 Nunc tantum bruto grata domus pecori,
 Thure olim dignanda atque ipsis aemula stellis
 Regales multo vincet honore lares.
 Dicere plura mihi vetitum; immortalia musae
 Mortali prohibent facta docere sono.
 Et jam concussit flagrantem lumine fausto
 Subridens placide laetus amor faculam;
 Ipsaque secreti liquens penetralia templi
 Arguta virgo concrepuit soleâ.
 O venias nova nupta novum columen nuptarum;
 Anulus in sponsi clara micans manibus
 Candidulum poscit digitum, quo fulgeat aptus,
 Aeternam et fulgens servet amicitiam

(1) Isai. cap. 11. Egredietur virga de radice Jesse et flos etc.

Gaude Amor, o gaude felix Hymenaeae, peracta
 Omnia; jam nupsit vestra puella viro,
 Et pulcro suffusa genas pudibunda rubore
 Nupta rubet, qualis sale pudoricolor
 Os perfusa rubet tithonia matutino,
 Ac roseis prodit tethyose foribus:
 Sis felix mea vita; die si videris isto
 Me facilis, felix semper et ipse ferar.

ELEGIA V.

AD VIRGINEM, CAELESTI NUNCIO ACCEPTO

Quisque ades, fer thura, pius: vos ite profani,
 Ite, et sacratis cedite limitibus:
 Siderei en rutilâ caeli venit (1) ales ab arce
 Nuncius (alarum nosco ego jam sonitum,
 Ambrosios nosco crines, nec fallor), et istâ
 Fulgentem laetus ponit in aede pedem.
 Jam subiit: quid Virgo tulit? quae verba loqutus?
 Me miserum, trepido pectore sollicita
 Turbatae (2) similis suspiras: cur ita spargis
 Virgineo niveas moesta rubore genas?
 Qui timor hic tantus, quae tristitia nuncia terrent
 Attonitam? certe gaudia laeta tulit:
 Laeta piis hilares portendunt gaudia divi,
 Felicem diae germine te sobolis,
 Felicem matres inter te dixit, et unam
 Cunctis omnipotens quam Pater antetulit.
 Idne (3) times, Virgo, materno et nomine palles?
 Ah! istum trepido pone metum ex animo.

(1) Luc. cap. 1. Missus est Angelus etc.

(2) Quae quum audisset, turbata est in sermone ejus etc.
cap. 1. Luc.

(3) Luc. item cap. 1. Ne timeas etc.

Mater eris, sed virgo simul: Deus ipse parentem
 Te sibi jam legit maximus, et metues,
 Ne tibi virgineus pereat flos? purior imo
 Adflatu extiterit numinis ac melior.
 En repetens animo priscorum oracula vatum
 In te illud matrum casta puella decus,
 Foecundam, in te illam divinitus heroinam
 Agnosco: o quid me laetius esse potest?
 Quid magis optandum terris contingere? salve
 Lux bona speratae conscia laetitiae,
 Salve ales, salve quot sunt Jesseidas inter
 Maxima! jam promissa ergo erit illa dies,
 Ergo erit, o Virgo, qua, post discrimina rerum
 Multa ignominias post tot, et opprobria,
 Quae misere patrio tulimus pro crimine sontes,
 Libera jam dabitur solvere colla iugo,
 Jam caelum sperare: hominum per te genus omne
 Nunc melius faustis nascitur auspiciis,
 Ac decus amissum spondet sibi; tu modo Virgo
 Elue foemineum foemina triste scelus
 Aetheriâ foecunda aurâ; si dura resistes,
 Irrita per caelum vota ferent zephyri,
 Mersaque lethaeo spes usque innabit in amne.
 Haud etenim nostrae tollere tristitiae
 Tantillum quisquam potis est te praeter, ab unâ
 Nostra salus pendet nempe vel interitus.
 Exitium ab nostrum ni vis crudelior Hevâ,
 Humani te jam tangat amor generis.
 Hoc matris lacrymae, hoc genitor te poscit: an audes
 Hos quoque speratis demere sideribus?
 Qui te nutribant quum parvam, tot bona totque
 Eximii dotes eximias animi
 Mirantes meliora sibi, meliora solebant
 Haud temere sperare omni hominum generi;
 Fors quoque promissam terris te saepe putabant,
 Quae digna et diae matris honore fores.
 Excidit an facinus, stygii quo colla draconis
 Pressisti, quo non fortius esse pote?
 Tempore jam ex illo melius confidere nobis
 Coepimus, et nostram agnoscere te dominam.

Nunc tua at immenso celebrabitur aethere fama,
 Nunc terris nullo tempore deficiet,
 Quin longo aetatum senio magis usque vigebit,
 Clarescetque magis nomen ubique tuum;
 Hesperius noscet, cultor te noscet eous,
 Supposita, et geminis ultima terra polis
 Virtutemque suae colet et benefacta parentis.
 Auguror: haec etiam ipsa haec domus illyricos
 Aëra (1) per liquidum procul hinc petet advena colles:
 O nemora, o colles Illyriae, o Libano,
 Engaddique jugis quae tum loca praeferet illa,
 Gaudete ipsius dum licet hospitio;
 Certatim, haec virgo hic juvenis quibus instetit ales,
 Oscula sacratis figite liminibus.
 Non tanto gaudere diu nam munere, tanta
 Non vobis longum laude frui dabitur.
 Jam volat adriacos fugiens super ardua fluctus,
 Vectaque litoribus sidit in ausoniis,
 Qua nemora adclivi paulatim laurea calle
 Surgunt Picenis edita verticibus;
 Sedem illic cultumque volet: tu Dalmata, frustra
 Desertam ut redeat rursus in Illyriam,
 Litoris adversâ patrii flens tristis in ora
 Sparges aeoliis vota ferenda notis.
 Illic Diva sibi sedem leget ipsa, potenti
 Illic Ausoniam numine diva teget;
 Excitaeque ferent illuc sua munera gentes,
 Quas et Arabs, quas et ditior Assyria,
 Indiaque aurifero submittit litore merces,
 Concharum et genitor parturit oceanus.
 Sed mihi quae subito lux emicat? annuit (2) alma,
 Annuit o! laetus nuncius ecce redit.
 Ille secat roseis coelum peunis; Deus alvum
 Virginis in castam labitur omnipotens.
 Concipis en, Virgo, dium sine semine foetum,
 Nec qua in te venit, qua subiitque viâ;

(1) Vid. Tursellinum in hist. Dom. Lauret.

(2) Dixit autem Maria: Ecce Ancilla Domini, fiat mihi etc. Luc. cap. 1.

Mirans agnoscis, plenam te lumine tantum ,
 Unigenamque utero nosis habere Deum.
 Ceu quando florum per germina matutinus
 Lene fluens puro liquitur axe liquor ,
 Rore madent pellucidulo , rore omnia late
 Canescunt , blandum nescia qua subiit
 Intra se rorem sentit rosa , sentit et udum
 Sublucens violae purpura aperta sinum ,
 Omne genus florum sentit , penitusque recepto
 Et viget , et molli germine quisque tumet.

ELEGIA VI.

AD VIRGINEM IN MONTANA PROFICISCENTEM.

Ergo etiam in montes , atque addita montibus antra
 Audebis , patriâ Virgo profecta domo
 Ire gravis foetu , nuper concretus in alvo
 Qui tuâ inextincto numine dius inest ,
 Quique tibi carus certe est , quam quod pote carum
 Esse mage ? Ah ! tenerae parcere tam refugis
 Si tibi , si quamvis audes perferre laborem
 Magnanima , et duris casibus indomita ;
 Sat Pharias olim fuerit contendere ad oras ,
 Iuque Canopaeis degere littoribus ,
 Parce tuae nunc o Proli miserata : quid illam
 Excrucies ? lasso corpore languidula
 Ah ! nimium propero figens vestigia gressu
 In seutes quoties vulnificos pedibus ,
 Asperaque offendes in saxa ! dolebit et Infans
 Ah ! tener , ah ! vulnus sentiet ipse tuum ,
 Ingemet et gemitu audito. Si tantus Elisae
 Te consanguineae tangit amor , Sobolis
 Jam potior Mater tangat cura. An tibi vota
 Haec Puer in tacito suscitât ipse animo ?

Sic certe est: non haec ejus sine numine fiunt:
 Ille per ignotas te jubet ire vias.
 Tu ne illi baud parcas? Tu frondiferas convalles,
 Celsaque montanis edita verticibus
 Antra petas, illo invito? Non hoc tuus iste
 Non sinit in Puerum credere magnus amor.
 Nunc utinam comes ipse forem, ne sola viarum
 Scabra per, et saevos ingrediare rubos;
 Percurrens, quacumque ires, citus omne polirem,
 Virgo, solum, ne quid mollibus officiant
 Plantis aut silices, ramorum aut fragmina. Et o quam
 Perstarem tanto laetus in officio!
 Quamquam iter hinc esset longe tibi trans Atlanta,
 Trans Indum, trans et Caucaseam glaciem;
 Te sociâ, quid enim haud ausim? sed tute loquentem
 Deseris, et cupidum me renuis comitem.
 I, mea Virgo: regat sic te supremus ab alto
 Ille Pater, cujus fers utero Unigenam;
 Sic dius te servet Amor sic serviat uni
 Quidquid habet tellus, quidquid et axis habet.
 Nubila jam, pluviaeque absint: sol purior igni
 Splendeat, et, clarâ luce supervelitur
 Dum solito mage laetus, ubique hilares hyacinthi,
 Liliaque et violae suave magis niteant;
 Omnibus et rebus veniat nova gratia, et omnis
 Jam natura omnes pandat opes Dominae.
 Fallor? an et volitans rutilas huc ipse per auras
 Aligerum Gabriel agmen agit juvenum,
 Qualis formosos inter formosior ignes
 Occiduo lotus vesper in Oceano?
 O Nymphae bona jussa ferens qui nuncius axe
 Adstiteras nuper missus ab aethereo,
 Idem tu superos inter pulcherrime Divam
 Duc age, et in coeptâ sis comes usque viâ;
 Neve illi solis noceat vis acrior, alas
 Pande caput supra virgineum roseas:
 Pennarum objectu radii frangantur; at illa
 Gaudeat umbroso tramite ferre pedes.
 Interdum et platano subeat defessa, neque ultra
 Tendat iter, scabro praecipue e silice.

Muscus ubi et vario vestit se gramine tellus
 Versicolor, si fons lene sonans fugiat
 Saxa inter similis pellucidulae crystallo.
 Hic illa adsideat; seu velit aridulo
 Ore sitim relevare, oculos seu claudere somno:
 Ipse feret latices rivulus ad cyathum;
 Lumina dum lento trepidans fertur decursu,
 Ipse soporifero murmure fota teget.
 Omnia sint jucunda: hinc atque hinc saepe volantes
 Aligeri fratres germina odora metant.
 Et quacumque pedes Virgo feret, imbre rosarum
 Purpureo spargant desuper omne solum.
 Pars niveis Divae pedibus subjecta premetur;
 Ibit pars tremulis ludibrium zephyris:
 Qui dum frigidulo mulcentes aëra flatu
 Spirabunt, ramis teeta sub arboreis
 Suavior organico cantus dabit ore liquentes
 Daulias, absumpti non memor illa Ityos.
 Si velit et blandis tecum sermonibus horas
 Fallere, sermones cura tibi serere
 Sit, quoscumque animo scis ipse placere Puellae,
 Illam quos melius posse tenere putas;
 Ut minus ignoti gradiens fastidia callis
 Sentiat, optatam dum bona visat (1) Anum.
 Quae simul ac diam venientem a limine Nympham
 Viderit, occurrens protinus exiliet,
 Amplexusque ferens, atque oscula dulcia figens
 Haerebit Dominae collo, humerisque diu.
 Mox etiam proprio Deo jam numine plena
 Fatidicos vero solvet ab ore modos:
 Scilicet indignam (2) se se, quam candida visat
 Virgo eadem, ac magno foeta Deo mulier.
 At quae tibi proh! Virgo contra tu verba loqueris;
 Quam miranda, et quam (3) magnifica evolues!
 Felices quos tu dignaris visere; felix
 Et Mater, felix Matris et ipse Puer,

(1) Luc. cap. 1. ait ad Zacharias = uxor mea processit in diebus suis. etc.

(2) Luc. c. 1. = unde hoc mihi, ut etc.

(3) Magnificat anima mea etc. Luc. c. 1.

128
Qui jam longaevâ succrescit sanctus in alvo,
Matris et exultans rumpere (1) claustra cupit,
Praesentem ut videat, sibi, qua veniente, refulsit
Lux nova, et insueto munere dius Amor.

ELEGIA VII.

AD VIRGINEM DIVINO PARTU JAM PERFECTO.

Non ver florisferum ridet, non aura Favoni
Lene ciet pennis aequora purpureis;
At nunc Idumaeos late nix obruit agros,
Jordanisque alto constitit unda gelu.
Frigida et hybernae volvuntur sydera noctis:
Tu gelidae ingressa in pumicis hospitium
Ah qualem Puerum, Virgo, paris! o bona mater.
Quam (2) pulcher tuus est, quam puer hic similis
Est tibi! non certe matrem rosa, non amaranthus
Purpureo melius purpuream ore refert,
Parvus ubi explicuit molli de cortice frontem.
Ut capit, ut memet surripit ille mihi,
Huc istos blande quoties convertit ocellos,
Queis etiam posset frangere vim calybis,
Aut si quid calybe ipso usquam pote durius esse.
Vincor io: tantae ferre negant oculi
Mortales lucis flagrantia spicula: nosco
Numen, in humano corpore quippe subest;
Nec tacite prodit se se: velut obvia soli
Quum se se aut nubes, aut vapor opposuit,

(1) Exultavit in gaudio infans etc. Luc cap. eodem.

(2) Psal. 44 = Speciosus forma prae filiis hominum etc.
Nicephorus autem Cahistus hist. lib. 1. cap. 40. sic ait
= Persimilis denique per omnia fuit divinae et immaculae
suae Matri = .

Objectu et radios intercipit; ille corusci
 Quamquam interceptâ parte latet jubaris;
 Haud tamen omnino tegitur, nebulamque per ipsam
 Fundit inextinctas lucis ab axe faces.
 Sed Deus est quando Puer editus, hic ne jacebit?
 Nec minus hoc fuerat vilis in orbe locus?
 Hic igitur, Virgo, hic inter deserta ferarum
 Lustra pruinosis pervia flâminibus:
 Rupe sub hac scabris pendentibus undique tophis
 Nudus in agresti stramine pro violâ,
 Pro molli narcisso, pro languenti hyacintho
 Iste tuus ponat lactea membra Puer?
 Humani ille salus generis, spesque unica, longe,
 Proh dolor! humano pulsus ab hospitio est,
 Et tremit, et gelidâ vagit projectus in ulvâ,
 Aurea sydereo cui micat axe domus.
 Te tamen haud pudeat vili peperisse sub antro:
 Tantus ubi est Infans, tantaque ubi Genitrix,
 Illa capit sedes, quidquid formosius usquam est:
 Illa ipsis domus est æmula syderibus.
 Quin etiam tempus veniet, cum rupibus hisce
 Invideat tantum maxima terra decus:
 Nilus, et Euphrates, Ister, magnusque Garumna,
 Ille suam Aegyptum oblitus, hic Armeniam,
 Teutonicas arces alii, Gallumque potentem
 Hac fluere undisono tramite quam cuperent!
 Quam riguo rupes attactu has lambere! dumque
 Hac fluerent, solito lentior unda foret:
 Jam video et lapsis quaesitum oracula rebus
 Haec loca et Eoos, et petere Hesperios
 Trans freta, trans montes longe: quia Martia Roma
 Hanc septemgemino vertice suppliciter
 Exiguam colit ipsa specum, nil aurea curans
 Illa suo quondam templa superba Jove.
 Jupiter hic melior Puer est: latet ille, suumque:
 Hoc nascente, caput condidit in stygii
 Horrentes Erebi latebras, informe barathrum!
 Quo nos jam blandis egerat insidiis,
 Ni tu, dia Parens, peperisses: omnia nobis
 Sunt bona de tanto nata puerperio.

Ac gemitus, fletusque, atque anxiferi singultus
 Sunt versi in subitae gaudia laetitiae.
 Pax regnat, pax alma viget; tuque inclyta magnum
 Virgo in Achemeniis nomen habes domibus.
 Laeti adsunt, en certe adsunt, ducentibus astris,
 Non rude pastorum vulgus, et agricolae;
 Ast Arabum (1) proceres delecti, prima virorum,
 Qui tibi, qui Puerio ditia dona ferunt
 Littoribus longe a patriis. Hos tu, bona cernes
 Quam Gnati ambrosios procidere ante pedes,
 Lactanti excipiens vultu solabere; et o quam
 Dimittes hilares rursum in Arabiam!
 Illi felicem te dicent; unaque certe
 Matres tu felix mater es ante alias,
 Quae tantum edideris Puerum, cui contigit uni
 Tale decus. Gremio tu ne fovere Deum?
 Tu potes et diæ acclinis dare basia fronti,
 Inque os lac niveis exprimere ab uberibus?
 Ille tibi arridet, teque obtutu fixus in unâ
 Gaudet tam de se^mcernere sollicitam;
 Ac matrem agnoscit tendens sua brachia, et ora
 Cum movet: o quantum te: mea mater, amo.
 Dicere hiantem videtur jam jam velle labello,
 Atque tuo illius pendet ab ore anima.
 O si quid merui, vatis subeat quoque cura;
 Blando me me oculo fac Puer adspiciat,
 Fac quoque ut, foedum sit quamvis, hoc capiat cor:
 Si capiet, nivibus purius illud erit;
 Nec mihi jam posthac, tibi vivam at, Virgo, tuoque
 Huic Puerio, quo nil extat amabilius,
 Seu gelidum resonis implet vagitibus antrum,
 Lactea seu ridens ubera forte petit.

(1) Ecce Magi ab Oriente venerunt. Joh. c. 2. et Psalm. 71.

= Reges Tharsis et insulae munera offerent, Reges Arabum etc.

ELEGIA VIII.

AD VIRGINEM SE IN TEMPLO LUSTRATURAM.

Etsi Amor aethereâ gravidam te fecerit aurâ,
 Dius et intacto prodierit gremio,
 Naturâ mirante, Puer, qualis vitreum lux (1)
 Effluit innocuo tramite per speculum,
 Aut pellucidulam per aquam, tamen, o mea Virgo,
 Candida, et a partu purior ipsa tuo.
 Tu ne etiam matres inter lustranda profanas
 Alta Palestinae templa petis Solymae;
 Cura nec ulla subest, ah te ne, ignara virorum
 Turba putet reliquis matribus assimilem,
 Vulgaresque inter ponat male? Quo tuus ille
 Nunc magnus cessit virginitatis amor?
 Quo tua fama? istâ non certe lege teneris:
 Lex ea in immundum lata puerperium est.
 Nulla in te humanae fuerunt (2) contagia labis:
 Nulla itidem in purâ culpa pianda manet
 Atqui etiam geminas dulci fers dona columbas
 Pro Gnato, niveis qui tibi ab uberibus
 Abstractus patrias jam jam sistetur ad aras,
 Ac superos terris paeificabit heros.
 Hic aliquid certe majus latet: eja age custos
 Aurato templi cardine pande fores.

(1) S. Basilus orat. in nativ. Christi = eandem ad similitudinem = et Corn. a Lap. in cap. 2. Lucae.

(2) S. Bernardus Serm. 3. de Purificatione sit = Nihil in hoc conceptu, nihil in partu impurum fuit, nihil illicitum, nihil purgandum vere, o beata Virgo, vere non habes causam, nec tibi opus est purificatione = .

Thure vaporatam, lustrali et rore Parentem
 Excipit, quaeque tulit munera suscipias.
 En subit ille: venit jam Virgo. Piacula prima
 Facta. Licet sanctâ ponere in aede pedem.
 Quisque locum tibi cedit, et admiratur euntem.
 Tu dejecta solo lumina, corde preces
 Concipis et tacito, pudibundo incedis et ore
 Admissae veluti conscia si maculae,
 Multarum una fores veluti si foemina: mirum
 Ah! frustra quaeris jam decus oculere.
 Te vultus tacitam prodit tuus. Aspicias? Unam
 Te cupit, in te inhians ille Senex oculis
 In mediâ gestit solam te visere turbâ:
 Ut magnae praefert gaudia laetitiae;
 Utque tuum amplexu Natum petit! o bona Mater,
 Felicem optato pignore redde Senem:
 Ne renuas cupido tantisper tradere Natum.
 Dic age, quid viso tantum inhias Puero?
 Quid tantum in pulchra tibi mens stupet Heroinâ?
 Certe est et soboles nota tibi, et genitrix.
 Ac veluti Eridani ripis, aut Asia circum
 Flumina vicini conscius interitus
 Laetior ingeminat jucundo gutture cantus
 Albus olor: resonant et nemora, et sylvae:
 Tu quoque sic nimium felix jam morte sub ipsâ
 Fatidica ad suaves ora modos aperis.
 Scilicet haud vitam producere (1) longius optas,
 Cum jam pollicitam videris aethereo
 Semine Progeniem, nostrum quae sanguine crimen
 Eluet, et claro lumine discutiens
 Noctem atram, late magnum quae sparsa per orbem
 Mortales misere nigra acies hebetat,
 Plorantesque, vagosque, et tantae lucis egentes
 Nos ducet sedes Caelicolum in superas;
 Ulla nec Oceano tellus extrema refuso
 Illius sese subtrahet a radiis.

(1) Accepit eum in ulnas suas, et benedixit Deum, et
 dixit = Nunc dimittis servum tuum Domine etc. = Luc.
 cap. 2.

At quos tu memoras luctus? quae (1) dira parenti
 Supplicia? anne ullus tam ferus extiterit
 Qui non depereat puerum, qui mollia matris
 Transadigat ferro pectora luctificos?
 Ah metuas ne, Virgo: tibi jam pignora reddit
 En Senior: quin tu sancta, quod instat, age:
 Siste Patri Unigenam, cujus nunc fama feretur
 Inclyta trans ludos; trans et Hyperboreos;
 Cumque suâ matris quoque fama vagabitur ingens;
 Magnanimum superis hoc, bona, si dederis
 Munus, Diva. Videsne altum descendere coelum,
 Mirari et cupido lumine coelicolas
 Jam non infestos mortalibus aerumnosis?
 Ipse Deum tanto munere jam Genitor
 Gavisus ponit minitantiâ fulgura dextrâ;
 Ostia pro innumeris millibus una sat est.
 O factum bene! Progeniem tu sistis ad aram.
 O Puer, o humani unica spes generis
 Rite Sacerdotum manibus nunc victima Patri
 Dum tu magna volens sisteris, o nimium
 Felicem his me si vinclis, si corpore solvas!
 Primus uti in sedes nuncius Elysias
 Adveniam, atque idem spectaclî testis, ego hisce
 Vidi oculis, dicam, vidi egomet, Proceres
 Isacidae o fidi, Puerum, quem saepe vocastis
 Solliciti multis non sine muneribus;
 Quem fore victorem, quemque unum nostis Olympo
 Vos posse, ac rutilis reddere syderibus.
 Ipse Patri se devovit: Natum optima Mater
 Obtulit immortale ausa animo facinus.
 Audiet Heroum haec hilaris chorus: audiet Heva,
 Illi et manabit conscius ore rubor.
 Sin, hoc ne immeritus possim contingere votum,
 Abnuis, at liceat dicere carminibus
 Matrem, Sancte, tuam: licet mē ferre per ora
 Haec ipsius facta, atque alia, atque alia.

(1) Ecce positus est hic in ruinam et in signum. Cui
 contradicetur, et tuam ipsius animam pertransibit gladius etc.
 Luc. eodem cap. 2.

Tuque cris in carae Matris pars carmine magna:
 Suavius admixtum nomen utrumque sonat.
 Annuit ecce Puer voto, tuque annue, Virgo;
 Donaue fac rata sint pro pietate meâ.
 Omnia jam sperem: nihil est potis illa negare,
 Quae modo pro me Gnatum obtulit ipsa suum.

ELEGIA IX.

AD VIRGINEM STANTEM JUXTA JESU CRUCEM.

Si quid mē vere miserum contingere, si quid
 Mī potuit, fixo vulnere quod penitus
 Ipsam sedem animae laniaret; contigit eheu!
 Id certe cum te, laeta prius Genitrix,
 Laeta, et eunectarum fortunatissima matrum
 Hic video, hic cari supplicium capitis
 Spectantem, et lethum, quo non crudelius ullum,
 Nec mage probrosum jam queat accidere.
 Vae miserae! quali dicam te fervere luctu,
 Curarum quantis millibus intus agi?
 Quamque alto absorbens aerumnae (1) vortice amaror
 Tristis in abruptum te pepulit barathrum?
 Nam mihi quid matrem (2) memorant Ismaelis? et illum
 Quid nati postquam (3) sanguineas retulit

(1) Juxta illud Thr. 2. = magna est velut mare, contritio tua etc. = cum prius dixisset Jeremias = cui assimilabo te, aut cui exaequabo te, filia Jerusalem?

(2) Intellige Agar, cujus in Genesi fit mentio cap. 16.

(3) Tulerunt autem tunicam ejus, et in sanguine hoedi, quem occiderant, tinxerunt scissisque vestibus indutus est

Exuvias fraterna manus, patrem externatum
 Et gemitu, et luctu perduto? uterque dolor
 Magnus, at aequandus non isti: vincis ut omnes
 Proles amore, ipsâ et moestitiâ superas.
 O mater, quid jam mater? Tunc illa beata,
 Aetherea et felix dicta parens sobole?
 Tunc illum edideras, quo non formosior alter,
 Non erat in terris alter amabilior?
 Heu, nimium brevis ille fuit decor; heu nimium flos
 Ille cito casu languit aridulus!
 O ubi caesaries flava est, ubi candor, et ille
 Purpureus niveo mixtus in ore color?
 Quale rosis lac puniceis si sparserit, aut si
 Ostro inflammavit candidulum quis ebur.
 Ubi ubi delituit species? ubi lumina, sydus
 Ah! geminum, et dulci dulcia melle magis
 Verba, leposque, quibus per frondiferas convalles,
 Perque juga, et saltus, et nemora, et scopulos
 Attonitum, oblitumque lares, ac tecta trahebat
 Post sese dio vescier alloquio
 Optantem vulgum. Vix ipsum agnoscere mater
 Nunc potes: effusus lurida membra cruor,
 Liventesque notae flagorum unde undique foedant,
 Vulneraque inflictis addita vulneribus,
 Ulla nec in sacro pars integra corpore restat,
 Nullaque vulnifico pars caret exitio.
 Tempora, prohi! spinis cohibet paliurus acutis;
 Harum aliae infixâ cuspide per cerebrum,
 Perque genas fecere viam, miserabile visu,
 Horrendumque! oculos per medios aliae
 Luctificam exertant aciem, madidamque cruore:
 Qui partim guttatim imbre fluit tepido;
 Partim etiam undanti rivo per membra volutus
 Uberrime duos irrigat et lapides.
 Nate Deo, ah, nimium fluxit jam sanguinis, ah! jam
 Parce, precor: cur nam te amplius excrucies?

(Jacob) cilicio lugens filium suum (Joseph) multo tem-
 pore noluit consolationem accipere; sed ait: descendam
 ad filium meum lugens in terram etc. Genesi cap. 37.

Tanti igitur mortale fuit genus? huccine tandem
 Nostra salus; huc te nostri amor abripuit?
 Poenarum satis exhaustum: jam desine, et ipsi,
 Ne tibi vis matri, lux mea, parce tuae:
 Quae moesta attonitos nusquam declinat ocellos
 A te jucundo Germine; nil loquitur:
 Sed stat, et (1) aegrescens pallet ceu saxeae, fletus
 Et premit (2) aegrescens, saxeae uti effigies.
 Nempe et verba dolor, moesta et suspiria magnus
 Obruit, atque ipsis clausit iter lacrymis,
 Ne quod sollicitae lenimen forte veniret,
 Neu minor in penito cura animo fureret.
 Una duos dabit exitio, lux ipsa Parentem
 Heu, rapiet, Gnatum quae rapit exanimem.
 An non suffixum sic foedo in stipite Mater,
 Sic te discerpto corpore suspiciens,
 Pallentemque, aegrumque, et lethi limine in ipso,
 Protinus ereptis sensibus ipsa cadet?
 Infelix: non certe illi praecordia circum
 Stat lapis, aut duro dura riget chalybe.
 At rigeat: tellus nonne ipsa excita dolore
 Bruta cavernosis ingemit e latebris?
 Velle minatur et horribili subsidere hiatu
 In Styga: flent montes, fluminaque, et nemora.
 Neu tantum adspiciat Titan scelus, obruit atro
 Axe jubar, nigram conditus in nebulam,
 Ardentesque oris radios extinsit, et auream
 Detrahit flavo caesariem capiti
 Umbrarum per opaca horrens, cui sanguine sparsa
 Jam soror atratos obviam jungit equos,
 Inducitque polo stellas, quae triste micantes
 Funereas referunt, nocte silente, faces.
 Quid Mater? quae dira suos quot vulnera Natus.
 Corpore habet totidem saucia sentit amans

(1) Ioh. cap. 19. = Stabat juxta crucem Jesu Mater ejus, et soror etc. =

(2) Juxta illud S. Ambrosii Consol. in Valentin. obit. dicentis de eadem = Stantem lego, flentem non lego etc.

Cuncta suis impressa locis. Amor insidet illi
 Et laevo in miserae sculpsit atrox latere
 Exanimem Nati effigiem, teloque cruento
 Ipsius usque instans pectora transadigit.
 Ferreus, ah! certe est, et ferro durior ille,
 Qui tantam potis est cernere saevitiem!
 Parce, amor, o quovis crudelior hoste secare
 Multifido innocuae Virginis ense sinum.
 Ecce suae in Matris noscit se pectore Gnatus,
 Illa refert Gnati vulnera quaeque sui,
 Sauciat atque parens gnatum, gnatusque parentem:
 Alter et alterius pendet ab ore tamen.
 Num nam etiam audebit cari moestissima Virgo
 Perferre extremum Pignoris interitum?
 Ipsaque frigidulos manibus componere ocellos,
 Sparso et sanguineas tergere crine notas?
 Illinc, ah, cede procul: Gnati latus impetit hastâ
 Miles, et aeratâ cuspide cor terebrat.
 Ah, procul hinc concede! A parvâ Virgine noram
 Magnanimam, sed quae maxima jam potuit
 Esse, fuit virtus: simul ipsa animam exhalabis
 Cum Nato, ipsa cades victa dolore simul.
 Jamque labat: comites o fidae abducite Divam;
 Nullus et extincti nuncius adveniat.
 Incolumem servate: illi dum causa doloris
 Filius, edomitâ morte Erebiq; duce
 Victor ovans clarâ det sese in luce videndum,
 Spargat et optatae munera laetitiae,
 Ante alios Matri ostensus, cujus mihi luctus
 Nunc ipsam et vocem surripit, atque animam.

ELEGIA X.

AD VIRGINEM TERRIS DISCESSURAM.

Quod mihi curarum saevis tot fluctibus acto
 In vitâ reliquum dulce levamen erat,
 Coeperat et quo uno mitescere tristis amaror,
 Atque dolor fieri in pectore jam levior,
 Sollicitum qui me tenuit, qui mi expulit omnem
 Laetitiam, ac suaves delicias animi,
 Ex quo deseruit tua nos illa aurea Proles,
 Ille Deus magni Numinis Unigena;
 Id quoque nunc raptum, Virgo, mihi : scilicet ipsa
 Coelicolum properas addere te choreis
 Astra super, longe a terris flaminantia templa :
 Gaudia tecum una, tecum abeunt charites,
 Et nostras quaecumque valent solatia mentes
 Lenire, et tristem demere moestitiam :
 Nam qualis per prata, nigrae post nubila brumae,
 Post et Threicii saevitiem Boreae,
 Lenior aspirans genitabilis aura Favoni
 Surgit adorato Chloridos e thalamo;
 Aut qualis tumidum nautis pavitantibus aequor
 Lucida hyperboreo stella sub axe micat;
 Talis erat nobis, Virgo, tuus, aurea, vultus,
 Tali praesentes usque juvabat ope.
 Scilicet una aderas mortalibus aerumnosis,
 Quacum nil illis triste timere fuit;
 Qua sine nec gratum contra, nec amabile quidquam est;
 Cui me, cui flentes deseris, ah, socias
 Thaboridas Nymphas, Nymphas Libanitidas? Esse
 Profuit expertem quid patrii sceleris;
 Quid magnum intactâ Numen genuisse sub alvo,
 Non minus ingratae funera Persephones

Ipsa etiam si tu subeas, fatoque peremta
 Heu! propero hinc alias abripiare plagas.
 Nonne tuum est quodcumque vides? Tibi sydera mundi,
 Hic varius rerum vertitur ordo tibi;
 Et perfusa tuo formosa est lumine tellus;
 Adspectu et recreas quidquid ubique viget.
 Omnia quae contra nunc squallent; omnibus omnis
 Effugit e rebus, te fugiente, decor;
 Atque atrae adparent facies: ipse ignea Titan
 Auricomus rutili languidior jubaris
 Spicula diffundit; quae dum sublimis ab axe
 Lustrat Idumaei Thaboris hospitia
 Eque tuis, Virgo, succendere suevit ocellis,
 Et fieri adspectu clarior ipse tuo.
 At non ille miser, neque enim pote noscere damna;
 Nas miseri, nos hic perdidit interitus.
 Qui bona quot rapuit nobis, tot munera laudum,
 Tot tibi nunc merita gaudia laeta feret:
 Ut quae una hic fueras pulcherrima formosarum,
 Sis quoque in aethereâ maxima honore domo.
 Debuit anne diu in terris haec forma morari,
 Aut laude haec virtus tanta carere diu?
 Hoc igitur quamquam sit continuis lamentis
 Deslendum nobis flebile dissidium,
 Jam non et doleo, laetor magis: anne Parentis
 Aetherae meritis laudibus invideam?
 Jam pridem o coelo digna, et fulgentibus astris
 I, Regina, domos ingredi o superas.
 Sat tellus tibi culta diu est: nunc regia coeli
 Te vocat effuso celicolûm thiaso
 Effulgens late: tibi plaudunt sydera, et una
 Aurea flammeolo (1) sarta parant capiti
 Ecce altae patuere fores: viden' omnia Divûm
 Agmina in occursum laeta volare tuum.
 Ardenti viden' ut taedas dum quassat olympo,
 Pulcrâ Amor ut pulcher fulgeat in clamyde?

(1) Apocal. 12 Et in capite ejus corona stellarum duodecim etc.

Ille praeit nubem, qua tu levis astra subibis,
 Flaventis rutilam lumine chrysoliti,
 Ac variis mirâ arte coloribus intertextam,
 Iris ceu suevit fulgere versicolor.
 Qui fremitus circa comitum, quae carmina, quantus
 Undique odor suavis funditur ambrosiae?
 I felix; verum ipsa inter tot culmina laudum,
 Tantaque coelestis gaudia concilii,
 Si bene quid de te merui, ne sperne jacentem,
 Neve sine immemori me effluere ex animo.
 Ah, procul iste metus! non es, quam gloria mutet:
 Hinc cedes, nostri sed memor usque feres (1)
 Sydereo magni e solio Regina Tonantis
 Optatam in duris provida rebus opem.
 Usque aderis terris: sua per te fulmina ponet
 Jam Deus; et fontes pandet opum omnigenos,
 Orantem quoties blande conspexerit: isti
 An Matri quidquam deneget Omnipotens?
 Sed levis ex humili surgens tellure per altum
 Jam veheris, jam nos deseris aethereis
 Circumfusa choris, rutilasque evecta per auras
 Languidulis te te subtrahis ex oculis.
 Jamque lates: qualis (2) quondam quum suave halans
 thus
 Uritur, aut tosti gramen Achemenii,
 Excitus ille solet multo vapor igne per aras;
 Qui late in campos diditus aërios
 Fragrantique hilarans minus, atque minus loca odore
 Spectantùm cupidâ defluit ex acie.
 O ubi es? ah liceat nutantibus aëra pennis
 Findere, et aurati limen adire poli,

(1) S. Bernardus serm. de Nativit. Virginis = Sic est, ait, voluntas ejus, qui omnia nos habere voluit per Mariam: et Augustinus = Sicut omnibus sanctis est potior, ita omnibus sanctis pro nobis est sollicitior etc. =

(2) Quae est ista quae ascendit per desertum sicut virgula sumi ex aromatibus myrrhae, et thuris, et universi pulveris pigmentarii etc. = cap. 8. Cantic.

Aligeros inter juvenes quum regna triumpho
 In tua regifico vecta pedem intuleris ;
 Quumque tibi dulci(1) occurrens cum Coniuge Proles,
 Ostendens et opes, quas habet illa domus,
 Imperii sociam, bona Diva, acceperit. Ut te
 Coelicolae adtonito lumine suspicient
 Ut subito impleri laetum dulcedine pectus
 Quisque novâ adventu sentiet, alma tuo !
 Ipsa autem immenso divini in lumine vultus
 Absorpta ut penitis sensibus exilies !
 Cur tenet, ah, tellus ? utinam super aethera vectar.
 Aoniis valeat lympa petita jugis.

(1) Quae est ista, quae ascendit de deserto, deliciis affluens
 intixa super Dilectum suum ? Cantic. cap. 8.



DEI GENTRICI MARIAE

REGINÆ CÆLESTI

FRANCISCI MARIAE ZANOTTI

ELEGIÆ XIII.

ELEGIACORUM LIBER III.



AD ANIMAM

B. MARIAE VIRGINIS

IN IMMACULATO EJUS CONCEPTU.

ELEGIA I.

O una ante omnes, quot sunt, pulcherrima formas,
 Quas Deus in tacito versat adhuc animo,
 Expectata diu terris, postquam arbore sacra,
 Anguis tartarei femina capta dolis
 Ausa est, heu miseram, letale excerpere pomum,
 A quo sunt nobis omnia nata mala;
 Ah si quid nostri miseret, demittere ab alto
 Jam caelo, et rebus, quod potes una, hominum,
 Et misero succurre orbi: quid lenta moraris?
 Quin Annae castum laberis in gremium?
 Hic te formosum puro de sanguine corpus
 Membraque virgineo plena decore inanent.
 Ac si te virtus, et gloria tangit avorum,
 Et placet antiqua nobilitate genus,
 Non te poeniteat Davidis de semine natam
 Dicier: in mediis sit licet ortus agris.
 Ille ursos fertur, fertur domuisse leones,
 Nec Philistaeum pertimuisse minas
 Tempore, quo Isacidum turmas perterrituit omnes
 Unus terribili maximus ore gigas,
 Qui cum totam aciem nequicquam in bella vocaret,
 Ecce puer flavus prodiit in medium.
 Non me, neve Deum posthac contempseris, inquit:
 Tum fundae praedurum imposuit lapidem,
Car. Delect. V. I.

Quem deinde exsultans ter circum tempora volvit,
 (O miros ausus!) inque feri faciem
 Conjicit, et fulva Goliattem extendit arena.
 Ipse Saul tanto obstupet in puero.
 Et tibi, si in sanctae ventrem te immiseris Annae,
 Laus erit in proavis hunc habuisse tuis,
 Heroasque alios illa de stirpe creatos,
 Magnanimos reges, magnanimosque duces,
 Quos tecum recoles, materna condita in alvo;
 Admirans generis grandia facta tui.
 Et te laudabunt illi. Gaudebit Jacob
 De sibi vel seram progeniem fieri,
 Agnoscetque suam Rachel pulcherrima neptem.
 Ah! propera, et membris jungere, Diva, tuis.
 Neu timeas, ne quod veteri de crimine in illis
 Aut vitium, aut macula vel levis insideat.
 Nam fibras omnes cordis, cerebrique recessus
 Omnes, et sedes atque vias animi,
 Quas vetus illa lues solita est contingere, cunctas
 Terque quaterque suis tersit Amor manibus,
 Virtutunique aderat chorus: et Spes nescia falli,
 Et quae Spem nunquam non praeit, alma Fides,
 Quas comitabatur caelo delapsa sereno
 Gratia, stellanti corpora veste tegens,
 Quam simul ut vidit venientem lethifer anguis,
 In stygium se se proripuit barathrum.
 Quare age, Jesseis laus accessura puellis,
 Spes hominum, felix atque potens Anima,
 Advenias bona jam, atque infans pulcherrima lias,
 Virgo olim magno digna futura Deo.

B. MARIAM VIRGINEM

NASCENTEM.

ELEGIA II.

O quam nascentem primum nunc excipit orbis,
 Quae missa e caelo, dia Puella, venis,
 Ah nostri ne te capiant fastidia mundi,
 Sit licet antiquo implicitus scelere;
 Nam quocunque tuos vertes, pulcherrima, ocellos,
 Diffugient fraudes, diffugientque doli.
 Quam bene, dum casta mater te ferret in alvo,
 Pressisti inferni triste caput colubri,
 Qui frustra in tenera culpam quaesivit Adam!
 Ex illo te unam tartara nigra tremunt.
 Nec tibi sollicitae audelunt se ostendere curae,
 Quae circum humanos pervolitant animos.
 Spectandum interea magnus tibi se dabit orbis,
 Quem mira aeternus condidit arte Pater.
 Aspice, quos pariat rebus lux alma colores,
 Unde suum accipiunt corpora quaeque decus.
 Illam sol rutilus caelo diffundit ab alto,
 Purpureum roseo dum vehit axe diem,
 Qui postquam occiduis praeceps se condidit undis,
 Succedit tacitis humida nox pedibus.
 Ac tum stellarum juvat adspexisse choreas,
 Quas ducit niveo lumine luna micans.
 Hanc tibi, si nescis, similem dixere parentes,
 Natalem prisci quum cecinere tuum,
 Nam claram illius faciem purumque nitorem
 Contulerunt formae, pulchra Puella, tuae.

Sed si te videat, non jam se conferat illa;
 Quamvis et soli certet, et astra regat.
 Neve aurora tibi, neu se tibi comparet Iris;
 Optatum quamvis illa diem referat;
 Haec etiam terris, ut sunt oracula vatum,
 Antiquae memoret foedera amicitiae.
 Namque olim pluviam immensam Regnator olympi
 Misit, ut humanum perderet omne genus.
 Sed caeli sacer interpres, doctusque futuri,
 Sensit venturas ante Noemus aquas,
 Et sibi labentem fecit super aequora currum:
 Qui, postquam nimborum ille furor posuit,
 Aequoris incertus, longisque erroribus actus
 Verticibus tandem sedit in Armeniis.
 Viderat Omnipotens illum; nec sit mihi dixit,
 Unam, quae reliqua est, perdere velle domum,
 Hanc servo. Servaboque. Iris sit mihi testis.
 Audiit haec Iris, et bona verba probans
 Continuo mirum duxit sub nubibus arcum,
 Aeterno memoret qui sua pacta Deo.
 Hanc inter nubes quam te spectasse juvabit?
 Dum spectas; quaeso, nubila nulla tonent.
 Fulgura nec, caelum, misce; nec fulmina jacta;
 Dissolvi lentas sit satis in pluvias.
 At tibi ne tantum placeant, divina Puella,
 Caelestes tractus, nubiferaeque domus.
 Est etiam terrae sua laus. Illic prata virescunt:
 Illic pubens multo flore renidet humus.
 Illic caelo surgens se frondibus induit arbor,
 Qua fons irriguis gramina lambit aquis
 Nec te peniteat, veniet quum firmior aetas,
 Ardua Carmeli per juga ferre gradum,
 Et procul aerias Solymorum cernere tures.
 Te cava frondosi Thaboris hospitia,
 Te Libani expectant, si non contempseris, umbrae.
 Sedit in his quondam maximus ille David.
 Illic Salomon, dum te venientem expectat, amores
 Est solitus teneris ludere carminibus.
 Illic sacri vates unam te saepe vocabant,
 Mœrentes, longas temporis esse moras.

Tunc laudes resonare tuas, et dicere nomen
 Jerichus, et celsi rura beata Cades,
 Et cupressiferi didicerunt antra Sionis.
 Ah, quae te norunt, ne loca despicias.
 Quod si, Diva, oculis terram dignabere nostram
 Aspectu fiet pulchrior illa tuo.

AD

B. MARIAM VIRGINEM

SE:SE IN TEMPLO OFFERENTEM.

ELEGIA III.

Quo te, Virgo, rapis, pulcherrima? Siccine matrem,
 (Heu miseram matrem) deseruisse potes?
 Quae te ferre sinu, tibi quae narrare solebat
 Tam multas prisci temporis historias?
 Quid miserae fiet, quum tu discesseris? unum
 Crèdin' eam sine te vivere posse diem?
 Sic ego dicebam. Illa sacras properabat ad aras,
 Indignata hominum Diva habitare domos.
 Ceu globus obscura interdum sub nocte coruscans
 Emicat, et nubes transvolat aérias,
 Qui turres super excurrrens ac tecta domorum
 Omnia perfundit lumine purpureo.
 Attollunt homines vultum, quid luminis id sit
 Ignari, et flammam conspiciunt volucrem;
 Ast illa interea haud longo secut aera cursu,
 Et subito sese proripit ex oculis.
 Haud aliter, superum dum vult invisere sedes,
 Concita divino numine Virgo abiit.

Excepit Deus ipse illam, de limine templi
 Obvius, inque domo condidit ipse sua.
 Anna parens, tenerae curam jam pone puellae.
 Terge oculos. Te cur amplius excrucias?
 Si nescis, nunc illa boni praecepta magistri
 Audit, perque artes excolit ingenium.
 Et studium est illi aut sacros exscribere libros,
 Et minio primas fingere litterulas,
 Aut annos numerare, et nomina discere regum.
 Postea quae servat pectore sub memori,
 Et modo ut Omnipotens mundum formaverit, utque
 Peccarit vana conjuge falsus Adam
 Accipit, et miserae fortasse irascitur Evae.
 O Eva infelix, quod tibi consilium,
 Quae ratio fuit, ut funestum carpere pomum
 Velles, et caro porrigeres juveni?
 At tu, Virgo, genus licet illa infecerit omne,
 Ignoscas; non te dira lues tetigit.
 Nos miseri urgemur fato, nobis scelus illud,
 Et mors, et luctus cum scelere incubuit.
 Qui tamen ut sumus, annales ne despice nostros;
 Volvere neu libros taceat Isacidum.
 Invenies illic, veterum dum facta parentum
 Colligis, atque tuos sedula quaeris avos,
 Quam multae exstiterint nostra de stirpe puellae.
 Praestantes forma, et pectore magnanimo.
 Sed neque te Rachel, fidum quae torquet Jacob,
 Nec quae jura suis Debora dat populis,
 Nec te detineat Jahel, nec fortis Judith,
 Sit quamvis caeso nobilis Assyrio:
 Invenies aliam, quam post volventibus annis
 Venturam vates praecinuerunt sacri,
 Quae stellas ante et solem lunamque creata,
 E caelo veniet missa Deo mulier,
 Praeclaram ut pariat sobolem, et scelus expiet Evae.
 O felix! quantum ventre geret puerum!
 Huic uni assurges, atque hanc veneraberis unam,
 Omnibus hanc unam matribus anteferes,
 Dignam, cui placida Jordanus serviat unda,
 Aurea cui dives munera mittat Ophir.

Dum tamen hanc legis, ab Nati ne funera quaere.

Hei mihi, quos luctus continet ille locus!
Neu cupias, si quem misere et post verbera longa

In cruce suffixum forte legas juvenem,
Infandum scelus, et crudelia discere facta.

Quaere illos potius, pulchra Puella, dies,
Quum tumulo surgens divinae Matris alumnus

Regnabit tandem victor in arce sua,
Et claustra umbrarum franget, domitique draconis
Infiget caeli postibus exuvias.

Tunc sibi stellanti cinget diademate frontem
Mater, et incedet maxima coelicolum.

AD

B. MARIAM VIRGINEM

AB ANGELO SALUTATAM.

ELEGIA IV.

Nam quid te rerum, Virgo pulcherrima, terret?

Quid subitus tacito pallor in ore sedet?

Quem spectas, qui te alloquitur, tibi missus ab alto

(Exue dia metum) nuncius Ales adest.

Is levibus pennis tranavit nubila caeli:

Et verbis magni te rogat ille Dei.

An votis igitur, et spe frustratus inani

Moereat, inque domos coelicolum rediens

Non potuit, dicat, Virgo purissima flecti,

Non potuit. Voces respuit illa meas?

At non hoc Abraham, non hoc speravit Jacob:

Non tuus ille David, quem cecinisse ferunt

Olim Jessea venturam e stirpe puellam ,
 Quae fama una omnes vinceret Isacidas ,
 Communem humano generi paritura salutem.

Omnia quae perdant diripiantque noti ,
 Caelesti si tu Puero parere recusas.

At, sanctus pulchrae virginitatis honor
 Te capit. An Virgo non tu servabere? Quod si
 Spes est vana : rubum quid mihi vel Moysis ,
 Quid mihi vel narrant Gedeonis nobile vellus?

Ah, Virgo, aethereo adnue jam Puero.
 Adnuit; et roseos vultus, oculosque modestos
 Demittens, ut vis, sic mihi fiat, ait.

Quod simul ut dixit, magno concussa fragore
 Moenia sunt mundi. Jam Deus ecce Deus
 E coelo ruit, et sanctos illabitur artus;

Ac dum sese utero miscuit Omnipotens ,
 Concepit sacrum Virgo sine semine fetum.

Natura id fieri sensit; et obstupuit.
 Non secus atque olim audita quum voce Tonantis
 Obscuris subito e latebris nihili,
 Miratus formam ipse suam, novus exstitit Orbis.

Ac visae primum tunc pecudum facies
 Per solos errare agros, pictaeque volucres
 Ignotis nidum ponere in arboribus.

Et jam sol rutilus magno incedebat olympo:
 Volvebant se se sidera in oceanum.

B. MARIA VIRGINE

ELISABETHAM VISENTE.

ELEGIA V.

Haec igitur juga, et hos scabros conscendere montes
 Audeat ignotas Virgo secuta vias!
 Atqui illa nec candidior neque mollior ulla est.
 Et nova virgineo pondera fert utero.
 Nam modo, quum vis illi insederit Omnipotentis,
 Ipse Deus castum se intulit in gremium.
 Tu, Gabriel, tu nempe auctor, tu causa laboris:
 Qui ut carae venter creverit Elisabeth,
 Narrasti ignarae: tunc illi iniecta cupido est,
 Ut longe absentem visere vellet anum.
 Quanti erat id reticere! en ut studiosa abeundi
 Jam patitur nullam pulchra puella moram.
 Ah illi, o cunctos inter pulcherrime divos
 Magne Ales, longae sis comes usque viae.
 Et quacumque ierit, teneram defende puellam,
 Ne sol, ne capiti frigida nox noceat,
 Neu serpens, neu quis morsu canis appetat illam.
 Ac nimium, superat dum juga, ne properet,
 Injice sermones jucundos inter eundum.
 Scis tu, virgineum quae capiant animum.
 Forsitan ut notum decus oris viderit, et te
 Aligeris unum noverit e pueris,
 Ipsa rogans quaeret, quid agatis in aethere summo,
 Ut sua traducant tempora caelicolae.
 Tu nil celabis: mores et munera divum
 Narrabis; regnum noscat ut illa suum.

Scire etiam valet, interea dum montibus altis
 Ipsa errat, rerum quid gerat Elisabeth :
 An neat, an pulchro variet velamina textu,
 An potius libros, ut solet, illa legat;
 Adventumne suum ignoret, an nuncius illi
 Sidereis de se venerit e domibus.
 Ipsa quidem agnatae, dum mollia stamina nectit,
 Ex improvise mallet adesse suae;
 Quae subito adventu carae perculsa puellae
 Protinus excusso prosiliet calatho.
 Dum se se amplexu excipiunt, atque oscula miscent,
 Nec bene compressis ora rigant lacrymis,
 Ah tu sermones jam, Gabriel, insere nullos.
 Altera ab alterius pendeat alloquiis.

AD

B. MARIAM VIRGINEM

DE EJUS PARTU.

ELEGIA VI.

Quam pulcher de te, bona Virgo, prodiit Infans !
 Dispeream, si quid pulchrius esse potest.
 Quam similem, si te videas, tibi dixeris esse ?
 Purpureas, ut tu, sic habet ille genas,
 Os movet, et blandos, ut tu, convertit ocellos,
 Ah quae tam pulchrum, diva Parens, Puerum
 Edideris, scabro non te peperisse sub antro
 Taedeat, immundi neu pudeat stabuli.
 Auguror. Hoc toto stabulum celebrabitur orbe;
 Jamque in memnoniis nomen habet domibus :

Jam veniunt (audistin' equos currusque sonantes?)

Magnanimi veniunt, qui tibi dona ferant,
Primores Arabum, et rupem hanc stabulumque requirunt.

Scilicet et seris munera temporibus.

Innumeri huc mittent populi: et quas maximus

Ister

Alluit, et qui Athesin Eridanumque bibunt.

Eventura cano en sacris dejecit ab aris,

Et veteres, ridet maxima Roma Deos,

Et verum agnoscens divumque hominumque parentem,

Natalem sancti concelebrat Pueri.

Aspice, ut imponit simulata altaribus antra,

Addit et e paleis effigiem stabuli,

Bethlemiasque colit rupes sub imagine parva:

Stat circum effusi maxima vis populi,

Arrectusque piis praebebat sermonibus aures,

Quos recitat pavidus mente puer memori.

Quam multi interea praestanti carmine vates

Nascentem certant tollere ad astra Deum!

Fallor, an arcadio veniens ab littore turba

Nescio quae ripis sedit in Ausoniis?

Quae sibi Saturnum quemdam, camposque beatos

Fingit, et Evandri se putat esse genus;

Ac sibi dum pingues meditatur versibus agros,

Thybridis in viridi litore pascit oves.

Thybri pater, parvam quaeso, ne despice gentem:

Rege sub Evandro tu quoque parvus eras.

Tuque adeo; magni reseras qui limina olympi,

Caelestumque sedes ianitor ante fores,

Regia quem Ditis metuit, cui sidera parent,

Lambertine, tuo numine dexter ades:

Laus est felsineo tibi maxima ab Idice; surget

Et tibi servata nomen ab Arcadia.

Haec quoque tempus erit (praesens modo faveris illi)

Annua cum sacro vota feret Puero.

Et Matris magnae in laudes dum mollia flectet

Carmina, et alternis ludet arundinibus,

Septem romani resonabunt undique colles.
 Felices colles, quis mihi jam Sinaim;
 Quis mihi frondosi memoret jam culmina Orebi?
 Vos ego vel Libani praefero verticibus.
 Salvete, o colles sancti; salvete, recessus
 Caelitibus sacri, fluminaque, et nemora,
 Grata Deo sedes. At quae quae nomina vestris
 Pastor nescio qui sculpsit in arboribus?
 Hic mihi quid Nemesis legitur, quid candida Phillis,
 Lesbia quid flavis conspicienda comis?
 Cur fugiens illic narratur Delia, Moeris
 Quam sequitur, servat dum Meliboeus oves?
 Ah istos versus, isthaec jam nomina sacris,
 Arcades, ah! sacris demite corticibus.
 Scribite in his Puerum, quo non formosior alter,
 Non fuit in terris alter amabilior;
 Seu placidus blandos sopor illi operiret ocellos,
 Seu Matris casto luderet in gremio.

IN

B. MARIAE VIRGINIS

PURIFICATIONEM.

ELEGIA VII.

Quum patrias se se Virgo purgaret ad aras,
 Coelestem Virgo quae peperit Puerum,
 Et geminas prisco gentis de more palumbes
 Ferret, et, en purgo me tibi, magne Pater,
 Diceret; ipse Deus coelo subrisit ab alto.
 Nam quid purgari te, bona, opus fuerat?

Non tecum hoc pulcher pepigit jam Gabriel, esset

Ut tibi perpetuus virginitatis honor?

Sanctus ab intacta tibi non Puer exiit alvo,

Quum te virginei nobile ventris onus

Ponentem scabro stupuit natura sub antro?

Plauserunt omnes tunc tibi coelicolae.

Nam veluti aetherias ubi lux diffusa per auras,

Quam versat roseo sol pater e gremio;

Obiecti impellit splendentia corpora vitri,

Aut pellucidulae lene fluentis aquae

Perfacili sese transmittit tramite; at illa

Nil penitus mutant, et sine labe manent.

Miratur dubius rerum scrutator, et haeret,

Nec bene scit, qua lux candida transierit,

An solidas vitri quod partes permeet ipsas,

An potius vacuis lapsa foraminibus.

Sic Puer omnipotens quum se producere vellet,

Evasit casto Virginis ex utero.

Ista quid huc igitur spectat purgatio? non hanc

Constituit Moyses, hanc tibi non Abraham.

Sed quid ego haec loquor? Illa sacri jam limina
templi

Occupat: aeratas jam sedet ante fores:

Jam reliquis miscet se matribus: en prece quanta

Se purgat, sanctis non sine muneribus!

Ah! Matrem dimitte, et munera redde, sacerdos.

Exstitit a partu purior illa suo.

DE B. MARIA VIRGINE

JUXTA CRUCEM STANTE.

ELEGIA VIII.

Siccine te duro pendentem e stipite, et atro
 Undique manantem sanguine conspicio,
 Mundi rex et cunctarum sator optime rerum?
 Nec tua, nec magni gloria magna Patris
 Te movit, tantam ut velles avertere caedem?
 Nec tibi sollicitae Matris amor subiit?
 Quae nunc quanta imo suspiria pectore ducit!
 Ut tergit nivea lumina saepe manu!
 Et mortale genus tanti fuit? ad quid Adamum
 (Sit nostri quamvis ille parens generis)
 Educi e nihilo, vanam quid oportuit Evam?
 Ut nempe antiqui nescia quae sceleris
 Una fuit mulier, purissima quae fuit una;
 Hanc premeret tantus, obrueretque dolor?
 At non hoc miserae quondam promiserat Ales,
 Qui superis illi nuncius e domibus
 Non expectati praedixit gaudia partus.
 Qualia tum cecinit regna, quot imperia
 Protulit? hoc illi est regnum; sic imperat astris.
 Nunc Natum, quem unum semine ab aethereo
 Ventre pio excepit, Natum, quem diligit unum,
 Suffixum duro in robore, semianimem,
 Confectum plagis videt, atque immobilis haeret.
 At vos, o comites, (nam quid opus lacrymis?)
 Vos, fidae comites, quin hinc abducitis illam?
 Crudeli ne igitur victa dolore cadat,

Ipsa sui spectans crudelia funera Nati?

Felix, cui dudum contigit oppetere,
Quem non his fortuna malis servavit, Joseph!

Quamvis ille gravem pauperiem tulerit,
Ærumnasque incredibiles, longosque labores;

Quamvis et Nato et Coniuge cum tenera,
Immitis fugiens odium crudele tyranni,

Exul, inops terras iverit in Pharias;
Non haec dira tamen, non haec tam immania vidit,
Nunc inter manes pervolat ille pios.

At tu, curarum quamvis absorbeat aestus
Immeritam, et tantis fluctibus abripiat,
Sume animum, Virgo. Non haec sic semper abibunt.

Hic jam, quem ploras, Filius, hic erebum
Jam petet, invictusque animi, et virtutibus ingens
Diffringet regis limina tartarei,

Quas strages edet, quae funera; dum sua mittet
Sub juga taenariae robora militiae!
Non nequicquam illi pater est, qui sidera torquet.

Ast nulla attactas labe, pias animas,
Fatidicos vates centum, centumque potentes
Bello armisque duces; ingenuos pueros

Ingenuasque nurus centum, castasque puellas,
Sanguine quum totas ipse suo abluerit,
Educat tenebris tandem, et secum inferet astris.

Haec tecum, quid fles? haec memorare juvat.
Aspice, ut aurato jam jam succedit olympos
Victor, ut exsultans jam sua regna tenet.

O quot pennigeri juvenes comitantur orantem!
Quos cantus edunt! quas agitant choreas!
Qualis per medios quantusque incedit Joseph!

Ne dubita: non est immemor ille tui.
Quamvis astra premat, quamvis splendore coruscans
Immenso, sua jam gaudia vix capiat,

Te tamen exspectat, te quaerit, te vocat unam,
Et penitus toto diligit usque animo.

Eia igitur, Mulier, coelo dum tanta parantur
Gaudia, dum superum te domus alta manet,

Tu persta, et casus omnes obnitere contra,
Utque facis, perfer pectore magnanimo.

DE

B. MARIAE VIRGINIS OBITU

EJUSQUE IN COELUM INGRESSU.

ELEGIA IX.

Scilicet hunc etiam luctum expectabat Judas,
 (Pro genus infelix!) has etiam lacrymas,
 Ut quae lesseas inter pulcherrima matres
 Ibat, coelestis magna Parens Sobolis,
 Hac etiam amissa et crudeli funere mersa,
 Funere quo nobis omnia ademta bona,
 Thaborides flerent, flerent Libanitides omnes?
 O nata Isacidum natio ad omne malum!
 Quid si illam primi labes tetigisset Adami?
 Irascor culpae jam minus, Eva, tuae.
 At fertur magno regina incedere olympo,
 Credo equidem, et vita jam meliore frui;
 Et regni nunc forte sui cognoscere fines
 Gaudet, et eos visere et hesperios,
 Stellarum mores varios et nomina discens;
 Sive placet, Michael, castra videre tua,
 Teque audire, tuas dum lustrat Diva cohortes,
 Narrantem juvenum praelia pennigerum:
 Namque olim est ausus coelum obsidione tenere,
 Et ferre in magnum Belzebub arma Deum.
 O quas tum clades, quantas egisse procellas
 Coelestum fertur lecta manus juvenum!
 Quae Michael Divae nunc forte ex ordine pandit,
 Ostenditque locos; utque suas acies

Moverit , et monstrum tandem exturbaverit astris.

Vultu illa atque oculis grandia facta probat,
Et spolia e summa pendentia suspicit arce.

An, dum illi haec narrant, templaque coelicolum,
Fulgentesque domos, et vasti limen olympi

Spectat , Judeae sit memor illa suae?
O utinam , veteris repetit si opprobria culpae ,

Non etiam humani poeniteat generis.
Ah ne forte , illi si quando occurrerit , Eva

Fallacis memoret insidias colubri ,
Infandam pueri neu caedem narret Abelis.

Illinc humanum dedecus omne venit.

Felices illi , quos omni labe solutos

In sedes Christus transtulit aetherias ,
Impia quum stygii perfregit claustra tyranni !

Scilicet his pompas , Virgo , videre tuas ,
Ilis voces audire datur , datur ora tueri.

Nos miseri hic vanis conficimur lacrymis.
Jam quid ego invisus aut cur his demoror oris ?

Quid mihi jam vita hac tristius esse potest ?
Ah ferar in coelum ; seu me nimbosus Orion ,

Sive suis Hyades excipiant domibus.

IN FUNERE

B. MARIAE VIRGINIS

LYCONIS VOTUM.

ELEGIA XI,

Quam felix coelo, quam laeta dies fuit illa,
Quum Virgo, aeternae magna Parens Sobolis,
Tranabat nubes, seseque ardentibus astris
Miscebat! Quae vos gaudia tum, Superi,
Quae nova tum cepit, neque dum expectata voluptas?
At me, dum nulla re magis excrucior,
Quam ut te, Virgo parens, videam, vestrosque
triumphos,
Idque unum toto pectore discupio,
Nec mihi, quod tu scis, cura est antiquior ulla;
Me tamen ingratos te sine, Virgo, dies
Hic opus est agere, et studio tabescere inani.
Ah! quis me vitae huic eripiat miserae?
Haec olim dicens umbroso concidit antro,
Sensibus ereptis, et sine mente, Lycon.

IN FUNERE

B. MARIAE VIRGINIS

MOPSI DESIDERIUM.

ELEGIA X.

Quid credam, o Superi, nunc quum coelestia regna
 Coelestes inter Virgo beata choros
 Ingreditur regina, et se fulgentibus astris
 Implicat? an Mopsi sit memor illa sui?
 An subeant illi vota exardentia Mopsi?
 Hoc equidem, Superi, credo. Sed interea
 Per nemora, atque agros Mopsus, perque antra
 querelas
 Jactat, et immensis conficitur lacrymis;
 Illa incedit ovans, et limen spectat olympi,
 Et Nati gaudet gaudia magna sui.
 O te si nondum capiunt oblivia nostri,
 Si pastoris adhuc est tibi cura tui,
 Si quid amas, nec me miserum contemnis amantem,
 Hac me quin vita protinus exsolvis?
 Quin mihi das, namque id potes, in coelestibus oris
 Tecum una longos vivere posse dies?
 Id nisi tu efficias, numquam tua gaudia, Virgo,
 Numquam non luctu prosequare, et lacrymis.

IN MORTEM

MARIAE VIRGINIS

PASTORIS LYCIDAE QUERELA,

ELEGIA XII.

Nam quid ego extremam vitae hujus demoror horam,
 Æternæ postquam Diva Parens Sobolis,
 Unam plus oculis, unam quam semper amavi
 Plus anima, heu tristi funere mersa jacet?
 Ah! moriar, quid enim exspecto? Non vivere tanti est,
 Ut tibi, Diva Parens, me superesse velim.
 Quamquam ni dolor hic miserum me conficit, eheu!
 Quid jam me possit conficere, haud video.
 Haec rupes inter Lycidas et flumina jactat.
 Flent rupes ipsae et flumina cum Lycida.

AD BEATAM MARIAM VIRGINEM.

IN COELUM ASSUMPTAM.

ELEGIA XIII.

Dum te, Virgo, tenent summi penetralia Veri,
 Felix et magno in Numine cuncta vides,
 Nos studia incerta, atque artes sectamur inanes,
 Quas mirans vulgus nominat ingenuas.

Quam rides saepe, immensi sive aetheris orbes
 Conamur certis fingere lineolis,
 Semina seu celeris longe tenuissima lucis
 Quaerimus, et qui sit rebus et unde color,
 Seu vim scrutamur vivam, qua corpora pollent,
 Claudentes paucis omnia litterulis.
 Nam Falsum hos ausus caecis quam saepe tenebris
 Obruit, aut vanis ludit imaginibus!
 Non ego, Virgo, tamen, dubias dum persequor artes,
 Te rogo, ne vanis ludar imaginibus;
 Hoc rogo,, te quondam, Virgo, ut, pulcherrima,
 possim
 Visere, quae magno in Numine cuncta vides.

ALOYSIO GONZAGAE

ET

STANISLAO ROSTRAE

DIVIS PATRONIS

ELEGIAE

ELEGIACORUM LIBER IV.

JOANNIS MARIAE PARTHENII.

S. ALOYSII GONZAGÆ

IN SANCTIORIS VITAE SECTANDAE PROPOSITO
CONSTANTIA.

ELEGIA I.

O quem te memorem, claro sate sanguine regum,
 Gonzaga, Ausonidum Lojolidumque decus,
 Cum titulos et opes fortis contemptor avitas,
 Et linquis patrii regia tecta soli.
 Non te laurigeri fasces, non splendida movit
 Purpura, non lautae plurima gazea domus;
 Non illa imperii tibi debita sceptrâ, nec ipse,
 Quo tibi nil poterat carius esse, pater.
 O quoties sculptos pario de marmore, et altis
 Longo dispositos ordine porticibus,
 Majorum ostentans vera sub imagine vultus,
 Et memorans forti parta trophæa manu;
 Quo te jam dudum meditantem ac magna parantem
 Flecteret, et blandis vinceret illecebris;
 O quoties dixit (dicenti plurimus humor
 Depluit, et lacrymis immaduere genae);
 Nate, per has ego te lacrymas, per facta tuorum
 Luclyta, per nostrae tot decora alta domus;

Te, Nate, obtestor, precor hanc, precor exsue
mentem

Meque et te dignos concipe corde animos.

Quid tibi Lojolidum cum castris? Sanguine claro

Martia progenitum non nisi castra decent.

Hoc est laudis iter; verax hoc gloria pandit;

Huic uni insistens nomen in astra feres.

Ah! memini, quondam, cum vix septennis ahenos

Insignis clypeo, et conspicuus galea,

Tractabas puer arma; ensesque hastasque minaces

Imbelli dextra stringere ludus erat.

Omina quae licuit mihi tunc captare parenti,

Quantaque virtutis, quam prope certa tuae?

Jamque inimica animo totis fundi agmina campis

Cernebam, et victos projicere arma duces;

Horrebat multo constrata cadavere tellus;

Horrebat multa caede cruentus ager.

Tu vero afflictis violentior hostibus instans,

Precipitque urgens agmina versa fuga,

Vix poteras duro avelli certamine; dulcis

Tantus erat forti in pectore laudis amor.

Quo tu cunque ibas, gressum quocumque ferebas,

Præterdicens dextra laurea sæta, tuos

Ante triumphales ibat Victoria gressus,

Victori ornabant debita sæta caput;

Ante pedes captae trepidis cum civibus urbes

Tendebant vinctas supplice voce manus. —

Interea totis penitus suscepta medullis

Mulcebant patrum gaudia blanda sinum.

Haec ego fallaci ductus spe vota fovebam

Heul! cassa in rapidos vota abitura notos;

Exsultansque animis, et laetus ovansque ferebar;

Demens, qui falsis decipi inaginibus,

Et specie illudi rerum sum passus inani;

Et vano fovi gaudia falsa animo.

Nunc fugis, et tristi cogor tabescere luctu,

Nunc fugis, et tecum gaudia nostra rapis.

Ah! Nate, ah! si qua est pietas, me perdere noli;

Noli ah! digressu perdere, Nate, tuo.

Haec Pater; at Lodoix agitans majora, parentis

Et precibus flecti nescius et lacrymis,

Perstabat contra; non illum blanda movebant
 Verba, nec admixtae cum precibus lacrymae.
 Qualis in aerii consurgens vertice Saxi
 Quercus frondosas explicat alta comas,
 Quam venti tendunt nequidquam evellere, totis
 Obnixa contra viribus; illa solo
 Fixa, immota manet, furiasque Aquilonis, et iras
 Ridet, et insani murmura rauca Noti;
 Aut qualis medio rupes se se ardua ponto
 Erigit, et celsa sidera fronte petit;
 Quam licet horrisoni oppugnent facto impete fluctus,
 Atque procellosi verberat unda Sali;
 Non usquam labat, atque suas stans mole tenet se,
 Iratique minas despicit Oceani.
 Talis erat Lodoix; lacrymis Natum, et prece multa
 Cum Pater aggressus flectere magnanimum.

AD S. ALOYSIUM GONZAGAM

UT ASSIDUIS LACRYMIS MODUM PONAT.

ELEGIA II.

Desine sollicitis incendere quaestibus auras,
 Et jugi indignas deterere imbre genas.
 Qualis muscoso fons olim eductus in antro
 Materna rumpens prosilit e silice;
 Prosilit, et summo descendens vertice montis,
 Et properans celeri vallis ad ima pede,
 Saxa per et latebras et inaequales anfractus,
 Pergit inexhaustis currere semper aquis;
 Sic tibi perpetuum rorantibus umor oculis
 Desluit, et madidos perluit imbre sinus.
 Jam plures abiere anni; jam signifer axis,
 Mutaruntque suas saepius astra vices;

Et quo suspirans, longo indulgensque dolori,
 Pallidaque assiduus ora rigans lacrymis,
 Angeris, et cura misere tabescis eadem,
 Et requies fesso non datur ulla animo.
 Carpitur interea laetae flos ille juventae,
 Et pallor miris inficit ora modis.
 Ah! quid agis! longas o! tandem mitte querelas;
 O! precor immeritas parce rigare genas.
 His sine perpetuo tabescant lumina fletu.
 Quis est admissi conscia mens sceleris;
 Quos olim abreptos furor improbus arma coegit
 Sumere, et ultrices conscelerare manus;
 Quique ausi impuro sunt ore lacessere coelum,
 Et jacere in summum verba nefanda Deum;
 Et quos pellectos coepit malesuada libido,
 Ussit et impuris turpis amor facibus.
 Hi plorent, largoque hument flumine vultus,
 Ulla nec assiduus fletibus hora vacet.
 Sic lacrymis animum et luctu pascebat amaro;
 Et luctu et lacrymis conficienda suis,
 Fax juvenum quondam, Bethanes famosa puella,
 Dehinc sauctae insignis forma pudicitiae.
 Amplius haud olli tyria procedere palla
 Ornatam, aut crines fingere cura fuit,
 Adscitamque mala speciem mercarier arte,
 Inque peregrinis fulgere divitiis.
 Lapsa jacent nitidis conserta monilia baccis,
 Et despecta solo murrhina vasa jacent.
 Lucem odit, vitatque hominum commercia, quos heu!
 Heu! male blanda suis coeperat illecebris.
 Illa vel obscuris antri latet abdita in umbris,
 Aut sedet in solis anxia littoribus;
 Funduntur passi per levia colla capilli,
 Praecingit tenerum fascia dura latus;
 Interea ducens imo suspiria corde,
 Et feriens crebra pectora nuda manu,
 Pacem orat Superos; responsant littora pacem
 Et pacem cautes antraque pulsa sonant.
 Noctes atque dies haec scilicet una recursat,
 Sollicito una haec est addita cura animo.

At tu, Sancte Puer, lacrymas quod fundere cogat,
 Ecquod vesani crimen amoris habes?
 Si nix contendat tecum maeotica, vel si
 Lacteolis certent alba ligustra comis;
 Alba ligustra, nivesque anteis candore, ligustris,
 Et si ipsis quidquam est candidius nivibus.
 Quamquam quid loquor, et non proficentia perdo,
 Irritaque in rapidos verba abitura notos?
 Ille gemit, mixtoque iterat suspiria fletu;
 Mors ponet tantis fletibus una modum.

S. ALOYSIUS GONZAGA

JUSSUS MENTEM A DEO AVERTERE

CONQUERITUR

ELEGIA III.

Ergo ego, quem primis sua sub juga misit ab annis,
 Ussit et admotis Divus Amor facibus;
 Assuetum longo te sanctum tempore Numen
 Et colere, et toto pectore diligere;
 Invitam cogor nunc a te avertere mentem
 Proh dolor? et careo distrahor a gremio.
 Distrahor; et potero tantum tolerare dolorem?
 Et ferre ingrati taedia dissidii?
 Uror; et eripitur cupido solamen amanti;
 Uror, et optato non licet ore frui;
 Sancte Amor, arsuras aut mitius ure medullas
 Et petere usque novis pace, precor, jaculis;
 Aut si me pergis violentius urere, et in me
 Tela placet crebra congeminare manu;
 Ah! saltem tanto nullus ponatur amori,
 Qui miserum exanimet discrucietque, modus.

Quis potis injecto cohibere incendia fraeno ,
 Cum furit accensis Trinacris Aetna rogis ,
 Flagrantesque globos liquefactaque saxa sub auras
 Evomit , et multa verberat astra face ?
 Quis , cum missa semel nervo est stridente sagitta ,
 Et findit celeres ocyor ipsa notos ,
 Quis rapidum remoretur iter , sistatque volantem ,
 Quin propere ad metam pergat adacta suam ?
 Heu ! quid agam ? me sancta premunt tua jussa , jubenti
 Et parere quidem , sit modo posse , velim .
 Verum qui possim ? caram quando omnia formam ,
 Quocumque inciderint lumina , subjiciunt .
 Illam devexi montes , vallesque reductae
 Vitiferi colles , umbriferumque nemus ,
 Illam mi fontes , illam mi roscida prata ;
 Et picta objectant floribus arva suis ;
 Nec non et stellis caelum fulgentibus aptum ,
 Et lata immensi stagna profunda sali .
 Illa mihi occurrit , seu non subvecta quadrigis
 Obnuit densis atra polum tenebris ;
 Seu nimbo contra ningens aurora rosarum
 Optatum revehit gratior axe diem .
 Illa mihi ante oculos semper versatur imago ,
 Infixa et menti est altius illa meae ;
 Ulla umquam ut possit quam vi convellier , atque
 Arcte amplexanti decidere ex animo .
 An fugiam , mea vita ? at quo ? aut quaenam fuga longe
 Abducat cara me satis a facie ,
 Sive ego praepetibus subvectus ad aethera pennis
 Siderei scandam lucida templa poli ;
 Vel si velivola findens vada salsa carina ,
 Sistar in ignotis advena littoribus ?
 Quo me cunque feram , fugienti instabis amanti ,
 Atque occursabit Numen ubique tuum .
 Tu mare , tu terras , tu caelum numine completes ;
 In toto nullus te vacat orbe locus .
 Tu caelo signorum obitus moderaris et ortus
 Imperio parent aequora lata tuo ;
 Paret et extremo , trans littora transque refusum
 Oceanum , tellus si qua sub axe jacet .

Quid? Si digressus caelo terrisque relictis,
 Infernas subeam, pallida regna, domos.
 Illic Numen ades; vindex et foeda nocentum
 Eternis plectis crimina suppliciis.
 Quo me igitur vertam? aut misero quid denique restat,
 O! mihi luce ipsa carius atque anima,
 Quam propera duos tandem finire labores
 Morte? modus tantis mors erit una malis.
 Tales, flammato fundens suspiria corde
 Saucius heu! nimio pectus amore Puer
 Edebat gemitus, et fletibus ora rigabat,
 Nec sat consilii, nec rationis erat.
 Qualis Carpathio puppis deprensa profundo
 Cum subito nubes eripit atra diem,
 Incubat et ponto nox atra, ferocior Euris
 Hinc fremit, oppositis viribus hinc Boreas,
 Miscentur maria, atque imis furit aestus arenis;
 Illa anceps medio fluctuat Oceano.

S. ALOYSII GONZAGA

MORIENTIS VOTA

ELEGIA III.

Qualis Maeonii cygnus prope stagna Caystri
 Arguto moriens dulcius ore canit;
 Ore canit; presso circum silet aura susurro,
 Proxima nec tremulis sylva strepit foliis;
 Ille modos liquido fundit de gutture, donec,
 Paullatim vita deficiente, cadat.
 Talis Aloysius, supremo in funere, blando
 Auditus solito est blandius ore loqui.
 Non illum tenuit periturae cura salutis;
 Major quippe alto in pectore cura sedet.
 Obvia non illum mors terruit; horrida quanquam
 Et vultu, et saeva falce tremenda foret;
 Quin etiam ignavam, et nimium in sua funera lentam
 Arguit, ingratas increpuitque moras.

Ol qui me exemptum vinclis et carcere coeco
 Cognati supera sistat in arce poli.
 Aurea concilio sedes ubi culta piorum
 Fervet, et aeterna luce corusca nitet.
 Non illic curae insomnes, non tristia bella,
 Non dolor assiduis uvidus a lacrymis;
 Sed segura quies, tranquillae et gaudia mentis,
 Et pax felices incolit alma plagas.
 Ah! valeat quisquis vitae infelicis amore,
 Posthabita antetulit exsilium patria,
 Et seram curas producere ad usque senectam,
 Et potuit longae taedia ferre morae.
 Non, mihi centenos si quisquam spondeat annos,
 Tithonique aevum Nestoreosque dies,
 Mutare oblata praesentia funera vita,
 Hac vel proposita conditione, velim.
 Felices primae quos ipso in limine vitae
 Vix sacro ablutos flumine mors rapuit;
 Qualis virgineo mollis rosa carpitur ungui,
 Cum nondum picti claustra sinus reserat.
 Hos non infestis trajectos corda sagittis
 Impuris ussit turpis amor facibus.
 At nunc securi caelo blanda otia ducunt,
 Otia perpetua continuanda die;
 Candentemque agnum candenti in veste sequuntur,
 Et laeti Divum limina concelebrant.
 Quando erit ut terris translatus ad astra relictis,
 Et comes aligeris additus agminibus,
 Ipse etiam optato jucundae munere pacis,
 Et vita incipiam nobiliore frui.
 Nempe ea, quae certo non est obnoxia letho,
 Et quae divino semper amore alitur;
 Quae vigiles nescit curas, ea vita vocanda,
 Et votis digna est omnibus una peti.
 Ergo age flebilibus tandem exorata querelis,
 Quas tibi sincero fundimus ex animo;
 Huc ades, o bona Mors rerum dulcissima, meque
 Ereptum invisio transfer in astra solo.
 O felix patrio quae me lux addet olympo!
 Prepetibus vehat hanc Lucifer almus equis.

CAROLI ROTH

S. ALOYSIO GONZAGAE

PRO CASTITATE VOTA

ELEGIA V.

Lœside, intacti felix tutela pudoris
 Lilia cui sanctum circumiere caput:
 Virgineas seu nunc laetus meditare choreas,
 Lactea conspicuum qua via signat iter;
 Seu flores legis in sertum, formosa vagatus
 Per nemora, Elysiis consita deliciis;
 Coelestemque Agnum sectatus in ardua, carmen
 Dicendum pueris, virginibusque canis:
 Huc ades, et tecum Veneris domitura calores
 Affer virginea pocula mista manu;
 Balsamaque, et succos, semperque virentis olympi
 Flores, et primas, dona beata, nives.
 Sic ades o, nostroque volens succurre labori:
 Nulla tuo res est digna favore magis.
 Quamvis multa tuae celebrentur munera dextrae,
 (Parcius aestiva Nilus abundat aqua.)
 Aut fruges modo miramur succrescere cellis,
 Aut modo depletis fervere vina cadis;
 Aut, quam non unquam nostri pressere trapetes,
 Manare e siccis Pallada fictilibus.
 Adde huc innocuosque ignes, segetique sinistrum
 Jussum contractis currere flumen aquis:
 Adde et depulsos Cereali pulvere morbos,
 Corporaque e mediis paene recepta rogis:
 Haec, et plura licet memorentur in omnibus oris;
 Major ab asserto fama pudore venit.
 Haec tua vis potior, laus haec, et gloria; tollis
 Quidquid vesani crimen amoris habet.

Hinc et votivis augentur templa tabellis,
 Sanctus et in toto suscipis orbe preces;
 Et merito: tibi enim, tibi primo in flore juventae
 Cypris non ulla stringere pectus acu,
 Nec potuit castae nebulas indutere menti,
 Aut semel objectis fallere imaginibus.
 Rarus honos, et quem pauci meruere, secundo
 Quamvis nascentes viderit ore Deus.
 Quo magis o faveas, ac numine dexter amico
 Assere sollicitae jura pudicitiae.
 Non mea me tutum praestare industria possit:
 Tota patrocínio spes mea nixa tuo est.
 Cinyphiis licet obducas horrentia textis
 Pectora, et in dura sit tibi somnus humo;
 Sitque exusta licet facies, aestuque, fameque,
 Languidaque amisso corpore membra trahas;
 Non tamen his telis Venerem deffendere possis.
 Altius humanis viribus illud opus.
 Hei mihi! cur tam difficili committor arenae?
 In me cur tantum roboris hostis habet?
 Ista quidem vis est; viden' ut niger ora Cupido
 Pone trahat furtim pallia nostra manu?
 Nec satis hoc: colaphos infregit in ora: vides hoc;
 Et tamen in nostro lente labore sedes?
 Surge age, Loïside, cape tela, elataque frange
 Cornua; virgineas sentiat ille manus.
 Audimur; venit, ecce venit; cortina repente,
 Sauctaque concusso mugit urna solo.
 Quid statis, pueri? terram petite ore paventes,
 Praesentem et Divum quisque rogate mihi.
 Fallimur? an nostro? non fallimur: improba pestis
 Excussa est nostro nec reditura sinu.
 Surgite io, pueri: gratesque rependite Divo.
 Vicit io Lodoix, dicite, vicit io!
 Heus pictor, mihi votivam describe tabellam,
 Atque haec extrema carmina parte nota:
 ABSYMTVS . MISER . HIC . FLAMMA . NE . QVAERITE . QVALI
 VINDE . LOÏSIDES . NI . PROPERARET . ERAT .

FRANCISCI CONTOLI.

ALOYSIUS GONZAGA

LOYOLITARUM SOCIETATI NOMEN DATURUS
PATREM ITA PER LITERAS ALLOQUITUR.

ELEGIA VI.

Quae me saepe pudor conatum dicere coram
Non tulit, ad Patrem verba legenda damus.
Auguror: allato graviter turbabere scripto,
Judicioque ferar barbarus ipse tuo,
Qui tibi tam caro tam dirum infligere vulnus
Non timeam, et tristem mente agitare fugam.
Quidquid erit, virtus leviter te ferre docebit,
Si sua virtuti jura relinquat amor.
Cum teneram primis mentem mihi fingere ab annis
Coepisti (memini) talia saepe dabas.
Dilige, Nate, Deum: nihil est praestantius illo:
Ille colit terras, sydera et ille tenet.
Sed non terra illum, non aetheris ambitus ingens
Aut capere, aut ullo claudere fine potest.
Quidquid habes, campos, urbes, armenta, domosque
Haec Deus insigni munere habere dedit.
Hunc igitur pronâ semper venerabere mente,
Et magnum duces huic placuisse Deum.
Praeterea vitae cursum quemcumque tenendum
Jusserit Omnipotens, certus inire para.
Praemia magna feret, castum qui vixerit aevum;
Vita tamen multis casibus ipsa patet.

Dixeris esse mari similem , bacchantibus austris,
 Auget ubi trepidum naufraga turba metum.
 Felix qui portum nactus celer occupat , atque
 Mox cavet infidis pandere vela notis.
 His me tum monitis puerum formare solebas :
 Num frustra monitum me voluisse putem ?
 Loyolidum me castra sequi , te Patre relicto ,
 Imperiis cogit nunc Deus ipse suis.
 Hic pacem sperare jubet , certamque salutem ;
 Semitaque hinc facilis panditur ad Superos.
 Qui modo suadebas portus intrare repertos ,
 Et fugere insani mille pericla maris ,
 Idem nunc pelagus temere tentare jubebis ,
 Et vitam saevis credere turbinibus ?
 Te ne auctore , Dei jussis parere recusem ,
 Cui magnum ducis displicuisse nefas ?
 Sed tua nequaquam mens est mutabilis , atque
 Stultus ego , Patrem qui mihi fingo levem.
 Ite procul tristes curae , procul ite timores :
 Adnuit ; et coeptis jam favet ille meis.
 Accedo fidens animi suprema daturus
 Oscula : procumbo cernuus ante pedes.
 Occurrit velox ; collo dat brachia circum ,
 Amplexuque tenens irrigat imbre genas.
 Dimittens tandem dictis haec fatur amicis :
 I felix : votum perfice , Nate , tuum.
 Vive memor nostri ; precibusque utrumque Parentem
 (Quando unum superest hoc tibi) saepe juva.
 Talia fingebam scribens , animoque videbam :
 Quis prohibet fictis posse subesse fidem ?
 Credam ego quod cupio , nec spes me ludet inanis ,
 Ingenium potui si modo nosse tuum.

FERDINANDUS GONZAGA

ALOYSIO FILIO SIC RESPONDET.

ELEGIA VII.

Durus adhuc nostris obsistere viribus audes,
 Noster nec flectit ferrea corda dolor?
 Non te caucaseâ lactavit rupe laeena;
 Immanes scopuli nec genuere maris.
 Cede: nec ingenuos decet intractabile pectus;
 Nec bona de nostris vana petenda malis.
 Molirine fugam poteris, me Patre relicto,
 Ducere cui tecum scis placuisse dies?
 Non tali est usus nato longaevus Jacob;
 (Sis memor) ingenii te pudeatque tui.
 Adsurgit Juveni Memphitidis incola terrae;
 Illum Niliaci littoris ora tremit.
 Quadrijugis invectus equis, curruque nitenti
 Ibat per medias splendidus ille vias.
 Argenti magno stant mensae pondere, et auri;
 Uruntur positis dona Sabaea focis.
 Regificum Nilus luxum miratur, at Heros
 Suspirans curis angitur assiduus.
 Absentis rediviva subit Genitoris imago,
 Fallere quam nullâ jam miser arte queat.
 Vota cadunt: Genitor Pharias delatus in oras
 Adfuerat; nati limina jamque tenet.
 Obvius ille volans properabat dicere multa:
 Laetitia incoepum comprimit ore sonum.
 Ingredere o tandem, vires et collige, dixit:
 Non hospes nobis, non abiturus ades.

Una erit amborum sors, si modo fata probabunt ;
 Alterutrum donec frigida mors rapiat.
 O pietas ! o rara fides ! o decolor aetas
 Nostrorum priscis inficienda viris !
 Et mihi Dī dederunt Natum, quo tristis in uno
 Sperabam curas ponere posse meas.
 Hic tamen, heu ! miseram luctu consumere vitam
 Me jubet : hic longe non rediturus abit.
 I ; te non teneo ; nostrum si ferre dolorem
 Non audes, tutam nox dabit atra fugam.
 I ; cessent pugnae : dirae pete barbara palmae
 Gaudia de nostrā quae modo morte feres.
 Adspice : pressa gravi subsultant corda dolore :
 Deficit, et trepidum vita fatigat iter.
 Talibus incessit Natum Fernandus : amaris
 Tangitur, at flecti quaestibus ille nequit.
 Sufficit ipse novas vires Deus aethere ab alto,
 Humanā victus ne cadat arte Puer.

DE FUTURA

ALOYSII GONZAGAE

APUD SUPEROS BEATITATE VATICINIUM.

ELEGIA VIII.

O quem nec generis totum diffusa per orbem
 Fama, nec antiquae nobilitatis honos,
 Nec fumosa movent priscos referentia Patres
 Signa, nec invictā parta trophaea manu,
 Macte animo : caros, Aloysi, linque penates ;
 Arridet coeptis jam Deus ipse tuis.
 Irati nec te frangant convicia patris,
 Injectusque timor, terrificaeque minae.

Consilia in melius referet (ne finge tyrannum)
 Et veniam supplex , quam petis , ille dabit.
 Num quod longa Parens ducit suspiria corde ,
 Et male compressis ora rigat lacrymis ,
 Propositis obstare tuis , fatoque vocanti
 Hanc quoque posse levi mobilitate putas ?
 Adnuit , atque ultro cupit , etsi pectora turbet ,
 Consilio semper cedere lentus amor.
 O una ante alias fortunatissima matres ,
 Quot sunt , quotquot erunt , quotque fuere prius !
 Oh si fata tui posses dignoscere Gnati ,
 Quanta animo jam nunc gaudia praeberes !
 Eventura cano : primâ tuus iste juvenâ ,
 Ceu flos depresso languet humi capite ,
 Occidet , at nulli veterum pietate secundus
 Loyolidum , quotquot sydera celsa tenent ,
 Praesidioque foveat terras , et rite vocati
 Humano Superos conciliant generi ;
 Quos inter magni coeli susceptus in arcem
 Lustratis summi tecta beata Patris ,
 Aligerum mores , et nomine discere gaudens ,
 Et digesta suis agmina cum ducibus.
 Interea sacrum Juvenis gens Romula corpus
 Possidet , observans exsuviasque colit.
 Ipse Pater geminas coelique , erebique potestas
 Claudere cui facta est , et reserare fores ,
 Indigetum coetu solio praefatus ab alto
 Inserit , et festos donat habere dies.
 Stant arae laevi de marmore : thura sacerdos
 Imponit sacris rite adolenda focis.
 Gens effusa ruit , matres , puerique , senesque ,
 Et sibi Gonzagam quisque rogat facilem.
 Gonzagae nomen cunctis celebratur in oris ,
 Qua sol imponit , qua juga demit equis.
 Jam Lybici discunt fines , jamque Indica tellus ,
 Et Liguri discit terra reperta Duci.
 Gonzagae nomen strictis , et lege solutis
 Tolluntur verbis sydera ad ipsa poli.
 Fallor ? an ingenuo Pubes (1) assueta labori ,
 Et dare palladiis laeta operam studiis ,

(1) Scilicet Ephebi Seminarii Faventini.

Qua velox Anemo curvi munimina pontis,
 Atque Faventinum perluit amne solum,
 Ostentatque procul turres, atque alta domorum
 Tecta, et praestanti structa theatra manu,
 Fictiliumque novas formas, et pecula, frustra
 Queis certent Parthis murrhea cocta focis;
 Quae dum longinquis advectus finibus hospes
 Suspicit, in memores cuncta refert tabulas.
 Sed magis effossum vectandis mercibus alveum
 Miratur celsae nobile mentis opus.
 Turba canit: faciles cantanti commodat aures
 Praesul (1); Pieriis lactus adesse modis.
 Salve, o Felsinei decus et laus maxima Rheni,
 Quem sibi vicinus vindicat Eridanus.
 Testaturque viros antiquâ stirpe Tuorum,
 Quos illic quondam sedem habuisse ferunt.
 Salve, atque ingenuis haec artibus hospita testa
 Praesidio felix protege, ut ante, tuo.
 Tuque adeo magnis spectata Faventia rebus,
 Æmiliae claros saepe datura viros.
 Ne tenuem, quaeso, puerorum despice Musam;
 His quoque cum vita crescet in ore sonus.
 Sic tum qui labens ad moenia perstrepat amnis,
 Jam fuerat rivus lene sonantis aquae.

(1) Vitalis Josephus de Bobus Bononiensis Episcopus Faventinus.

CAROLI ROTII

MARGARITA KRISKA

STANISLAO KOSTKAE FILIO.

ARGUMENTUM

S. Stanislaus natione Polonus e nobili, et senatoria Kostkarum familia a Parentibus studiorum causa Viennam Austriae cum Paulo fratre majore mittitur. Ibi quum studiis apprimè deditus vitam caelestem magis quam humanam ageret, eamque ob rem assidue vexaretur a fratre, cujus videlicet solutiores mores tantam illam vitae sanetimoniam ferre non poterant; a Sanctissima Dei Matre de ineunda Societate Jesu diserte admonetur. Sed quum plane desperaret de facultate, et venia a Parentibus impetranda, observari etiam se diligenter a fratre cerneret, id consilii coepit, ut mentito agrestique cultu arrepta fuga Dilingam ad Petrum Canisium, qui tunc Germaniae Superioris Societati praeferat, contenderet. Quo in itinere a fratre missos qui eum e fuga reprehenderent, divinitus, quam prope teneretur, evasit. Itaque exceptus a Canisio demum cum literis allegatur Romam ad S. Franciscum Borgiam, Praepositum Generalem, a quo in Societatem admissus consummatus in brevi explevit tempora multa; quippe nec dum decimum Tirocinii mensem egressus in maxima sanetitatis opinione decessit Romae ad Sancti Andreae in Quirinali. Atque haec ad Historiam. Nunc Margaritam Kriskam Stanislai matrem scribentem facimus filio hanc epistolam, qua multa queritur de fuga, et consilio novae vitae, tum illi reditum domum ad se maximo opere suadere conatur.

Ecquid, ut inspecta est maternae litera dextrae,

Matris ab admonitu cor tibi molle fuit?

Quamlibet austero sis pectore, nostra legenti

Forsitan invitis decidat unda genis.

Sed neque deciderit, nec quem facis ipse, dolorem

Gutta mihi ex oculis leniet una tuis.

Durus, ut es, persta: non me scripsisse pigebit.

Est tanti, justo si licet ore queri.

Ausus es (heu facinus!) primo furtivus Eoo

Non expectatae tradere terga fugae.

Non miserae subiit fugienti matris imago?

Non dolor, et lacrymis omnia plena meis?

Egregium vero, crudelis? reddis amorem,

Dignaque das Matri praemia; flere jubes.

At caelo suadente fugis, Superumque vocatu

Lojolidum adscita vivere lege juvat.

Ista licet narres ignotis somnia, matrem

Ne speres tanta credulitate capi.

Nempe habuit Frater te durius, aera maligne

Praebuit, assiduas, intonuitque minas.

Forsitan et plagas, quod nollem, saevus inussit:

Haec fuit, haec subitae causa caputque fugae.

Hinc te pertaesum Patriae est, hinc illa repente,

Quam fingis, menti lux fuit orta tuae.

Quod te si vitae melior cepisset imago,

Res erat haec longa discutienda die.

Quae cito praecipites, citius damnaveris: adde

Consiliis justam, ne capiare moram.

Nec satis est dixisse; Vocor: vox credita, saepe

Impetus ingenii fervidioris erat;

Utque queas tuto, Superis auctoribus utor,

Dicere; res certis tanta probanda notis.

At tibi ceu fuerit superas demissa per auras

Litera, propositi tessera fida tui,

Protinus indictaque mihi, Patrique salute

Per causam fictae religionis abis.

Neve foret pietas uno tibi nomine laesa,

Accedit lacrymis altera causa, pudor.

An si de media susceptus plebe fuisses,

(Prò scelus, et nostro sanguine inusta nota!)

Aufugeres cultu speciem mentitus agristem?

Hei mihi! te propter fabula quanta sumus!

Patriſ ut attonitas tantum scelus attigit aures

Supploro strepitum suscitât ira pede;

Jurat et hoc sumtis ulcisci dedecus armis;

Et faceret, si non mente recurset amor;

Namque ubi paulatim spatio deferbuit ira,
 Ingemit, et guttis grandibus ora rigat;
 Et nisi malueris mutata mente reverti,
 Longius heu! sine te vivere, Vita! negat.
 Si potes, ex patrio matris nunc conjice luctum.
 Quam credis, majus pectore vulnus hiat!
 Paulo ferox, utinam Fratri placatior esses!
 Tu vexas: olli fit fuga; plector ego;
 Nec mea continuo tabescere lumina fletu
 Cessant, vixque animam vixque dolore traho.
 At tu, care Puer! si qua est tibi cura Parentis,
 Ne pereat, patriis restituere focis,
 Aut certe (si nulla super tibi gratia nostri est)
 Ah! capiti parcas, Vita! nocere tuo.
 Quid facis ah demens? temeraria caepta relinque:
 Non bene, quod nequeas ferre, subitur onus.
 Tene tot indomitos vitae perferre labores,
 Illaque Lojolidum tristia castra sequi?
 Militiae durum genus est: vix transeat annus,
 Et tua jam tumulo molliter ossa cubent.
 Quis furor est mortem primis arcessere ab annis?
 Quamlibet extremis venerit illa, cita est.
 Non tibi divitiae desunt, non gloria Gentis,
 Non vetus, et Regum sanguine ducta domus;
 Nec favor et caeptis aspirans grandibus aura
 Caesaris, et populi fausta precantis amor.
 Est quoque quae roseos commendet gratia vultus,
 Ingenuae vires, ingeniumque sagax.
 Denique caelestes, si fas modo vera fateri
 Quidquid erat, facili contribuere manu.
 Tu tibi ne desis tantum, mea Vita! caveto!
 Neu bona corrumpi tantaque, totque velis.
 Seu tibi Mars placeat, Martem profitebere in armis,
 Aucturus veteris tot monumenta domus:
 Sive togae potius, pacisque insignia quaeris,
 Conspicius media e pace petetur honos:
 Nec, si vita sacras placet instituenda per artes,
 Desit honoratis infula clara comis.
 Quamque aliis tardo medicatur Tibris aheno,
 Crede mihi, est humeris Purpura nata tuis.

Non ego vana loquor: tibi enim, tibi tota Poloni
 Regis, et Austriaci Caesaris aula favet.
 Ergo quum possis procedere tantus in ostro,
 Malis Illyrica nigrior ire pice?
 Lojolidumque umbras, et tristia septa secutus
 Ante diem macie, tristitiaque cadas?
 At positis illic quondam sacrabere in aris,
 Indigetemque novum Patria terra colet.
 Gratulor Indigetem titulis accedere avitis;
 Perfice io! hac una Gens tua laude caret.
 Sed tibi quid patrios noceat celebrare penates?
 Num minus hic virtus quo tua crescat, habet?
 Hic quoque ni. refugis, licet exaequare triumphis.
 Degentem in solis Serapiona jugis;
 Et possis nimbo frontem circumdatus aureo
 Non trita ad Caelum pluribus ire via.
 Ah valeant tristes nimium nimiumque severi,
 Abdita quos virtus rupibus una juvat!
 Non est silvestri nec tristi praedita virtus
 Indole nec tenebris vult sua facta tegi.
 Exeat et totis praebens spectacula terris
 Splendeat illustri suspicienda loco.
 Sic prosit, vitaeque inter latrantia saxa
 Nocturnum late per vada monstret iter.
 An STANISLAI, quem reddis nomine, virtus
 Utilior terris, si latuisset, erat?
 Verba sed heu perdo! scribenti litera venit,
 Te Tiberim profugo jam tetigisse pede:
 Jam fuscis sumsisse habitus, capitisque minorem
 Lojolidum tonsa castra subisse coma.
 Saeve, quid exultas palma ceu victor adepta?
 Jam faxo pigeat te, pudeatque fugae.
 Quamvis longinqua simus regione remoti,
 Non est ignotum nomen in Urbe meum.
 Possum ego supplicibus Romam miscere tabellis,
 Tuque licet pugnes, eripiere tamen.
 Possum ne speres caeptum pervincere ludum,
 Ipsa quoque armato milite septa veli.
 Et faciam, irrumpamque aditus, et claustra refringens
 Hic, dicam, meus est, injiciamque manus;

Neve fuga, scelerate, queas evadere rursus,
 Addam ego materna ferrea vincla manu.
 Hei mihi! quo rigidis tenerum vincire catenis?
 Ignoscas: aeger pectora turbat amor.
 Apta magis niveo gemmata monilia collo:
 Apta magis pulchris florea sarta comis.
 Ipsa manu vestes propero tibi, maestraque nutrix
 Assidet, et Phryxi sedula torquet ovem.
 Scilicet his curis solatia quaero dolori.
 Hei mihi! si dura mente redire neges.
 Sed puto, flecteris; nec enim tibi pectora ferro
 Constant, nec medio stat tibi corde silex.
 Certe ego quam fugias, non sum tibi dira noverca,
 Nec tibi, si memini, toxica saeva dedi.
 Matris amor si crimen habet, peccasse fatebor;
 Nec possim culpa poenituisse tamen
 Ergo si qua tibi est pietas, nec pectore toto
 Excidit officii gratia vana mei:
 Si quidquam mensesque decem, saevique dolores,
 Anxiaque ancipiti vita puerperio:
 Atque amor et studium de te meruere, parentem
 Ne, per quam vivis, Nate, perire velis.
 Hoc lacrymis tristisque Pater, maestique propinqui,
 Poscit et hoc lacrymis parva, minorque Soror.
 Hoc et Germanus poscit, quem poenitet irae,
 Utque sibi ignoscas tristia facta, rogat.
 Obrueris lacrymis, mea lux! votisque tuorum.
 Ecquid ad haec caepto mens tua perstat adhuc?
 Scribere plura quidem vellem, sed me dolor aegram
 Opprimit, et nimiis charta madescit aquis.
 Atque utinam macie quam sim confecta, videres!
 Molliret sensus tristis imago tuos.
 Jam medici nostram prope despondere salutem,
 Exitiumque, redis ni cito, triste canunt.
 Aut igitur cito redeas, aut laetus in horas,
 Nostras expectes jam licet exsequias.

STANISLAUS KOSTKA

MARGARITÆ KRISKÆ MATRI

RESPONSIO.

Flebilibus conscripta notis, et plena querelis
 Pervenit in nostras litera moesta manus;
 Ille ferox, et quem crudelem nomine dicis,
 Haud legi siccis, nec pudet, ista genis.
 Quodque ego sim tanti, Mater! tibi causa doloris,
 Alternò mihi mens aegra dolore jacet.
 Certe ego si possem mentem mutare priorem,
 Si possem patriis restituique focis:
 Non me fortunæ revocaret splendor avitæ,
 Non honor, et veteris tot decora alta domus;
 Nec quæ promittis reduci fastigia rerum,
 Sive sagi quaeram præmia, sive togæ:
 Unica tu potius reditum, Carissima! nobis
 Suaderes, lacrymis eriperesque tuis.
 Sed quoniam Deus ille vetat, pertendere noli,
 Et sinito incoeptam, quo vocat, ire viam.
 Nam quod me læsæ pietatis nomine damnas,
 Ignosco; vester semper aberrat amor.
 Mater es, et matrum consueto more locuta;
 In crimen, laudem quæ meruere, vocas
 Nempe ego divino præponam matris amorem?
 Hei mihi ab admonitu mens animusque fugit.
 Ordine si careat, pietas quoque peccat, et exlex
 In vitium, amisso nomine laudis, abit
 Nec me quod fugi, Germani injuria movit:
 Altius est nostræ causa petenda fugæ.
 Jampridem caetumque hominum rerumque tumultu
 Defungi certus, si mihi credis, eram.

Saepe mihi dixi : Quid cessas , lente viator ?

Astra vocant : mundo terga daturus abi.

Non temere est quod te capiunt fastidia rerum :

Hoc quoque , si nescis , pondera vocis habet.

Lojolidum te castra manent ; celer arripe cursum ,

Fratris et occultâ lumina falle fuga.

Saepe quidem volui furtim discedere tectis ,

Hei mihi ! vix tacto limine , Frater adest ,

Saepe etiam ingressusque viam campoque potitus

Extimui , coeptam sustinuique fugam.

Nôx erat , et lacrymis per maesta cadentibus ora

Ducimus in longam vota precesque moram.

Hic mihi Divinae visa est Genitricis imago

Ter , quater haud dubia dicere voce , Fuge.

Nulla mora est , fugio : fugio , sanctissima ! dixi :

Nec metus ignotas te duce inire vias.

Vix ea , surrexi trepidus , foribusque reclusis ,

Corripio nullo conspiciente fugam.

Frater , ut agnovit , subita incandescere ab ira ,

Et profugum cursu praecipitante sequi.

Ecce autem attolli toto procul aequore pulvis :

Imminet ; effugii spes mihi nulla super.

Adsis o , Fratremque fuga da fallere , Virgo !

Da mihi , si jussam te duce carpo viam.

Vix bene finieram , videas haerere quadrigas ,

Et consternatos usque resistere equos.

Jam stimulos , jam flagra adhibet , jam rector hábenas

Cōcutit irata terque quaterque manu.

Nil tamen ista juvant : saxo per pectus oborto

Credas in media diriguisse via.

Quid memorem num dura inter caelique , viaeque

Qualia secura gaudia mente tuli !

Quamvis aut nunc sol gracies exureret artus ,

Luridus aut pluviae laederet imber aquae ,

Aut siccas mihi tolleret sitis improha fauces ,

Tantula et ad victum vix foret atra Ceres :

Difficilesque idem peterem per devia somnos :

Ipe mihi in niveis ire videbar equis.

At mea sermones vulgo fuga praeiit : esto :

Non ego , non vulgi murmur inane moror.

Contenta est oculis Superum mea vita probari,
 Scenaeque plus sensus afficit ista meos.
 Quamlibet accuses, laudemque in crimina vertas:
 Nil fuga, si quaeris, nostra ruboris habet.
 Quem damnas, cultu quum me conspexit in illo
 Borgia, Caesareo sanguine junctus eques:
 Macte, ait, o generose, fugâ! sic itur ad astra
 Nec mora, felices jussit inire lares.
 Conveniunt Magnique Patres, Proceresque Quirini,
 Certaue dant animi pignora quisque sui.
 Gratantur, laudantque fugae, votisque precantur
 Eventus habeant grandia coepta pares.
 Verum age quod laudant, carpant magis; et mihi
 suavis

Dura fac inciderit, difficilisque via;
 Quantula iol censes dispendia talia? nempe
 Parta foret nullo tanta labore quies.
 Ut genus hoc vitae felix mihi quaerere fas sit
 Omnia proponas dura et iniqua, feram.
 Non ego ad extremos genibus perrepere Seras,
 Atque ultra sedes vadere Memnonias,
 Nec dubitem Alcidae, si quis fuit ille, labores
 Perferre, et Regis tristia Dulichii.
 Haec tunc vita fuit quum nondum uxorius Adam
 Totum infecisset labe nocente genus;
 Quum Pudor, et Pietas laetis errabat in agris
 Cunctaque securae plena quietis erant.
 Atque uti nam possem verbis expromere, Mater,
 Quam laeta felix nunc ego forte fruar!
 Certe equidem haud totos, ut nunc, deperdita
 sensus

Lamentis abîtum prosequerere meum.
 Quin posito luctuque, et femineo ululatu
 Gauderes miris gaudia nostra modis
 Hic securâ quies, Divisque accepta secundis
 Imperturbatos Pax colit alma lares.
 Hic mores rectique vigent, hic ardor honesti
 Nobilis, et studiis mens operata bonis.
 Nulla hic ambitio, nullum certamen honoris:
 Extremo lis est discubuisse loco.

Quam juvat, ardentes ubi Vesperus extulit ignes,
 Membraque sub noctem fessa labore jacent,
 Hic meus est, dixisse, dies: pars nulla caduca est:
 Nulla et promeritis hora vocavit iners!
 I nunc, et mihi tam laeta regione moranti,
 Ut revoces, fluxas objice, Mater, opes.
 Felix Kostkiade, cui numquam tale merenti
 Contigit Elysium sic habitare nemus!
 Et cuiquam miserandus eris? age mitte querelas,
 Mater, et indignas parce rigare genas.
 Maxima laetandi causa est tibi, nulla dolendi:
 Haec me cum vera crede referre fide.
 At tibi ne possis, quae sunt manifesta, videre
 Aeger praestinguit lumina mentis amor.
 Hic etiam facit, ut scribens aliena loquaris
 Et causam prodas inamemor ipsa tuam.
 Ecquid si duri certamina Martis adirem,
 Si premerem galea miles et aere caput;
 Et latus objicerem telis, mediosque per hostes
 Miscerem insueta praelia dura manu;
 Tunc ego tunc possem laudari, et jure viderer
 Judice te capiti consuluisse meo?
 Idem quod sacris transcripsi nomina castris,
 Suscepit tutum militiaeque genus,
 Mitibus atque agito laetum sub legibus aevum,
 Jam perii, gravius consuluique mihi;
 Et mea jam tumulo defleti corporis ossa,
 Exigui spatium temporis adde, jacent.
 Quid tantos, Genitrix! tibi fingis mente timores?
 Invidiam falso sustinet iste locus.
 Hic etiam licet in longum producere fata;
 Mutatoque albam crine referre comam.
 Fac tamen extinguar primo consumtus in aevo:
 Au, Caeli brevior quod via facta, querar?
 At nihil est metuas de me quod talia, Mater!
 Hei mihi! plus vivax, quam quoque credis, ero!
 Nondum ego terrenas excidi e corpore pestes,
 Concretum nondum perdomuique nefas;
 Nec dum etiam lacrymis in me caelestis origo
 Funditus abstersa lucida labe nitet.

Quo magis incoeptum subito me currere cursum,
 Et genus hoc vitae militiaeque sequi.
 Hic mihi dum vivam, fas sit perferre laborem;
 Non datur e terris mollis in astra via.
 At mihi si lubeat (sic fallax littera narrat.)
 Deserere incoeptae munera militiae,
 Istic ad laudem velis majoribus ibo.
 Erras: haud alia me decet ire via.
 Qui semel impresso tellurem vertere aratro
 Coeperit, et retro post sua terga videt,
 Nequicquam patrio speret considerare regno:
 Sic ait, et vero praemonet ore Deus.
 Quid quod ne possim sacris discedere castris,
 Objecta per te relligione vetor?
 Tu mihi, tu quondam (memini) narrare solebas
 Omina natales quae praeferre meos:
 Nescio quis gravis fulgor tibi visus ab alvo,
 Qualis quum roseo Phosphorus ardet equo;
 Tum tibi, Lojolidum felix quod tessera praefert,
 Augusto inscriptus nomine venter erat.
 Ergo quid frustra Superum contra omina pugnas?
 Exitus hic vitae debuit esse meae.
 Frustra jam precibus, frustra pugnabis amore,
 Frustra et maternas experiere minas.
 Quid mihi cum rigidis, quas jactas, saeva catenis?
 Non sum qui possim per tua vincla trahi.
 Jam retinent vinctum Divinae vincula Matris,
 Numinis et de me tanta merentis amor.
 Ilacc ego, queis teneor felix, si rumpere possim
 Vincula, et excusso vivere servitio;
 Tunc licet Armenia dicar de tigride natus,
 Tunc ferus, et scopulo durior Hadriaco.
 Ah Mater, rerum Mater carissima! si te
 Vera mei fixa in pectore cura tenet;
 Consilia in melius referas; jam pone querelas,
 Neu sortem, tanquam sit mea fleenda, dole.
 Tu quoque, tu pro me potius gratare Tonanti,
 Et memori laudes, ut decet, ore cane.
 Certe ego non fuerim, praestem licet omnia, gratus
 Quo magis hac oro me quoque parte juves.

Sic tibi Coelestes optes quae cumque secudent,
Totaque sint vitae candida fila tuae;
Et mala pallentes quae nunc vis occupat artus,
In pelagus rapidis Vistula portet aquis.
Hoc quoque me precibus pro te contendere par est.
Et facio, oblitum nec videt ulla dies.
Ergo vale, et mihi submissa te fronte roganti
Materna, precor o, fausta precare manu.

VARIORUM ELEGIAE.



ELEGIACORUM LIBER V.

JO. JOVIANI PONTANI.

DE MUNDI CREATIONE.

Hoc coelum, quaeque obliquo distincta meatur,
 Sed certa ferri sidera lege vides,
 Telluremque suo libratam pondere circum
 Quam cingit rapidis Ennosigaeus aquis,
 Spirantesque avium tractus, fusumque superne
 Qui cuncta aetherio temperat orbe Jovem,
 Antoni, Deus e nihilo, Deus omnia fecit,
 Et formam rebus jussit adesse suam.
 Ipse sua voluit coelum splendescere luce,
 Et terras caecae noctis habere vicem.
 Accendique diem claro de lumine solis,
 Solis et auratum maue redire jubar:
 Alternisque atrae lucem concedere nocti,
 Temporaque hinc spatiis ire coacta suis.
 Bissenisque vagum complevit mensibus annum,
 Ut tamen in partes quatuor omnis eat.
 Namque ubi sol nostro languens sese eripit orbi,
 Frigidaque hibernis terra madescit aquis;
 Saevit hyems incana gelu, riget horrida bruma,
 Tum tellus foetu concipit aucta suo.
 Ast ubi vicinos sol ipse recurrit ad ortus,
 Excursu et parili noxque diesque ruunt,
 Terra suas ostentat opes, et divite gemma
 Vestit pampineas vitis opaca comas.
 Ludit et in pratis varium ver, ludit et aestas
 Torrida, et ipsa suas sedula curat opes.

Haec frumenta manu legit, haec et in horrea condit,
 Quae mox versa rotis parca colona terat.
 Hinc cedente die, longe et crescentibus umbris,
 Autumnus pleno fert sua poma sinu,
 Ac Bacchum plenis docet expumare lacunis,
 Sordida dum celeri sub pede musta fluunt,
 Sic statuit Pater ipse hominum, rerumque Creator,
 Annua perpetuas munera obire vices.
 Quin etiam, spirare suis de partibus orbis
 Ventos, et patriis nomen habere locis.
 Namque ab Hyperboreis Aquilo volat impiger antris,
 Excitat oppositas humidus Auster aquas.
 Eoos ciet Eurus equos: at mitis ab orbe
 Hesperio Zephyrus lenia flabra movet.
 Idem etiam occultos alta ad convexa vapores
 Sustulit, ac terrae vertit in auxilium.
 Unde cadunt imbres, et matutina pruina,
 Et grato sitiens rore madescit humus.
 An non et summo decurrunt vertice rivi,
 Et cava muscosis fontibus antra sonant?
 Unde sitim pecudesque, feraeque, armentaue sedent,
 Temperet et riguum caerulea lympa solum.
 Quando aer quoque nimboris inclusus in antris
 Cogitur in laticem frigore, et inde fluit.
 Ne qua igitur mundi regio vacet, implet et undas
 Piscibus: hi campo liberiore natant,
 Ac gregibus variis ingentia regna frequentant,
 Nullaque squamigera gente lacuna caret.
 Alitibusque auras, celebrat, quibus indit et alas,
 Et corpus penna versicolore tegit
 Induit et virides frondenti gramine colles,
 Et nemora arboreis velat opaca comis.
 Communem et statuit victum e felicibus agris,
 Pomaue frugiferis ducit ab arboribus.
 Quo varios usus homini, pecorique avibusque
 Praestent, ac vitae munera certa ferant.
 Et jam quadrupedes foetus, obnoxia morti
 Corpora, plumosos edideratque greges:
 Tum Deus humanos effingere molliter artus,
 Membraque de tenui ducere coepit humo.

Cunctaque formarat studio perfecta magistro,
 Quaeque artem referant, artificemque suum.
 Mox auram aethereo de fomite fundit in illum:
 Vive, ait, et proprio membra labore fove.
 Arcanae mox partem animae de mente profunda
 Libat, et erecti spirat in ora viri.
 Dux, ait, haec hominum generi sit, et ipsa magistra,
 Et sua constituent hac duce, seque regant.
 Hac validas ponant urbes, hac jura notarint,
 Hac coetus pariter, justitiamque colant.
 Conjugium ac thalamos discant ratione magistra
 Servare, et casta religione focos;
 Atque artes tractare bonas, et munera coelo
 Digna, et qui factis nomen ad astra ferant.
 At postquam immemores recti coelestia dona
 Vertère in facinus, perniciemque suam;
 Immemoresque boni, spreta pietate fideque,
 Admorum proprias in sua fata manus:
 Grassati et patrium in jugulum caedesque suorum,
 Miscuerunt, Stygio pocula tincta lacu:
 Inque virum saevit coniux, in pignora mater,
 Pro scelus! ac miscet fasque nefasque furor.
 Haec Pater ut celsa miserans prospexit ab arce,
 Sisteret ut sceleri, criminibusque modum,
 Progeniem in terras summo demisit olympo,
 Quaeque hominis gereret munia, quaeque Dei.
 Haec coeli secreta, et inenarrabile Patris
 Consilium explicuit, quae bona, quaeve mala:
 Quae vitanda homini, quae vitae forma sequenda;
 Quaeque bonos maneant praemia, quaeque malos.
 Denique mortem obiit, vitae dum consulit ipsi,
 Atque suo in coelum sanguine fecit iter.
 Quo magis admiranda Dei clementia summa est,
 Cui fumet quicquid terra Sabaea ferat,
 Quicquid Arabs: date thura focis, costumque cremate,
 Et date cum multa thurea dona prece.
 Pieriosque adhibere modos, et carmina, dignum est,
 Antoni, quae te gloria prima manet.
 Hyblaeo cui rore madent et labra, cui amnis
 Castalius pleno gurgite fundit aquas,

Nysaeique haerent insigni fronte corymbi,
Et coma Pieria fronde revincta viret,
Felicemque animum pascis pietate, fideque,
Nilque tibi vera est religione prius.
Quodque decet, bona cuncta Deo, justumque,
piumque;
Adscribis, nostrae sed mala nequitiae.

JACOBI SANAZARII.

AD DIVUM JACOBUM PICENUM.

Sancte Senex, quem nec sceleris contagia nostri,
 Nec pessum vitiis saecula dedere suis;
 Æquasti magnos qui paupertate triumphos,
 Tantus amor niveae simplicitatis erat.
 Silva tibi sedes, viridique e cespite lectus,
 Explebant mensas amnis, et herba tuas.
 Talis erat priscis victus mortalibus olim.
 Sed priscis tantum vivere cura fuit.
 At te diversos naturae expendere casus
 Juvit, et instantes Divum aperire metus:
 Submotumque oculis animo percurrere coelum:
 Quasque tenes sedes, mente adiisse prius:
 Noscere praeterea cunctarum exordia rerum;
 Quod vix humanae conditionis erat.
 Magnum opus, ut prima surgentis origine mundi,
 Omnia sint senis edita luoiferis:
 Utque Pater sancta demum cessare quiete
 Perfecto artifices jusserit orbe manus.
 His addis cultusque pios, ritusque verendos;
 Cunctaque legifero tradita sacra Duci:
 Quaeque suis castae saeculis cecinere Sibyllae:
 Quaeque Sacer Vatum Spiritus ore refert:
 Sidereos Partus, demissaque pignora coelo,
 Atque inopes cunas, stramineumque thorum:
 Speratumque diu terris, coeloque probatum
 Verum hominem, verum mente, animoque Deum.

Hinc et supplicium infandum , atque opprobria
mortis ,

Claraque de Stygia ducta trophaea domo :

Denique , ut ad Patrem , populo spectante suorum ,

Cesserit ; igniferis praesideatque locis :

Quantaque nos maneant promissae gaudia vitae :

Quantaque venturae gloria lucis erit.

Miremur , tibi si placidi penetrale Tonantis ,

Et patet immensi regia clara poli :

Quum tantum his superas meritis sit scandere in
arces ,

Qua plaga securum lactea monstrat iter ?

Scilicet inde datur terras spectare jacentes ,

Et circumfusi brachia curva maris ,

Solis et ardentis radios , lunaeque recursus :

Qualiter et pacta stent elementa fide :

Nec minus aeternis niteant ut sidera flammis :

Et peragant varias noxque , diesque vices.

Felix , qui nostras potuisti linquere curas ;

Et procul humanas despiciere illecebras.

Felices , qui te colles videre loquentem ;

Quaeque tibi gratos praebuit herba toros :

Quacque arbor , rupesve sacra te fovit in umbra-

Et quae nunc manes continet urna tuos.

Nam licet incultis fuerit tibi vita sub antris ;

Nunc pedibus data sunt astra terenda tuis.

Attamen o dic , Sancte Pater , dic , addita coelo

Gloria , dic , patriae fama , decusque tuae :

Ecquid te solitis mulcet sapientia chartis ,

Mollis ubi Elysium concitat aura nemus ?

An juvat aurata meditantem carmina canna ,

Nectere purpurea tempora cana rosa ?

An mage virgineis sedet invigilare choreis ,

Quum deceat coelo , quidquid in orbe libet ?

An potius toto Superum spectante senatu ,

Diluis aethereo crimina nostra foro ?

Denique quidquid agis , nitidi novus incola coeli ,

Pectoribus nostris non leve Numen eris.

IN DIE FESTO

D. NAZARII MARTYRIS

QUI POSTAE NATALIS EST.

Ecce mihi totum lux expectata per annum
 Jam redit ; Aoniaeserta novate Deae.
 Haec me vitales genitum produxit in auras ;
 Jussit et erectum tollere ad astra caput.
 Nunc mihi purpureis aram cumulate hyacinthis :
 Cingite et intexta limina nostra rosa.
 Sic etenim coluisse decet Geniumque , Laresque:
 Ferte coronato thura , merumque foco.
 Tuque apio innexos dudum acceptura poëtas ,
 Splendida solennes instrue mensa dapes.
 Hic mihi puniceo Pontani Musa cothurno
 Incipiet posito carmen hiare mero :
 Naturaeque vias , tenerique exordia mundi
 Proferet ; et certa cuncta obitura die.
 Crassus at aeterno frondis redimitus honore ,
 Solvat Pieriis ora rigata modis :
 Et mihi Linternumque vetus , placidumque Petrinum ,
 Ostendatque Atavi regna opulenta mei :
 Regna male ad seros heul perventura nepotes ;
 Dum versat varias sors inimica vices.
 Altiliusque novos Superis laturus honores ,
 Pindarica feriat carmina docta lyra.
 Sfortiadum mox dicat , Aragoniosque hymenaeos:
 Jure quibus cantus aequet , Honore , tuos.
 Nec gemat exsilium Spartani Musa Marulli ,
 Ventura ad nostras ingeniosa dapes :
 Verba sed antiqui reddat , numerosque Lucretii ;
 Dum magnis Divos laudibus accumulat.

Adde tuos, Pudrice, sales; adde inclyta Patris
 Eloquia; adde animo tot bona parta tuo.
 Jamque Panhormitae lusus, et scripta recense,
 Et Jovianaeae tempora amicitiae.
 Hos inter meritis rediens Aquivivus ab armis,
 Prodat honoratae praemia militiae:
 Atque choris princeps docti argumenta Plutarchi,
 Cumque suis referat dogmata principiis.
 Ipse autem haud dubitet Cabanilius acta referre
 Vel sua, vel magno juncta Parentis Avo.
 Nec Phoebus minus ipse suo, quam Marte probatus,
 Phocaico pexas tingat in amne comas.
 Tu quoque, quem juvenem veneror, dulcissime
 Garlon,
 Incipe jam docta plectra movere manu:
 Allifasque tuas mihi concine, dum vaga lunam
 Sidera per tacitum nocte sequuntur iter.
 Talibus auspiciis geniales ducere coenas,
 Thespiadumque modis concelebrare juvat.

IGNATII GUILLELMI GRATIANI.

Qui dixit ad mulierem: cur praecepit vobis Deus etc.

Gen. 3 ver. 1 ad 5.

Forte procul digressa Viro, qua cultior herbis
 Vernat ager, lentos moverat Eva gradus:
 Et modo pendentes spectabat ab arbore foetus,
 Et modo vestitum flore recente solum.
 Tum vero motis adludit frondibus arbor,
 Virgineumque tegit mollior umbra caput.
 Interea blando colludens aura sussuro
 Ventilat effusam vertice caesariem.
 Et tremulas agitans avium chorus aere pennas
 Argutos dominae convolat in digitos.
 At venit ad virides tandem male cauta recessus,
 Anguis ubi positus excubat insidiis.
 Olli virgineae sunt ora simillima formae,
 Et pingit varius caerulea terga color.
 Ut videt, assurgit Dominae, blandisque salutat
 Vocibus: ad primos substitit Eva sonos.
 Substitit, occultae sed necdum conscia fraudis,
 Nec sibi subjectas docta timere seras,
 Fit propior, spectatque caput, faciemque decoram,
 Quaeque coloratis terga nitent maculis.
 Tum Coluber. Regina soli pulcherrima rerum
 Foemina caelicolas inter habenda Deos,
 Qualis honor frontis! Qualis tibi gratia vultus?
 Quantum flammeoli dulce micant oculi!
 Non flos exit humo, non fulget in aethere sidus,
 Queis praestare tuus non queat iste decor.

Quid memorem dotes animi? Quid lumina mentis?

Quid, quod cuncta tuo subjicis imperio?

Parce tamen dictis; longe felicior esses,

Si data cuncta tuis poma forent manibus:

Tunc mulier: quaecumque vides pubescere plantis

Sunt mihi, sunt caro tradita poma Viro.

Unum (causa latet) Numen modo denegat, unum,

Quod tenet in medio consita planta solo.

Adjicit et poenas: etenim quo tempore pomum

Tangimus, heu certum nos manet exitium.

At serpens: depelle metum: licet usque minetur

Fata Deus: volueres verba ferent Zephyri.

Haud quemquam fert ille parem, pomaque potitos

Vos fore ceu magnos novis in orbe Deos.

Tunc vestrae penitus scisso velamine menti,

Quodque bonum est, dabitur noscere, quodque
malum.

Hoc est quod tales nolit vos carpere fructus,

Fulciat et vanis jam data jussa minis.

Ergo siqua tui, dilecti siqua mariti

Cura tibi est, vetitos experiare cibos.

Credidit infelix, et iniquo concidit astu:

"O nullis tutum credere blanditiis!

Vos, quibus impubi simplex est candor in aevo,

Alloquor: haec vestris figite dicta animis.

Non deerunt, stygias, qui docti turpiter artes

Vos ita dulciculis vocibus alliciant:

Carpite delicias, Pueri, quas blanda voluptas

Porrigit, ah! dulces carpite delicias.

Membra vigent, tristisque procul mors concutit
arcus,

Restat et in longas vita trahenda dies;

Nec tam turpe quidem, dum fervet mollior aetas

Solvere luctanti fraena parumper equo.

Qui dat jussa Deus, poenas qui saepe minatur,

Ille licet tardo flectitur obsequio.

Hos precor, infidos tamquam vitate dracones:

Vobis Eva suo facta magistra malo est.

De laudibus Divi Thomae Aquinatis.

Mira canam : nec vana putet , qui porriget aures ,
 Abstinet a fictis nostra Thalia jocis.
 Nuper flumineas tacitus spatiabar ad oras ,
 Qua minus hibernis terra madebat aquis ,
 Multaqueolvebam : niveo cum tectus amictu
 Mi puer est media visus adesse via.
 Oris erat forma praestans , poteratque videri ,
 Aurea si gereret spicula , pulcher amor.
 Ut vidi , quo , belle puer , te proripis ? inquam ;
 Dic age , quo properos vertis , et unde pedes ?
 Perge domum ; nam moesta parens te forte vocabit ,
 Teque domi , patriis teque requirit agris.
 Subrisit , dixitque : veni , dextramque tetendit ,
 Atque per ignotas me jubet ire plagas.
 Insequor : in vastos , loca florida , venimus agros ,
 Quos neque vis Boreae , nec mala laedit hiems.
 Vernat humus , riguique strepuit per gramina rivi ,
 Et laevis arbuteas commovet aura comas.
 Dulce queruntur aves , roseis quas ille labellis
 Dum strepit , in digitos attrahit usque suos.
 Ast ubi floriferi protenditur area campi ,
 Eminent excelsa condita mole domus.
 Ostia prima patent nitidis suffulta columnis ;
 Et per centenos itur ad illa gradus .
 Tunc ego : quo ferimur ? cujus domus alta ? petebam :
 Fallor , an haec primo sunt loca culta viro ?
 At puer ; Hispanae Gusmanus gloria gentis
 Haec cum militibus possidet arva suis.
 Dixerat , et portis succedimus : obvia nobis
 Triplex , vix tacto limine , nympa fuit.
 Prima rosis ornata caput , niveisque ligustris ,
 Vestibus intactas praestat , et ore nives .

Altera nuda pedes, tenui velamine corpus
 Obtegit, et sparsas fert sine lege comas;
 Tertia caeruleo circumdata fulget ainctu,
 Subdit et aurato candida colla jugo.
 Haec parere docet, mores docet illa pudicos
 Altera congestas spernere gaudet opes.
 Ulterius protendo gradus; tum longa patescunt
 Atria, mirificis atria structa modis.
 Æmula stelligero rutilant laquearia coelo,
 Et fundit varium plurima gemma jubar.
 Stat nitido paries de marmore, fulgurat auro
 Postis et assyrium sub pede candet ebur.
 At magis et gemmis, auroque corusca Virorum
 Turba subest oculis conspicienda meis.
 Pars gemmis redimita comas, pars fulget in ostro,
 Pars cingit palmis tempora, parsque rosis.
 Vir sedet in medio, cui lux caput aurea circum
 Serpit, et augustum fulget in ore decus.
 Vestis ei bicolor: fusca est pars altera, candet
 Altera pars: mixtus sed placet ille color.
 Illic Gusmanus erat: clare mihi stellula frontis
 Prodidit, et vario picta colore chlamys.
 Horum gesta mihi, memorandaque nomina pandit
 Qui fuit ignotae duxque, comesque viae.
 Hos, inquit, virides quibus ornant tempora palmae.
 Tradidit optatae barbara turba neci.
 Hos, quibus augusta frons cingitur ardua lauro,
 Artibus erudiit sacra Minerva suis.
 Illi regali tractarunt sceptrum sub ostro,
 Illos ornavit pontificalis honor.
 Illic Pius est sacrum cinctus diademate frontem,
 Victor in Odrysias qui tulit arma rates.
 Ille per Hispanas celebris Vincentius oras,
 Qui monet extremam non procul esse diem.
 Dum puer haec memorat, novus ingruit aethera
 splendor,
 Et laeto resonant aurea tecta sono.
 Unde nitor plaususque, peto. Puer, aspice dixit,
 Et regit extensa lumina nostra manu.
 Illius e vultu fulgor novus exilit, illi
 Plaudunt diva cohors, purpureique Patres.

Aspicio, nitidis in vestibus emicat Heros
 Cui rutilat medio solis imago sinu.
 Laurum fronte gerit, manibus fert lilia : Citri
 Gemmato suberant, quem premit ille, throno.
 Hujus, blande puer, dixi, cum nomine mores
 Detege, si deceat; dixit et ille: decet.
 Hunc Thomam dicunt, generis, quod traxit Aquini,
 Ast animi clarum nobilitate magis.
 Parvus adhuc teneros factis melioribus annos
 Vicit, et in parvo spes quoque magna fuit.
 Puber sprexit opes, et avitos sprexit honores,
 Et fugit patriae commoda quaeque domus.
 At quae Gusmano virtutum signa magistro
 Edidit, eloquio vix feret ille sno.
 Mirus ei candor, pietas quoque mira, nec unquam
 Abfuit aeternus, qui comes ibat, Amor.
 Admiror, pictumque peto, cur pectore solem
 Ille gerat, laurum fronte, ligustra manu.
 Purus erat (retulit): puros fert lilia flores.
 Haec sunt virginea sarta gerenda manu.
 Ingenio valuit: sacra sapientia lauro
 Jure coronatas huic jubet esse comas.
 Sol erat, et stygias errorum dispulit umbras:
 Hinc gerit ornatos sole micante sinus.
 Pluraque dicebat: tacitus mirabar: in illo
 Quaedam divini signa decoris erant.
 Ast ubi dicta dedit, tenues secessit in auras.
 Nescio qua patrios ipse reviso lares.

CAROLI ROTII.

DAVID

ABSALONI FILIO PERDUELLI.

Accipe, Nate! tui quæ venit epistola patris,
 Si tuus est, contra quem capis arma, Pater
 Diceris (infandum !) populos in bella ciere,
 Impiaque in patrium poscere tela caput.
 Haecce naturæ pietas illa insita lege?
 Hic tuus in nos est obsequiosus amor?
 Hoc et pro meritis tantis, ingrâte, rependis?
 Et pater hæc de te præmia nempe fera?
 Qui sum te tenero semper complexus amore,
 Qui potui votis nulla negare tuis:
 Qui census, et opes, et quidquid quaerere posses,
 Plus quoque quam ratio posceret æqua, dedi?
 Idem, quum letho fratrem, scelerate! dedisti,
 (Infelix Ammon, hei mihi, adempte jaces!
 Debueram certe deposcere sanguine poenas;
 Ignovi, et patris mollior ira fuit.
 Quin etiam, quum te tota procul urbe fugassem,
 Nec sinerem vultus, dure! subire meos;
 Emotus tandem lacrymis, precibusque recepi
 Mitis, in antiquum restituique locum.
 At non hæc certe mihi tunc promissa dedisti,
 Sed fore te patrio semper in officio;
 Nec quidquam facturum adeo, quod tempore in ullo
 Causa mihi luctus quantulacumque foret;
 Ante et Jordani cursu reditura supino
 Flumina, decideret quam tibi cura mei.

Stultus ego haec verâ te dicere mente putabam,
 Quae nimis cheu! nunc vana fuisse liquet.
 Jam tum tendebas casses, animoque fovebas
 Consilia in nostrum post reditura caput.
 Et merui: siquidem monitus in tempore fidos
 Audissem, nulla parte timendus eras.
 Saepe mihi Joab fidam taciturnus ad aurem
 Haec mihi cum multo dicta dolore dabat:
 Rex, cave; quid cessas? jam nunc tua regia proles
 Nescio quod tacita mente volutat opus.
 Blanditur, prensat, currus parat, aureus urbem
 Ambulat; et speciem sceptrâ gerentis habet.
 Hoc ego non potui de te tunc credere crimen:
 Sed quod nec potui credere, inique! facis.
 Patria si pietas vultu quoque laeditur, ecquid
 Laesa sit horrendâ prodicione parum?
 Majestas violata foret si regia tantum,
 Poenarum quovis nomine dignus eras:
 Nunc pater et princeps facto quum laedar eodem,
 Ecqua satis possit poena piare nefas?
 Haec in me vellem ne nomina bina coissent,
 Tunc nosses, Regum quam gravis ira venit.
 Felix, quis credat? laesa pietate fuisti!
 Temperat offensi principis arma pater.
 Hei mihi, quam dispar tecum certamen initur!
 Tu partes imples hostis, amantis ego.
 Perdere tu me vis, ego te servare laboro:
 Et metuo ne me qui petis, ipse cadas.
 O ego si possem diro cessisse furori!
 Ne caderes, captas quae male, regna darem.
 At nisi restitero, clament in me omnia jura,
 Et populi peragar publicus ore reus.
 Quid mihi cum bello? leges ignoscite! durum
 At nimis est regem praeposuisse patri!
 In diversa trahunt unum duo nomina pectus:
 Pugnant ante oculos rexque, paterque meos.
 Quod patris est votum, regis fortuna refellit.
 Ut vincas nolo rex, voveoque parens.
 Sed tamen haec inter cavi tibi, perfide! quantum
 Servata regis conditione licet.

Quum proceres inter solio radiante sederem ,
 Marte super trepidi consulerentque duces ;
 Jam pars una pedes campis jamque ire pararet ,
 Ardua frenatis pars veheretur equis ;
 Quae censes de te : dederim mandata , sceleste !
 Hei mihi ! adhuc moestis fletibus ora madent.
 Non ego non illis mando , ut certamina fortes ,
 Postulat ut regni publica causa , gerant :
 Non loca , non tempus magis apta requirere pugnae.
 Utque decet , parta laude redire domum.
 Haec ego , quae fuerant regis mandata , relinquens
 Altera sollicito digna parente dabam :
 Magnanimi proceres ! en quo pervenimus ! inquam :
 In natum cogor suscipere arma pater.
 Si quid Jessidae , si quid vos gratia Regis ,
 Et patrius si quid pectora tangit amor :
 Rem gerite , at puerum misero servate parenti :
 Hoc ego rex vobis mando , parensque rogo.
 Non illum , quamvis in me sit perfidus , odi :
 Quidquid agit , sanguis est tamen ille meus.
 Plura locuturum procerum lacrymante corona
 Singultus mediis praepediare sonis.
 Scilicet ista mea est pro tristibus ultio factis ,
 Simque licet per te proditus , haeret amor.
 At tu cui mitem mos est odisse parentem ,
 Pensas offensis tot benefacta novis.
 Jam certus patria regnum tibi caede pacisci ,
 Infanda populos seditione cies ;
 In facinus sumptis duce te concurritur armis ,
 Nullaque pars diro Martis amore vacat.
 Quo periturae ruis ? furialia caepta relinque :
 Nescis ultorem post caput esse Deum ?
 Scilicet ex alto prospectet lentus Olympo ,
 Quo nullum majus saecula tulere nefas ?
 Nec jam fulmineas tantus consurgat in iras ;
 Quantus tartareo torquet in igne reos ?
 Fallimur ? an toto crepuerunt classica coelo ?
 Visaque per nubes arma dedere sonum ?
 Nosco equidem : Deus , ecce Deus ! vindexque parentis
 Haesura in diro pectore tela gerit :

Vindice sub tanto non fas adversa timere :

Jam pridem forti me tegit ille manu.

Cissidae potui furias evadere, quamvis

Inferior longe viribus unus eram.

Ille potens regnis, ego pars quotacumque popelli :

Ille erat instructus milite, inermis ego :

Ad caedem tantis quaerebat viribus ille :

Quaesito mihi nil, unde juvarer, opis.

Nunc contra tantis ineam quum praelia turmis,

Regalique geram sceptrum timenda manu,

Et pater in natum male proditus arma capessam,

Possum ego conatus, stulte ! pavere tuos ?

Vellem Cissides vitasset Numinis iram !

Hei mihi quam diro funere mersus obit !

At quid ago infelix, et vulnera saeva retracto ?

Saeptius audita est tanta ruina tibi.

O utinam saperes, et qui fuit exitus illi,

Concuteret justo pectora surda metu !

Externi exitium qui me petiere, tulerunt :

Tu qui me patrem prodis, inultus eris ?

Europae, atque Asiae, terraeque Libystidos arma

Sub tua certatim signa licebit, eant :

Nil agis : in tenues recident molimina ventos,

Et tibi pro lauro tristior arbor erit.

Nuper quum media caperem de nocte quietem,

Terruerunt animos talia visa meos.

Vidi ego te trepidum ex acie, Martisque tumultu

Dantem sollicitae terga repente fugae.

Quadrupedantis equi subigis latus : ocyor Euro

Ille volat : cursu devia rura petis.

Obvia quercus erat : ramo fugientis adherent

Implexae vento concutiente comae.

Multa reluctatus pendes tamen arbore : liber,

Utque erat a cursu concitus, ibat equus.

Ecce autem procul horrendis conspectus in armis

Miles, et in vultu signa minantis erant.

Qui facis ? exclamo : nihil ille : at protinus hastam

Torquet agens : prohibet scribere plura dolor.

Excutitur terrore quies, gelidusque secutus

De toto sudor corpore membra lavat.

Ex illo afflictus vitam traho, nec mihi cessant
 Unquam tabifico rore madere genae,
 Tistis et ante oculos semper mihi quercus oberrat,
 Et videor casus ipse videre tuos.
 Scilicet huic recident male sanae coepta juventae :
 Regna petis juveni dum tibi fata paras.
 Fortunae impatiens, nimium vis esse beatus,
 Et properas idem, quod fugis, esse miser.
 Quam metuo ne dum temere sublimia captas,
 Visas infernae trista tecta domus !
 Vineae non illic Engaddi, et Galgala myrto
 Consita, et irriguis buxifer Hebron aquis :
 Regia non, pulchraeque aedes, quas scilicet unus
 Ut teneas, patria spargere caede juvat.
 Tunc igitur (tristi nullum sit in omine pondus)
 Ibis in aeternos hei mihi ! praeda rogos ?
 Si potes ah ! tantam, sed non potes, effuge pestem,
 Dumque licet saeva projice tela manu.
 Nec metuas, quod tu regemque, patremque petisti :
 Tristia Lethaeis acta dabuntur aquis.
 Quo prius ipse loco fueras, eodem esse licebit,
 Pluraque quam tuleris : tu modo posce ; feres.
 Sic erit; et major quo sit fiducia, spondet
 Hoc interposita rexque, paterque fide.

SANCTO FRANCISCO XAVERIO

PRO SALUTE REGIAE SERENITATIS FRIDERICI
 PRINCIPIS ELECTORALIS SAXONIAE VOTA.

Dive, fave : tuus ecce Cliens, tibi deditus uni,
 Plus oculis qui te diligit atque anima,
 Qui te longinquis veneratum venit ab oris,
 Spes Regni, Patris gloria, Matris amor,
 Saxoniae Princeps Fridericus, Regius hospes
 Ingreditur, templis procubuitque tuis.

Aspicias ut totis habians te sensibus, aram
 Obsidet, et cupida te sibi mente vocat?
 Nempe rogat; sibi poplitibus qui leutor inhaesit,
 In Tibrin per te, Dive solutus eat.
 Quem non paeoniaeque artes, studiumque medentum
 Balsamaque, et docta pharmaca mista manu.
 Tota nec Inarime Bazarum inaxima arenis,
 Aut lympa potuit vincere sulphurea;
 Dive, tuo sperat nutu depouere morbum.
 Hanc spem non animis auferret ulla dies.
 Et potes et meruit. Non te (quando omnia nostis
 Caelestes) laudum longa per orsa morer.
 Tantum oculos, vultumque notes, habitumque pre-
 cantis :
 Nempe unum e vestro dixeris esse choro.
 Quare age quid cessas? quod te rogat, annue praesens
 Annue, neu dura longius ure mora.
 Te meminisse decet, tunc quum mortalis agebas
 Nec tantus, quantus nunc es in orbe, fores :
 Ut sacris per te lustrata Aurora latinis
 Obstupuit tantis pallida prodigiis.
 Illa etenim fusasque acies, et jura procellis
 Imposita; et trepidis addita frena notis,
 Flammisque e Coelo, tempestatesque vocata,
 Et Phoebi jussos condere lumen equos;
 Illa etiam pestemque et morbos vidit abactos,
 Redditaque attonitis corpora functa focis.
 Haec, et plura olim: nunc te quum Regia Coeli
 Accipiat lactis sedibus Indigetem,
 Quum tantus late regnes, et nota sit illa
 Qua potes, aeterio gratia rara foro,
 Ut tabulae, et passim voti argumenta potentis
 Dona tot e sanctis postibus apta docent;
 Unius affecto depellere corpore morbum
 Supplicis, immensi, credo, laboris erit.
 Aspice Lojolidum tua gens quoque, pervigil usque
 Retius et toto pectore sollicitus
 Haeret, et in longum fletu tibi supplicat, et quum
 Saxonidum meritis se neget esse parem,
 Solvendi pro se partes tibi, Dive, relegat;
 Et merito: ad vestras tutius itur opes;
Carm. Delect. Vol. I.

Summaque sit quamvis alieni maxima, vobis
 Delungi facili conditione licet.
 Te volo, si dicas, Friderice, valere; repente
 Ille valet, grates et tibi sospes agit.
 Ah! precor ah! tali jam nunc bonus utere verbo:
 Pendere ex illo publica vota vides.
 Ite alacres! quantum populorum Vistula et Albis
 Ambit, caerulea fertilis omnis aqua;
 XAVIERI ingenio sic est mihi credite; ab illo
 Non unquam rediit irrita turba domum.
 Ite alacres! laetisque onerate altaria donis,
 Quodque cupit tribui jam sibi quisque roget.
 Auguror: optatis Friderico quisque salutem:
 Nec quisquam majus, quod sibi poscat, habet
 Sic est, magne Pater; multos servabis in uno:
 Res est prae cunctis digna favore tuo.
 Quis scit an et tanto gratus pro munere causas
 Irarum oblitus, dissidiumque vetus,
 Et placidam accipiens mentem mitissimus Amnis,
 Amnis ab Hercyniis saltibus exorians,
 Qui Dresdam, floremque arctoi interfluit orbis;
 Ausonii quondam terminus Imperii;
 Albis io tandem, pacis te, Dive, sequestro,
 Antiqua discat Tibrin amare fide.
 Fallor? an Augustae TRIADI describitur aedes?
 Coelo operis formam desiluisse reor:
 Dresda, fave, tibi surgit honos. Ignoscite fasso
 Templata Atavum tanti vestra ruina fuit
 Huc Paros, et Lygdos, huc saxa virentia mittit
 Thaenaros, et roseo picta colore Nomas.
 Di bene, quod rivis argenti plurima manas,
 Misnia; non peregre quaerere oportet opes.
 Ludet io Cyclops, patriisque excocta caminis
 Artificum subeat lucida massa manus.
 Partem opere in tanto nec parvam tu quoque habebis,
 FRANCISCE, a magno prima Tonante ferens.
 Nempe indonatum pietas te Regia linquat
 Augusti: tantum suscipiatque nefas?
 Ille tuae regnum fidei concredidit. Ille
 Auctorem dubiis te sibi rebus habet.

Auspice te sumit, te sumta reponit et arma,
 Deque tuo legio nomine dicta sibi est.
 Idem etiam, ut de te soboli cognomen adoptet
 Quamvis ingentes spernere gaudet avos.
 Caetera quid memorem? quam sit tibi deditus, et quam
 Te ornare usque novis muneribus cupiat;
 Non ullo monstrante tenes. Nunc quae nova porro
 Dona dat, accipias qualiacumque, rogat.
 Ingens Oebaliis alte suffulta columnis
 Ara fit; e Coelo te quoque adesse decet.
 Dic, bone, dic Divos inter mitissime, in auro
 Effingi docta qualis ab arte velis?
 Ipse equidem nolim talem te effingere, qualis
 Spectari vulgo qualibet aede soles;
 Aut plebem instituens sacris, aut flumine sancto
 Aspergens Regum tempora Bungalidum,
 Aut etiam qualem morientem, ah! vidit in antro
 Insula Sinarum proxima littoribus
 Haec vetera, et nulli non visa, aut cognita: major
 Non prius ostensis gratia rebus inest.
 Aureus in medio stabis mihi; dextra decenter
 Sublata in morem fausta precantis erit,
 Ante pedes faciam natum procumbere, signans
 HOC . PRO . COMMISSA . RELIGIONE . PATER.
 Haec esto nova forma operis. Ne, quaeso, moreris
 Artifices. Viden' ut turba parata venit!
 Quare age, dum sacras pendens Fridericus ad aras
 Non ulla laxat vota precesque mora:
 Dum Pater Augustus, dum Regia Mater, et omnis
 Omnis Saxonicae turba novella domus;
 Dumque Ignatiadum tota cum Gente Magister,
 Romaque pro charo Principe vota fecit:
 Exere, io! dextram dextram tot mira patrare
 Assuetam, et Juveni fausta precare pio.
 Si quid id est, gemmasque etiam circumspice, et aurum
 Unde recens illi splendor, et auctus honos;
 Scilicet hoc misso tibi munere Regia Mater,
 Qua licuit, studium' testificata suum est.
 Illa tibi noctes vigilans operosa laborat,
 Et textum phrygia sedula pingit acu.

Assistunt natae circum data pensa trahentes,
 Inter quas tenui sic ait ipsa sono:
 Mittenda haec Domino (nunc o nunc promite vires)
 Quam primum nostra munera facta manu.
 Forsitan officium famulae dignatus inertis
 Et nos, et solito nostra favore tegat,
 Forsitan et (sed enim tanto haud me dignor honore
 Et mora prodigiis sunt male facta mea)
 Sed tamen illius si munere sospes ab urbe
 (Innocua o Matri turba feratis opem)
 Si sospes Latia meus ille rediret ab urbe,
 Tunc ego, tunc illo sospite quanta forem!
 Desinit in lacrymas; atque his quoque, non modo
 gemmis,
 Jam tibi mittendum scilicet ornat opus.
 O Pater, o superum mitissime! lente videre
 Hos matris fletus lente videre potes?
 Parce metu, frontemque exporrige, Regia Mater;
 Mox certa liceat dicere voce, VALET.

S. JOANNES FRANCISCUS REGIS

P. MUTIO VITELLESKO

PRAEPOSITO GENERALI SOC. J. S.

ARGUMENTUM.

*Summo pere petit facultatem transmittendi in Americam
ad Cannadensium salutem procurandam (*).*

En iterum tibi cum lacrymis, Pater optime, fertur
Conscia propositi pagina fida mei.
Jam pridem mihi quae dederas, mandata peregi,
Per longas Superos consuluique moras.
Quo magis atque magis precibus responsa requiro,
Incessit thyrsos me graviore Deus.

(*) Exemplum Epistolae autographae S. Jo. Francisci Regis
ad P. Mutium Vitellescum Praepositum Generalem S. J. quae
Romae in Tirocinio ejusdem Soc. religiose asservatur.

ADMODUM REV. PATER.

P. E.

Rescripserat V. P. mihi, quae est ejus humanitas singula-
ris, et quidem, tunc se rationem habituram desiderii mei circa
Cannadensem Missionem; quum primum id maturum foret.

Nil, nisi Iroquaeos, terramque Huronida verso :
 Auxius et blandis pascor imaginibus.
 Jam videor mihi barbaricos lustrare recessus,
 Cultaque semiferis visere tesqua viris;
 Jam capiti passim sanctos invertere rores,
 Agminaque Ausoniis tota piare sacris.
 O utinam, quae tanta animus spe praecipit orsâ,
 Eventus per se sint habitura suos!
 Ipse (nec inficior) male fortis fortia conor :
 Conari sed qui me facit, addet opem.
 Quos legit, et lectos paribus Deus instruit armis,
 Nec sinit injusto pondere terga premi.
 Aspice (1) Saphatiden junctâ bove rura colentem :
 Quam bene fatidici munia vatis obit !
 Tum rudis upilio Tecue de saltibus Amos
 Attonat horrendis impia saecula sonis.
 Nil ego quum possim, possum tamen omnia ; tantis
 Si qui me caeptis destinat ; auctet ope ;
 Det modo quae jubeat, jubeat quaecumque, facessam,
 Nec metuam ne non perficere orsa queam.

Ecce jam integer ab ejus ortu decurrit annus; passum est hyemem totam, totum floruit ver, tota maturuit aestate; et autumnus, maturum certe est. Legat, et eligat illud tandem vestra benignitas, per Deum, Pater, obtestor : et sint licet, qui ab hac Missionem petenda me avocent, quod, ut ipsis videtur, vix possit obtineri, vitio meo, an cuidam quasi fato nostrae provinciae grandem hanc difficultatem adscribant, ipsi viderint; talem tamen ego Missionem non despero, praesertim quum magnam mihi sua epistola Vestra Paternitas jubeat spem ipsius brevi consequendae. Det igitur quod jubet, supplex oro, et jubeat quod vult.

Vestrae Paternitatis

Allenaci 21 Nov. 1635.

Servus in Christo humillimus et filius indignus
 JOANNES FRANCISCUS REGIS.

(1) Eliscus filius Saphat.

Hei mihi! quid cesso! viden' ut mercator ad Indos
 Solvit, et audaci remige verrit aquas?
 Nempe ut longinquo referat sub sidere natas,
 Utilius tellus; quas sua celet, opes,
 Aequora non, scopulosque, et monstra natantia Ponti
 Horreat, ignotas praecipiatque vias?
 At nos qui causa tanto praestamus, inertes
 Ducimus heu patriis otia littoribus!
 Qui causa praestat, praestet quoque rebus, et illuc
 Quo pietas, et fas imperat, acer eat.
 Aspice Cannadicam, late qua pertinet, oram!
 Jam vasta heu! nullo vindice terra perit.
 Scilicet obscoenis Pluto sacratus in aris
 Gaudet infanda religione coli?
 Quosque Dei soboles Deus ipse redemerit; ausit
 Impune injustis tollere vindiciis?
 Est mihi suffixum referens in stipite Numen
 Parva, sed artificii picta tabella manu.
 Hanc ego jamdudum (si fas mihi vera fateri)
 Cernere non, duro sim licet ore, queo;
 Illa mihi quamvis tacitis convivia verbis
 Usque facit, lentas increpitatque moras:
 O piger! o nostrum nunquam doliture dolorem!
 Cessas, et nil te vulnera nostra movent?
 Quos propter, tantos potui perferre labores,
 Ipse nec exiguo, dure! labore juves?
 Nate Deo; tua non possum convicia ferre,
 Frangor, et attonito flagrat in ore pudor.
 Ibo, nec facies deterreat ulla laborum.
 Jam mihi, jam longum, patria terra, vale.
 Alma fides totum late ventura per orbem
 O ades, et niveâ carbasa solve manu!
 Ille ego sim, sacris per quem lustranda Latinis
 Accedat signis Cannadis ora tuis:
 Quem terat, assiduusque labos, et tristis egestas,
 Cui sitis, et pallens torqueat ora fames;
 Quem merset sub aquis, quem lento torreat igni
 Barbarus, aut stricto cui petat ense latus.
 Unde sed haec nobis? alios ea palma sequetur:
 Nos manet, heu! patrio sub lare funus iners.

An male praeteritae commissa piacula vitae,
 Obstetis votis semper iniqua meis?
 Pestifer annus erat, ictusque impune per urbes
 Sternebat passim corpora dira lues.
 Ecce manus, Jesu castris quae militat, ardens
 Prosilit, et miseros qua licet, arte levat.
 Me quoque si possem mortem pro laude pacisci
 In turbam, et caedem pulcher agebat amor.
 Nec mora, do nomen lacrymis, prece, questibus insto;
 Omniaque admoveo tela; repulsa venit:
 Eheu! quid misero restet mihi, nunc quoque votis
 Si veniat per te dura repulsa meis?
 Parce Pater, neu me ductum spe decipe inani:
 Non ego militiae posco aliena meae.
 Ah valeat! qui castrorum securus in umbra
 Sustinet aetatis tempora pigra teri.
 Militis officium nostri est, non castra fovere
 Segnem, non patriis insenuisse focis:
 Exeat, excurratque vagus qua nascitur, et qua
 Occidus Titan mergitur Oceano
 En nova in Ammericces aperit sese area regnis:
 O quali vecta est Gallica classis avel
 Serius at duri sunt rupta repagula Ditis,
 In nova Relligio commigret arva licet.
 Jam fidei pia Massaeus (1), fortisque (2) Briardes
 Spargunt barbarico semina prima solo.
 Nec male respondet culturae terra: sed eheu!
 Pars quota, nempe operis culta duabus, erit?
 Vidit et hoc magni mens provida Regis (3) et ultro
 Quid, mea, Loiolidum turma, moraris? ait.
 Vestrum est Cannadicis operas inducere campis:
 Ex illo seges est laeta petenda solo
 Nam mihi Gallorum quo rem protendere, si non
~~ut sua protendat regna Latina Fides?~~
 Salve o magnorum salve Rex maxime regum!
 Non tua, cui vincis, deseret arma Deus.
 At tu quid cessas Canadae transcribere Gallos?
 Quod faceres per te, Rege rogante neges?

(1) PP. Encommius Masseus Lugdunensis etc.

(2) Petrus Briardus Gratianopolitanus.

(3) Henricus IV Galliarum Rex.

Sed neque tu cessas, nec quae tua pervigil omnes
 Pertinet in partes cura, monentis eget.
 Jamque hos, jamque illos solatur epistola felix:
 Sed quae soletur me quoque, nulla venit:
 Nulla venit, totoque exspectans irritus auno
 Scilicet incuso facta nefanda mea;
 Namque aliud quid sit, quod votis usque repugnet?
 Aut nihil, aut votis iste repugnat obex.
 Me mea privari, credo, provincia nolit,
 Cui gravis, atque omni parte pigendus ego.
 Ingenium mihi nam tristis natura negavit,
 Ut nequeam trista Pallados ire via.
 Nota loquor: censu doctrinae exclusus, in imo
 Haesi militiae per tua jussa gradu (1).
 Nec taedet, laetorque magis: non omnibus apta
 Omnia sunt: quisquis quae potes, arma geras.
 Si mihi Socraticas non fas est tangere chartas,
 Docta nec in sacro verba tonare foro;
 At possum puerosque rudes, et plebis egenae
 Agmine praeceptis instituisse piis:
 Possum desertos excurrere fortis in agros,
 Et colere agrestes, rustica corda, manus.
 Testes Velaunum montes, nemorosaque tesqua,
 Et loca montanis vix adeunda feris.
 Non mihi praeruptas labor est erepere cautes,
 Pellereque obstantes pectus ad usque nives.
 Nec piget hibernos sub divo carpere somnos,
 Et temere in nuda sternere corpus humo.
 Si quid id est, possum minimo quoque vivere: nec me,
 Hospitio quisquam sentiat esse gravem.
 Da mihi quae passim currunt Acheloidas undas,
 Da Cererem exiguum, caetera parce, sat est.
 Quid tamen hoc refert? lento praecordia voto
 Tendimus, ingratas pertrahimusque moras.
 Scilicet hic standum est, parmaque inglorius alba
 Hanc animam in castris deses oportet agam.
 At non haec certe quondam sperare jubebas:
 Eheu! nunc alia cur mihi mente venis?

(1) Cepit enim, ut dicimus, gradum in Societate.

Scribebas (memini) Perfer , maturaque nondum,
 Regiade parvâ concoque vota morâ.
 Hei mihi pro parvâ quanta est mora ! praeterit annus,
 Nec desideriiis aura secunda venit.
 Vos eritis testes incensaque quaestibus astra ,
 Nullaque non moestis humida nox lacrymis.
 Non ita in apricis coquitur vindemia saxis ,
 Cana nec aestivi sideris igne Ceres ,
 Ut matura mihi trepido sub pectore vota
 Fervent , tam longas nescia ferre moras.
 Atque utinam ingentes , quibus aestuo , cernere curas
 Posset , aut qui me spiritus intus agit !
 Haud aliter teneor patriis inclusus in oris ,
 Quam cui barbaricâ compede crura sonant ;
 Quamque ubi visa fera est , venaticus Umber , anhelô
 Pectore quem non vis ulla tenere queat.
 Par desiderio non sum , Pater ! opprimor cheu !
 Et potes ad sensus ipse referre tuos.
 Namque olim Albionem percussus amore juvandi
 Tu quoque sensisti , quam sit amara mora :
 Tu quoque quam gravesit , quod aves , non posse tenere :
 Jam mihi libertas sit tua facta loqui .
 Te memorant illis aegrum sedisse diebus ,
 Fundentem assiduas nocte dieque preces.
 Pallor erat vultu , qualem Berecynthia buxus ,
 Aut novâ derepto cortice cedrus habet.
 Tum lacrymae potus , dolor esca , insomnia somnus
 Vixque erat ex illo nomen et umbra viro.
 Scilicet haerebat cordi lethalis arundo
 Anglia Romano concilianda Patri.
 Ergo expertus idem , nostros ne despice luctus.
 Hei mihi si nihilo te magis ista movent !
 Cur molli reliquis , uni mihi pectore duro es ? -
 Quid tantum admisi commeruique , Pater ?
 Aut bene promerui , merces sit barbara tellus :
 Aut male , sit poenae pars quotacumque meae.
 Quod te per Superos oro , per Numen , et illam
 Quae finxit mores cura paterna tuos ,
 Annue ; neu me causando jam differ in aevum !
 Improbis ahi praedas , dum moror , Orcus agit.

CAMILLI ZAMPIERII.

AD SANCTUM JOB.

DE TECTO IN AUCTORIS DOMO REPENTE DELAPSO.

Non ideo quod mentem animi invictam, et tua facta
 Dictaque, quo potui, carmine retulerim,
 Immortalis Job, sperabam aliquam inde tuarum
 Partem aerumnarum te dare nolle mihi;
 Sed quod praesidium te hominum infelicium habere
 Noram, et in adversis casibus esse pium.
 Attamen, ut video, spem pavi prorsus inancem
 Haec sinito tecum me modo pauca queri.
 Quum mihi corrueret disrupta ingens trabe tectum
 Te ne adjutrici non properasse manu?
 Hocce praesidium? haec pietas sperata clienti?
 Sed tua forsán ego munera non merui.
 Fac me non meruisse; tamen (si dicere fas est)
 Debueras aliquid pro tuo honore mihi,
 Pro pietate tua facere, ac multo magis ex quo
 Tu adversae expertus vulnera sortis eras.
 Nam meminisse potes quali tua pectora luctu
 Tabuerint tunc, cum nuntius horribilis
 Atro habitu, scissusque comas, atque edere vocem
 Vix prae angore valens: tota repente domus,
 In qua hilares agitare tui convivia nati
 Assuerant (inquit) funditus acta truci
 Impete ventorum cecidit, cunctisque sepulchrum
 Una eadem natis ampla ruina dedit.
 Res dura illa quidem! sed tu procul inde manebas:
 Ipse autem medio constiti in exitio.

Tignorū audiui crepitum sua pondera primum
 Ferre recusantum, grandine et horridius
 Immani quum sternit agros, mugitque per auras.
 Deoſo conſpexi turbine praecipites
 Deplnere infractas tegulas, caementaque deorſum,
 Atque o qui gelidus me pavor arripuit
 Confestim, et coit trepida in praecordia ſanguis!
 Quam timui natis, nequis abire volens
 Nescius urgenti caput objectare periclo
 Sese ultro inſiſum ferret in interitum!
 Quam timui uxori, quae currere, quaerere quidnam
 Id ſtrepitus, et quidnam eſſet id exitii!
 Verba mihi deerant; caſuque elapſus acerbo,
 Non animi compos, non ego mentis eram.
 Ut poſtquam ſaevo furere igni deſtitit ingens
 Fulmen, de tacto ſurgit arator agro
 Percuſus mentem ac ſtupēfactus, ubi fragor illum
 Maximus occiſos ſtraverat ante boves,
 Qui cernit ſine honore ullo, et ſine frondibus altam
 Pinum, quae placuit jam ſibi viſa procul:
 Talis ego. At tu qui excipere, ac fortasſe probare
 Noſtrarum duxti carmina Pieridum,
 Immemor officiī cuiuſvis linquere tanto
 Me potuiſti in diſcrimine ſemianimem?
 An tibi quaero labor tecto occuſſare cadenti
 Ut poſſem ſaltem damna minora pati?
 Sed quorſum haec ventis effundo rapacibus? o nos
 Vere conſilii, vere inopes animi
 Mortales! quae luminibus non cernimus ipsis,
 Magni non facimus munera caelicolum.
 Impulſa dudum tacito ac molimine ſaevi
 Hoſtis tartarei forte ruina meo
 Iſta parabatur capiti; aut cuicumque meorum;
 Atque capillum unum laedere non potuit.
 Cuius ope id factum? noſco te, Sancte, beatis
 Certe ipſe exieras anxius e domibus.
 Et quoniam ruere omne mihi alto a culmine tectum
 Debuerat: prohi! quo credo equidem ſtudio
 In me ora, in me oculos vertebas, nequā periclo
 Ligna ulla in tanto, ſaxave me peterent.

Quod tibi cunque ideo acceptum refero ipse, meoque
Numquam animo pietas effluet haec memori,
Effluet haec numquam. Tu vero aliquod bonus adfer
His deploratis casibus auxilium :
Inque tua esse fide ut dicar, queis auctus es olim,
Prospera fac itidem fata venire mihi.

FRANCISCI MARIAE ZANOTTI.

AD DIVUM PHILIPPUM NERIUM.

ELEGIA.

Etsi animum subito percussus funere amici,
 Quem nuper mihi mors invida praeripuit
 Extinctum misere, atque ipso sub flore juventae,
 Spem patriae, nostri spemque sodalitii,
 Vix possum ingenium solitas appellere ad artes
 Musarum, et mentem vertere ad haec studia,
 In quibus exercet sese generosa juvenus,
 Tantis curarum fluctibus intus agor;
 Non possum tamen, o felix, atque optime Nerī,
 Hic ego non aliquos promere versiculos
 Non quō facta tua, et divinas dicere laudes,
 Et quae factorum praemia magna capis
 Ipse putem me posse, aut, si possim, hoc opus esse:
 Sunt qui resque tuas, et decora, et titulos,
 Virtutesque aeterno carmine complectantur,
 Mi satis est animum expromere, et officium.
 Scis tu; quum potui, pastores Arcadas inter
 Quae tibi sancte Senex, carmina persolui.
 Nimirum ingenuas ego tunc per Apollinis artes.
 Quum nullis curarum aestibus abriperer,
 Gaudebam, exultansque animo laetusque ferebar:
 Nunc me crudelis nocte dieque dolor
 Occupat assiduus, animique in limine perstat
 Expellens omnem pectore laetitiam.
 O Pater, o mihi da curae moderarier isti,
 Et luctum tunc tantum comprimere, et lacrymas

Quas dudum cari mors immatura sodalis
 Exprimit. Haud peto ego hoc pro pietate mea.
 Pro meritis, et pro virtutibus ipsius ipsis
 Pro fide, et eximia relligione peto.
 Nam meminisse decet te, quae mihi multa precatus,
 Dulcia quum vitae tempora transigeret,
 Ille fuit, quum se ante tuam prosterneret aram
 Dona ferens multis non sine lacrymulis;
 Postea linteolo, quas leniter abstergebat,
 Plorantem ne quod proderet indicium.
 O qualem, et quam nunc mutatum tempore ab illo
 Dulcis Alexander, te miser excipio!
 Dulcis Alexander nostri solamen amoris
 Quondam, nunc luctus, perpetuusque dolor.
 Non jam ullam invises aram, non jam amplius ulla,
 Hei mihi! pro caro dona sodale ferēs,
 Quem miserum liquisti, et pectore consternatum.
 Credo equidem, nec mi id quidlibet eripiat,
 Te vita meliore frui, et coelestibus auris,
 Vesci, interque altos degere coelicolas.
 Illic res omnes, rerum et primordia cernis;
 Tam multa unde exstant, tam nova, tam varia,
 Quae nos ignari miramur, at omnia paucas
 Per leges Natura expedit, et faciles.
 Ut solem obducant maculae, radiantiaque astra
 Fixa suis maneant singula vorticibus:
 Utque iis circumfusa volumina materiai
 Immensis sese circumagant spatiis;
 Atque alios orbes secum, ingentesque planetas
 Praecipites cursu praecipite abripiant,
 Aspicias, ut suo de vortice quisque cometa,
 Exeat inque alios transvolet, inque alios.
 Quamquam equidem nil haec plane sunt omnia,
 nil sunt,
 Ad tua si propius gandia respicio,
 Quum Deus illabens praecordia in intima, se jam
 Praebet, et ipse ipsam mentem animi alloquitur.
 Tunc nempe illa nova, ac mira dulcedine rapta
 Exsultat, nec sese capere ipsa potest:
 Haec quidem ego recolo, et tacitus mecum omnia verso;
 Felicem et te nunc esse scio, et fateor:

Quin etiam (adjuro teque , et tua numina , Neri)

Sublevor , haec mecum ipse omnia dum reputo.

Nam decet immo aequum est , si quae sint gaudia
amicis,

Gaudere , atque eadem illa esse putare sua.

Sed tamen ut cari vultus , atque oris imago

Mi redit , et nunquam , nunquam ego te aspiciam!

Nunquam te amplectar posthac! nunquam alloquar!
o me

Me miserum ! qui tunc intima ad ossa dolor
Labitur , et mentem , et sensus mihi surripit omnes!

Quare ego per sanctam , quam violasse fidem
Me nunquam puto , tu nunquam certe violasti

Te precor , atque simul te , venerande Senex ,

Cui prisco de more sacrum hunc celebramus honorem,

Si quidquam haec curas , atque hominum studia,

Votaque de coelo bonus aspicias ; hanc mihi , quaeso,

Si fieri potis est , demitte tristitiam.

CASTRUCCI BONAMICI.

IN NATIVITATE DOMINI (1).

ELEGIA.

Silvestrem musam meditabimur, Alphesibaei;
 Non venit a nostro grandior ore sonus.
 Tu mihi, quem noctu nascentem in paupere tecto
 Effudit niveo casta Puella sinu,
 Christe fave, tibi musam dicimus Alphesibaci,
 Haec Puero canimus, sunt Puero ista satis.
 Venerat ad Stabulum, quo magnus Coelicolum Rex
 Attigerat lucis limina factus homo,
 Agresti in turba Pastorum Pastor et ipse,
 Qui pascit niveas Alphesibaeus oves.
 Attonitis oculis ubi constitit admiratus
 Hos baculo incumbens edidit ore sonus:
 Dicite io montes, et flumina, vos quoque silvae
 Dicite nascenti carmina digna Deo.
 Jam valeant Satyri hircipedes, Faunisque bicornes
 Pan, et Nymphae, aliis numina, monstra mihi,
 Qui jubet induci pluvias, nimbosque sonantes,
 Qui solem accendi, et lumina sera jubet,
 Virgineum Deus ille Polo delapsus in alvum
 Tandem straminea nascitur ecce casa:
 Illic teneros flores, virides hic educat herbas,
 Et sata, si visum est, imbre juvante rigat.

(1) In priore elegiacorum libello his elegiis locus erat; sed cum mihi opportune non pervenissent, locum hic dare visum est.

Hic facit, ut simae tonsent dumeta capellae,
 Hic facit ut carpant pabula grata boves;
 Dicite io montes, et flumina; vos quoque silvae
 Dicite nascenti carmina digna Deo.
 Pro viola prius, et pro purpureo Narcisso
 Surgebant lolium, carduus, et salices.
 Nuuc pro sente thimus, pro vili carduo Acanthus,
 Pro salice ambrosia, et baccaris, et lolium.
 Cana prius gelidis squallebant arva pruinis,
 Atque erat in senibus gratia nulla rosis,
 Pascebatque aegras deserto in littore spina
 Horrenti, et dura carice Pastor oves.
 Nunc nemus omne viret, nunc omnis parturit arbor,
 Floreque se vario laeta colorat humus.
 Nunc cythiso saturantur oves, distenta capellae
 Ad stabulum referunt ubera lacte novo.
 Dicite io montes, et flumina, vos quoque silvae
 Dicite nascenti carmina digna Deo.
 Cresce Puer, magni magnum Jovis incrementum:
 Prisca iterum redeant saecula, cresce Puer.
 Ut Phoebus Coelo decori est, et sydera nocti,
 Ut segetes arvi, vitis ut arboribus,
 Tu decus es nobis. Procul hinc furor, insidiaeque
 Et dolus, et caedes, luctus, et ira nocens.
 Parcite vos etiam pecori furesque, lupique.
 Pastorum viles Rex colit iste casas.
 Dicite io montes, et flumina, vos quoque silvae
 Dicite nascenti carmina digna Deo.
 O ego quanta darem, si quae proscindit Amintas,
 Excolerem multo jugera opima bove?
 Quod potui, pellem detractam tergore cervi
 Affero, ne laedat membra tenella gelu.
 Hunc nuper queruli muscoso in margine fontis
 Incautum positus cepimus insidiis.
 Capreolum matri damus: hunc cum saepe rogaret,
 Non retulit multa Cintia blanda prece.
 Crastina Lupilli liquefacta coagula lacte
 Et feret in ceris mellea dona suis.
 Dicite io montes, et flumina, vos quoque silvae
 Dicite nascenti carmina digna Deo.

Cum vero a terra poteris contingere ramos,
 Parebit jussis tum pecus omne tuis.
 Nos tibi tunc ovium praestabimus ubera foetis,
 Carpemus ramis mitia poma tibi.
 Atque tuas aliquis laudes incidet in ulmis
 Quas legat, et cantu Pastor ad astra ferat.
 O crescant ulmi, pariter tua nomina crescant;
 Laudibus atque arbor crescat amica tuis.
 Tu Puer interea blandum ridere Parenti
 Assuesce, et nostras excipere aure preces.
 Exere lacteolos digitos, dextramque tenellam,
 Et sine me ex illa carpere basiolum;
 Sumere da, formose Puer, da sumere quaeso
 Basiolum dulci dulcius ambrosia:
 Haec cecinit, viridi et descripsit cortice fagi
 Qui pascit niveas Alphesibaeus oves.

ELEGIA.

Natalem si, Diva, tuum, lucemque beatam,
 Auras qua primum prodis in aethereas,
 Non alacres agimus, nec laetis sollicitamus,
 Ut quondam sedes, et loca nota modis;
 Da veniam tristi vexatis undique bello,
 Jactatisque utro turbine militiae.
 Aspice, tempestas quanta ignivomo e Phlegetonte
 Egressa Ausonios perdominetur agros.
 Germanorum acies, et prodiga pectora vitae
 Hinc dolor, et regni dira cupido movet.
 Illinc armipotens exercet Gallia bellum,
 Et secum ad caedes evocat Allobroges;
 In partemque venit latis Hispania terris
 Caerula ad Hetruscas velificata plagas.
 Picea ad Aegeum moles medium properascet.
 Quam melius repetens Imperium Solymael
 Et melius junctis nostri ensibus extorsissent
 Odrysis reges barbara sceptrata duci?
 Non omnis summis trepidaret ab alpibus usque
 Ad superum infernumque Ausoniis ora mare.
 Quae nunc se miseram frustra aequore, et Apenino
 Septam, et Naturae claustra revulsa dolet.
 Virgo decus coeli, terrarum perfugiumque,
 In cujus nostra est ventre recepta salus:
 Tu potes undantes bellorum expellere nimbos,
 Tristaeque armorum fulgura discutere;
 Et jam sit nobis optatae nuncia pacis
 Fortunata dies, quae tibi prima fuit:

Ut quondam immensam Jovis iram, diluviemque
Exactus Arcus versicolor docuit.

Tempestate illa Rex altisonantis Olympi

Humanum largo perdidit imbre genus.

Namque Deum culpas, mores exosum et iniquos

Poenituit sontem composuisse hominem.

Quapropter pluviis Auster deductus ab antris

Flamine mundum omnem conecutit horribili.

Quo de concussu sequitur gravis imber et uber,

Cunctaque terrarum fluctibus arva natant:

Et mare per colles effracto limite, et auget

Flumina aquis, et aquas, quae caccidere, suis,

Unaue cunctarum portans exordia rerum

Moles culminibus navigat aeriis.

Tunc Pater omnipotens ingentia damna misertus

Indoluit tam crudeli hominum exitio.

Jussit abire imbres, posuitque in nubibus arcum,

Quae vetet ultrices Deucalionis aquas.

At tu Diva potens Martis sedare procellas,

Et rebus pacem reddere compositis.

Euxino in medio, vel fluctiseno Hellesponto,

Merge cruentati semina cuncta odii.

Efficere, ut ad stygios redeat discordia lucos

Dissimiles scisso tegmine amicta humeros;

Et pax alma ferens ramos felicitis olivae

Praecipue nostra regnet in Italia.

Tunc facilis, tunc laeta cohors certabimus usque

Dicere nos laudes, candida Virgo, tuas,

Et Musis operam dabimus, sanctoque Heliconi

„ Natalisque tui sic peragemus iter.

ALEXANDRI FAGNOLII FAVENTINI.

ELEGIA

DE JACOBO ANTONIO BASSANO

QUUM IS

SACRAS CONCIONES:

MAJORIS JEJUNII TEMPORE

FOROCORNELII HABERET

ANNO 1751.

Qui primum coeco percussus corda furore
 Quotquot sese Christo addiderant comites
 Totâ pene Asiâ ferus insectatur, et urget
 Si possit leges, frangere forte novas;
 Post celeri exturbatus equo, tum denique coeli
 Admonitu Christi factus et ipse comes,
 Eloquioque potens, et pectora numine plenus
 Sacra eadem innumeros edocuit populos,
 Illum ipsum, Bassane, tuo nunc ore locutum
 Crediderim, illum ipsum vimque, animumque
 suum
 Inseruisse tibi; tanto in nos impete fertur
 Quae manat labiis copia mira tuis!
 Namque ea perrumpens praecordia ad intima fervet
 Sublimis per sensa omnia, et omnem animum;
 Imperiumque in mentem ipsam sibi vindicat omne
 Quamvis indocilem jura aliena pati:
 Qualis muscoso erumpens de pumice rivus
 Rupe sub incurvâ frondifero in nemore,

Mollem inter serpens sinuoso tramite clivum
 Per nitida arguto saxa fugit strepitu :
 Illum alacri pastor per ludum non modo saltu
 Audeat, ast ipsum transiliisse pecus ;
 Si forte in valles dum se demittit opacas ,
 Eversis olli turbidus aggeribus
 Undique collectos torrens immisceat imbres ,
 Protinus ille novis plurimum adauctus aquis ,
 Parvi indignatus cohiberi carcere sulci ,
 Ripaeque insultans liberiore vado
 Terribilis per prata alte spatatur et agros ;
 Quaque ruit, rapit una et pecora , et nemora
 Non secus illa tuae divinitus addita linguae
 Vis intus adeo versat agitque homines ,
 Ut quae conari una unquam natura nequisset ,
 Praecipûo Superum munere perficiat.
 Nam qui mirificâ succensi corda Suadâ
 Non magnum quodvis adgrediantur opus ?
 Jam libeat mediis caput objectare periclis ,
 Duraque pro sanctâ Relligione pati ,
 Messagetasque, Getasque, impacatosque Gelonos ,
 Damnatumque tuâ, parve Ithy, caede solum ,
 Et numquam domitos Romano milite Parthos ,
 Quasque cito Phasis perluit amne plagas ,
 Arentem et Lybien penetrare, et inospita longe
 Ire vel extremos per loca ad Aethiopas ,
 Et quibus infanda (horrendum !) convivia praebeant
 Dissecta humanis membra cadaveribus ;
 Perpetuoque perusta aestu pervadere regna ,
 Perpetuoque etiam regua perusta gelu.
 Nec timor infames vitare Busiridis ignes ,
 Et cava flammantis quemlibet aera Bovis
 Suadeat, aut Poenos etiam exhorrere leones,
 Horribilesque angues, Armeniasque tigres.
 O sandi praeclaram artem, vocesque potentes :
 Quis nullum egregium difficile est facinus !
 Quis mihi nunc Romam facundo Consulis ore
 Crudeli ereptam jactitet excidio ,
 Accensos et propterea in fera praelia cives,
 Perdita cumque suo castra inimica duce ?

Spectata aut cujus tria jam per saecula virtus
 Inter sollertes enicuit Danaos,
 Quos tot jam aerumnis, durisque laboribus actos
 Ad longa illa omnes impulit obsidia,
 Queis tot Dardaniae, atque Argivae robore pubis
 Per bis quinque annos occubuere Duces;
 Donec in Iliacos perrupit Dorica muros
 Gens instructa vaſtri fraudibus Aeolidis:
 Hos equidem tibi forte pares quis credat habendos
 Quo natura potest quem evehere ingenio?
 At tibi praeterea coelesti orientia fonte
 Flumina inexhaustos sufficiunt latices
 Divini eloquii, queis mira est indita virtus;
 Qualem humana nequit fingere conditio.
 Impavidum haec nobis, et inexpugnabile pectus
 Praestat, et ad quaevis saeva paratum animum.
 Quid referam quantâ recresces dulcedine mentem,
 Quantâ cor sensim laetitiâ afficias?
 Molliâ dum suavi exornas tua dicta lepore,
 Et facilis blandis vocibus exilaras.
 Ut dum vere novo graditur per amoena viator
 Bajarum aut culti littora Pausylipi,
 Illuc roseam auroram coelo fulgere sereno,
 Et tranquilla alacres per maria ire rates,
 Illinc auratis lucos pubescere pomis,
 Divitias olim, gaudiaque Hesperidum,
 Et teneris spectans florescere messibus agros,
 Et juga vinetis laeta procul patulis,
 Per sudum placidi trepida intremat aura Favoni
 Molliter et crines praetereuntis agit,
 Adflatuque levi crispatae molliter undae,
 Et curvo illisae littore dulce sonant,
 Lactaque jucundo responsant arva susurro,
 Et tremulis circum sylvâ strepens foliis:
 Certe ego, te veneranda Deum praecepta docente,
 (Namque ea sermonis gratia, visque tui est)
 Infidos Galatas, geminoque obnoxia ponto
 Regna Ephyres, veterum regnaque nota Phrygum,
 Hieroumque magis memorandam caede piorum
 Aematiam, binâ quam nece Romulidâ;

Isacidasque olim belloque, opibusque potentes,
 Nunc unâ insignes perfidiâ populos,
 Posse putem rursus colla indignantia legum
 Nostrarum tenui supposuisse jugo.
 Macte tamen, Bassane: Italis victoria in oris
 Magna, aequae et celebris gloria parta tibi.
 Quisque etenim integros mores, et criminis expers
 Ingenium jam nunc, et proba consilia,
 Et siquid deinceps aeterno laudis honore
 Dignum perficiet, debet id omne tibi.

HIERONYMI FERRI.

ELEGIA.

ANGELO NUNCIANTI MARIA ASSENTIT.

Expectata diu, multosque optata per annos
 Insonuit placidis vox tremefacta modis.
 Qua nova perciperent vexatae gaudia terrae
 Altera jungentes foedera coelitibus.
 Numinis ut sentit pudibundae verba puellae
 Attonita sanctos et bibit aure sonos :
 Salve, ait, o Virgo simul, et castissima Mater ;
 Ceu Dominam liceat te coluisse mihi :
 Quandoquidem pura Proles se condidit alvo,
 Jamque parat terris, quae nova dona ferat :
 Salve : Te aligerum circumstent agmina fratrum,
 Dum mundi repeto moenia, tanta ferens,
 Omnia quae fausto intonuerunt percita casu,
 Assensu et reperant damna vetusta tuo.
 Dixit, et afflatu dum sensit Numina Virgo
 Tam magni ille Patris constitit ante pedes.
 Applaudunt Superi : primi post facta Parentis
 Non fuit in coelo laetior ulla dies.

INFERNI RABIES, ET DESPERATIO,
COGNITO CONSENTIENTIS VIRGUNCULÆ RESPONSO.

ELEGIA.

Invidus at patrio quondam qui pulsus olympo
Tartareas cohibet sub ditione domos;
Et quamquam primo victus certamine, honores
Non valet indomito perdere corde suos.
Ast celeres tacita motus sub mente volutans,
Insidiasque novas irrequietus agens,
Callidus imperii quaerit protendere fines
Qua sol mergit equos gurgite quaque trahit;
Audit ut invisas percurrere gaudia terras
Mira et concussum signa dedisse polum!
Pallet et incertis questus rumoribus auens
Sedibus infernis jam nova bella timet.
Hinc furvas circum sociorum mittere turmas,
Quae loca cuncta petant, quae sibi cuncta ferant.
Et merito: quoniam seris volventibus annis,
Non bona captivum fata manere videt;
Sole renidenti circum mortalibus aegris
Cum ferat intactum foemina amicta diem.
Scilicet has lites haec esse minantia bella,
Quae misero vindex intulit Omnipotens,
Viperca facilem forma cum luserat Evam,
Incautum secum traxit et illa virum.
Talia dum memorat mordaces pectora regis
Pervigilis curae nocte dieque premunt.
Et fremat, et totum furibundis misceat ausis;
Fulsit ab aethereis hora beata plagis,
Quae crebris finem tenebris nitidissima ponat,
Et niveo referat tempora prima pede.

FRANCISCI CONTOLI.

ELEGIA

IN QUA RACHELEM JACOBI UXOREM DE SUA STERILITATE
QUERENTEM INDUCIT.

Mene igitur thalamos nuptam petiisse jugales
Isacide, castos mene subisse toros?
Nec posse ingenui jucundum pignus amoris
Ferre meae dulcem spemque decusque domus?
Quod referat magni studia et benefacta Parentis,
Molliter et nostros lusitet ante pedes.
Quid mihi nunc primi fervor juvat integer aevi,
Quid juvat in roseo, qui nitet ore decor?
Haebreas inter Rachel pulcherrima nuptas
Jam monstror digito conjugiiue pudet.
Aemula progenies jactat ridetque pudorem
Nostrum, naturae est quae minus aucta bonis.
Non tibi fatorum cura, dulcissime conjux
Sperasti, et facilem demeruisse Deum.
Taedia quid prodest tam longa tulisse viarum,
Quid prodest patrios deseruisse lares?
Bis septem soceri pavisti armenta per annos,
Ut mea servitii praemia dextra foret:
Spes sobolis docuit duros superare labores,
Spes docuit lentos fallere posse dies.
En jaceo, sterilesque diu perpessa hymenaeos
Infelix, vitae jam piget usque meae.
Heu quid agam? Tantum quam finire dolorem
Arte queam, non mens consiliumque manet,
Vincula nunc frangam thalamos exosa priores,
Alterius quaeram nunc male sana facem?

Horrendum reputans turpes discedite curae ,
 Parcite confectum discruciare animum.
Incorrupta tibi servabo foedera lecti ,
 Et tecum , conjux , sit mihi dulce mori.
At praestat coelum votis implesse benignum
 Thuraque cum multa saepe dedisse prece.
Ipsa etiam sterili persolvens vota cubili
 Dicitur ingratas Sara tulisse moras.
Laeserat huic flavos rugosa senecta capillos
 Cum sensit gravidæ pignora certa sinus :
Taliam jactabat : niveo Deus alite fulsit :
 Nec dederat rapidis vota ferenda Notis.

ANTONII LACHII.

ELEGIA.

EX PSALMO 41.

Cervus uti vitreas sitiens, Deus, appetit undas,
 In te unum cupida sic ego mente feror.
 Te fortem, vivumque ardet mens fervida, quando
 Sistere me vultum fas erit ante tuum?
 Quo Deus ille tuus? Cum saepius increpat hostis,
 Nutrior heu! lacrymis nocte dieque meis.
 At me laetitiae flentem vis recreat ingens,
 Cum promissa meo lux subit illa animo,
 Qua festos inter plausus, vocesque sonoras,
 Quas tollit donis gens epulata sacris,
 Rursus ego miranda redux tentoria visam,
 Praesentisque adeam tecta vel ipsa Dei.
 Quid te, quid nimium contristas, spiritus, ultra?
 Quid mea sollicito corda timore quatis?
 Fide Deo, referam sospes tum laudibus illum;
 Quippe mihi una salus, unus et ille Deus.
 Hinc, ego seu placidas errem Jordanis ad undas;
 Sive humilem profugus pervager Hermonium,
 Mens mea dum curis dolet acribus aegra, juvabit,
 Numinis, alme Pater, me meminisse tui
 Voce tua exciti, heu! se tollunt undique fluctus,
 Atque undam ex imis evocat unda locis.
 Meque super, celso quos mittis ab aethere, nimbi,
 Et simul horrisonae grandinis ira ruunt.
 At me jam tandem placido Deus ore videbit,
 Et mihi lux nitido surget amica polo.

Interea Dominum, dum me nox opprimet atra,
 Haud cessem meritis dicere carminibus.
Hos supplex questus, et verba precantia fundam:
 Tu columnen vitae, praesidiumque meae.
Cur unquam caepere mei te obliviam? cur nam
 Tristis ego, circum dum premor hoste, vagor?
Ille, jacent dum fracta malis ingentibus ossa,
 Effundit mixtis impia dicta probris.
Quandoquidem attonitum me sic compellat, et usque
 Usque rogans, iterat; quo Deus ille tuus?
Quid te, quid nimium contristas, spiritus, ultra?
 Quid mea sollicito corda timore quatis?
Fide Deo, referam sospes tum laudibus illum,
 Ille mihi una salus, unus et ille Deus.

JOSEPHI PETRUCCI.

IN VIRGINEM PARITURAM.

ELEGIA I.

Non erat eis locus in diversorio (Luc. 11.)

Nam quae, mortales, dementia, quis furor unquam
 Innocuum vos hunc impulit in Puerum,
 Ut dias jam oras in luminis egressuro
 Cognata angustus desit in urbe locus,
 Atque gravis foetu, et tecti communis egena
 Pellatur quovis Mater ab hospitio?
 At qualis Mater! non moribus ulla pudicis,
 Non illi claro se genere aequiparet,
 Nulla decus formae par jactet: saxeae posset
 Pectora, quin saxo flectere dura magis.
 Nec vos illa tamen flectit: tamen omnibus illam
 Orantem atque inopem pellitis e domibus:
 Pellitis, haud secus ac si despectissima matrum
 Adstaret vestris improba liminibus,
 Et vitam tolerare colo, tenuique Minerva
 Abnueret, turpi marcida desidie.
 Ah crudele genus! magnae tibi non satis urbes,
 Non tecta in magnis urbibus ampla satis:
 Multiplices tibi rura parant, ubi pomifer urbis
 Ingerit Autumnus taedia, delicias;

Et platani steriles, et spissis laurea ramis
 Debita praeripiunt jugera vomeribus,
 Aestibus ut mediis projectum in gramine molli
 Te nemus umbroso protegat hospitio.
 Quin etiam si te capiunt fastidia terrae,
 Ipsa fluentisoni te maris unda manet,
 Molibus et refluunt tibi jactis aequora, pisces
 Dum sua contractis damna quaeruntur aquis.
 Tanta igiturne tibi vitae, ac tot commoda? Matri
 Nil super huic Matri est, nil super huic Puerō?
 Illa igitur paritura petet pro divite tecto.....
 (Quamquam non ditem quaeritat illa domum,
 Parva satis; tuguri tegmen sat pauperis illi,
 Ne se, ne Puerum, tam fera laedat hiems.)
 Hoc igitur miseranda Parens pro paupere tecto
 Antra petet Boreae pervia flaminibus?
 Antra ipsis deserta petet pastoribus? ipsis
 Antra receptandis vix satis apta feris?
 Ille autem ut vitae Puer egredietur in auras,
 Pro saturis tyrio murice velleribus,
 Pro cunis auro fulgentibus atque elephantō,
 (Ah! tantas illi quid peto stultus opes?)
 Vilibus at pro fascioliis pannisque resartis,
 Nuda tegat rigidis corpora straminibus?
 At rudibus pro culcitulis, sub fornice rupis,
 Molle latus duro collocet in lapide?
 Fallor? an haud frustra timuit praesaga mali mens?
 Nascitur, ah! ubinam nascitur ille Puer?
 Ah! quem, mortales, quem vos in lustra ferarum
 Pellitis, exesis aspera pumioibus,
 Quem siccis oculis nudum algentemque videtis,
 Num quis, nescitis, quantus et ille Puer?
 Humanos Puer ille licet collectus in artus
 Infantis prae se nil nisi signa ferat,
 Effusi in lacrymas, et luctisonos vagitus,
 Ille licet sola qua ratione potest,
 Levia protendens exoret brachia Matrem,
 Algida ut admoto membra sinu foveat;
 Ille tamen vagit quo nunc Puer ore, ministros
 Posset in obsequium mille vocare suum,

Qui Domini nutum observent, et jussa facessant;
 Seu Boream Aeoliae pellere in antra velit,
 Et tepidos Zephyri se circum arcessere flatus,
 Et rigidam in placidum vertere ver hiemem;
 Straminibus seu sublatis ulvaeque palustri
 Molliculo libeat membra locare toro,
 Et teneras violas, et languidulos hyacinthos
 Sternere et halanti mixta ligustra rosae.
 Quas nunc ille manus torpentes frigore tendit,
 Admoto miserans et fovet ore Parens,
 Coelum illae terramque olim, camposque liquentes
 Iussu condiderunt aequoris omniifero.
 Illae etiam, justas si quando arcessimus iras,
 Amentesque nefas per vetitum ruimus,
 Suetae inter nimbos fulmen torquere coruscos
 Horrificis miscent omnia funeribus.
 Ora lacus, quam late omnis patet, Asphaltitae
 Testis, et incestae moenia Pentapolis
 Diruta, sulphureis et adhuc fumantia taedis,
 Ultrici jecit quas Puer ille manu.
 Nec vero, mortale genus, vos tanta latere
 Prodigia, Amoida fata canente, queunt.
 Ecce, canit, thalamique expers taedaeque jugalis
 Virgo sinu afflatus excipit aethrios,
 Virgo parit: gnato nomen non scilicet unum:
 Ille dator pacis consiliique potens,
 Ille una Fortisque, Admirandusque, futuri
 Ille Parens aevi dicitur, ille Deus.
 Ille premit solium Iessidae Regis, aviti
 Ille decus late proferet imperii.
 Non illi pectus lorica impervia telis,
 Non teget e rigido balteus aere latus.
 Una fides lateri comes, indignataque terris
 Quae dudum incestis cesserat Integritas:
 Integritas revocata polo, quam pone sequetur
 Victa triumphalis Pax super arma sedens.
 Nec solae placida gentes in pace quiescent;
 Pax dabit indomitis mitia corda feris.
 Mixta lupis errabit ovis, passimque leones
 Cum vitulis domito gramina dente terent.

Circum angues pueri rimosa cubilia ludent,
 Intus agent teneras et sine fraude manus.
 Haec canit Amoides, additque e littore rubro
 Accitos partus visere virgineos
 Delectos Arabum Proceres, Regesque Sabaeos,
 Aurique et thuris non sine muneribus
 Demissa coelo venerantes pignora, Matris
 Et Gnati dios procidere ante pedes.
 Quo tamen audaci properas, Elegeia, versu?
 Tantane te nervis hiscere posse tuis?
 Desine, non fallax quae Numen vatibus aflat,
 Deterere exiguis grandia fata modis

ELEGIA II.

IN VIRGINEM PUERPERAM.

Qui mihi nocturni callis per opaca fuisti
 Et comes, et custos, o Amor, attigimus
 En antrum, felix antrum: heic conside parumpet,
 Et Puerum intactae Virginis e gremio
 Qui laturus opem mortalibus aerumnosis
 Prodiit, et sedes deseruit superum
 Humano non dedignans velamine dios
 Obnubi vultus, aetheriumque jubar,
 Mirare heic mecum et submisso poplite adora.
 Ah! tamen humanis se artibus ille licet
 Induerit, faciemque Dei celarit, ut aegris
 Praeberet se hominum conspiciendum oculis,
 Ah! tamen, ah! male firma acies subsistere frustra
 Conatur, radios nec pote ferre, jacet
 Assidue e sanctis Infans quos dius ocellis.
 Hanc igitur, sobolis nata parensque suae
 Natura meruit dici quae sola stupente,
 Et Virgo et Genitrix, digna Deo Genitrix,

Sola modis junxit contraria nomina miris,
 In natum ipsa suum lumina quandoquidem
 Dejecit, obtutuque immobilis haeret in uno,
 Hanc, age, miremur, Hanc, veneremur, Amor.
 Fors meminit, toto ut trepidarit pectore quondam,
 Virgineo niveas atque rubore genas
 Sparsersit, aetheria quum nuncius ales ab arce
 Adstitit, atque unam se audiit Isacides
 Inter felicem lectamque Deo Heroinas,
 Aucta foret diae germine quae sobolis;
 Solverit utque omnes trepido dein corde timores,
 Afflatusque sinu exceperit aetherios.
 Ac veluti pennis crepitantibus Amphitriten
 Cum leviter Zephyri et leniter aura ciet,
 Assurgit tremulo de marmore fluctus, te oras
 Ut tetigit, placidis sternitur aequoribus,
 Quem subsidentem confestim mille sequuntur
 Dein fluctus, subeunt dein alii atque alii:
 Sic varias Virgo species sub pectore rerum
 Versat, sic variis gaudet imaginibus.
 Iam subit aridulum, et madidum nil vellus ab imbre,
 Proxima dum late rore madescit humus;
 Iamque ille e mediis sese rubus ignibus offert,
 Iam sese e mediis fluctibus illa ratis;
 Atque rubum repetit non ulla incendia passum,
 Atque jugis navem sospitem in Armeniis.
 Quam gestit bona Virgo! mera oh! quot gaudia tentant
 Et tacitum huc illuc abripiunt animum,
 Dum sese in navi, dum sese in vellere, sese
 Inque rubo agnoscit; dum rata signa videt!
 Tantaque non capiat pectus quum gaudia, Natum
 Iam versare ulnis, jamque fovere sinu,
 Uberis ambrosio nivei jam pascere succo,
 Oscula jam admotis frontibus eripere.
 Longius ah! quid, Amor, tam cara in sede morari,
 Quid prohibes? omne heic transigere abnuerim
 Non aevum. Quidni mortales jam exuor artus,
 Ut levis heic sistam spiritus? aut similes
 Mi datur aut humeris pennas aptare tuarum,
 Ut redeam, et Matrem heic assidue, heic Puerum
 Contempler, neque divellar donec Puer isthaec
 Tantus, tanta isthaec incolat antra Parens?

ELEGIA III.

EX POETICO QUODAM MENTIS AFFLATU ANIMORUM
CÆLESTIS ORIGO RERUMQUE HUMANARUM TENUITAS
INFERTUR.

Humani naturam animi, ceu crura manusque,
Qui partem primus prodidit esse hominis,
Scilicet ut genio male perditus indulgeret,
Laxans indomitis frena cupidinibus,
Nec Stygias pavitaret aquas, noctemque profundam,
Quo summi sontes Numinis ira adigit;
Ille quidem rationis egens, et degeret inter
Qui brutas vitam dignus erat pecudes,
Quem nunquam caeli Sophie de parte serena
Reperitem placido lumine vidit humi.
Ergo, age, quae nostris insit caelestis origo
Mentibus audaci carmine, Musa, refer;
Quandoquidem veluti resides si corporis artus
Liquisset, tractus carpere mens animi
Aethérios gaudet, dedignaturque jacentes
Iam terras; atqui si foret illa simul
Corpore cum fragili compacta e principe limo,
Haudquaquam pennis fulgida praepetibus
Astra super veheretur, et indignantia solvi
Frangere nequidquam vincula discuperet.
Nec me Thespiades, proles Iovis illa, sorores,
Quae vanis hominum pectora imaginibus
Saepius, et falso vates ardore fatigant,
Longinqua haec caeli per loca detulerunt.
Quare ego, quae quondam commenta est Graecia,
monstra
Haudquaquam miror, non genus Iapeti
Quos superis ignes e sedibus asportavit
Fraude mala, incautis intulit et populis;

Sublimemve plagam, caelum Titania pubes
 Montibus aggressa est qua rapere impositis,
 Aetheriisque Iovem detrudere sedibus; aut qua
 Altus equis Phaëton excidit igniferis,
 Aeternos (demens !) currus agitare, Patrisque,
 Ausus inexperta flectere lora manu.
 Huc Sophiae me vexit amor, coelique beatas
 Heic solum, fugiunt quae rude vulgus, opes
 Adspectare juvat; superas concentus et aedes
 Qui circum resonet, sidera dum rapidas
 Praecipiti in numerum late choreas decursu
 Innectunt, bibulis auribus excipere.
 Ac veluti exstimulans flagris auriga jugales,
 Quum campum effusi carcere corripunt,
 Et lora huc illuc laxans fluitantia, cursu
 Spectantum fallit lumina praecipiti:
 Haud aliter longe coelo lateque vagatur
 Mens desideriiis acta per astra suis.
 Illa pedes quocumque infert, arcanaque rerum
 Omnigenarum, et motum inspicit et numerum;
 Explere et studium visendi nescia, tractus
 Usque alios coeli transmigrat atque alios.
 Iam te quis memoret terram? certamina caelo
 Quae quondam rebar stagna profunda maris,
 Qua sese occuluere? meis quis ditia regna,
 Fluminaque et montes abstulit aërios
 Luminibus? puncti vix instar cernere terras
 Exigui, et gentes hinc datur omnigenas.
 Ergo tam tenuis (peream quid tenuius unquam
 Si sese nostros obtulit ante oculos)
 Tam tenuis mortale genus (quis crederet?) orbis
 Vexat amor, curisque innumeris acuit,
 Ut quo vix tandem exigua potiatur arena
 (Infandum !) bella indicere non pudeat,
 Et petere excidiis urbes, et sanguine rivos
 Undantes siccis cernere luminibus!

ELEGIA IV.

CHRISTUS INFANS

VITAE AB HOMINIBUS SANCTE INSTITUENDAE MAGISTER.

Quam sacro toties afflati numine vates
 Polliciti humanis adfore rebus opem;
 Scilicet ut terras quae late involverat omnes
 Nox olim e tenebris excita taenariis,
 Et totam ob primi scelus exitiale Parentis
 Horrifico obduxit tegmine progeniem,
 Luce nova e domibus lapsa stellantis Olympi
 In stygias fugeret, venerat unde, domos;
 Hanc tandem lactemur opem mortalibus aegris
 Allatam, et veterum jam rata verba patrum.
 Omnia jam lucent, jam non errore viarum
 Decepti, recto e tramite digredimur,
 Mendacesque duces, et inania jussa sequuti
 Ire per ambages cogimur usque novas.
 Ite procul, caelo quos Graecia vana magistros
 Morum et doctrinae sustulit omnigenae;
 Desinite ambiguas in vulgum spargere voces,
 Et vacuis commenta ingerere auriculis.
 Aurea promissi venit jam temporis aetas,
 Et novus e superum sede Magister adest.
 Non ille humanas excultus nempe per artes,
 Quamlibet eximio fretus et ingenio,
 Ignarosque docere homines, et tollere lumen
 Tam clarum e tantis aggreditur tenebris;
 Ipsa sed aetherii Regis sapientia, summi
 In terras soboles labitur ipsa Dei;
 Atque hominum lux tanta oculos ne laederet aegros,
 Quum sancto ignaros fingeret cloquio,

Humano non erubuit velamine dios
 Obnubi vultus aetheriumque jubar.
 Iam quis me tanti penetralia ad alta Magistri
 Discipulum sistat morigerum et docilem,
 Ut mirum divino quod dimanat ab ore
 Eloquium bibulis auribus excipiam,
 Atque alto penitus condam sub pectore? ceu quum
 Exustos Procyon, aut Leo findit agros,
 Nubila si puro cogens notus aëre, terram
 Irrorat placidis imbribus aridulam,
 Illa bibit tenuem rorem, sitibundaque hiantes
 Per venas imum sorbet ad usque sinum,
 Atque iterum sorbet, flores dum succus in aegros,
 Languentesque herbas pinguior inde venit;
 Sic mihi contingat; nulla ut praecepta docentis
 Nullaque vox animo defluat immemori.
 Quo tamen abripior? visu num ludor inani?
 An rerum species vera mihi objicitur?
 Vera quidem, sed mira: tener nam cernitur Infans
 Heic tantum, et saturo caula parata gregi.
 Illa Parens, Puerum teneris quae versat in ulnis,
 Et flentem niveis admovet uberibus,
 Illa quidem magnorum etsi decora alta parentum
 Et gestu et vultu praeferat ingenuo,
 Ast humili in tunica pudibunda atque omnium egena
 Rerum, oculos carum dejicit in Puerum;
 Et queritur brumali algens quod frigore corpus
 Cogitur in rudibus volvere fasciis,
 Duraque carpando sordens cunabula somno
 Agresti stabulum praebeat e stipula.
 Quid Puer? aut silet, aut vagit, caraeque Parentis
 Levia protendens brachia quaerit opem.
 Hoc tamen in Puero (ne quis vagitibus aptum
 Nescius, aut solis fletibus esse putet)
 Hoc tamen in Puero, Pueroque silente Magistrum
 Ante omnes fas est noscere grandiloquum:
 Vagitus etenim, et vagitibus intermixtae
 Lacrimulae, capta et membra tenella gelu,
 Fasciolaque rudes, paleaeque loquuntur, ut omnis
 Divino caula haec personet eloquio.

Conditor hic namque, et rerum arbiter omnigenarum,
 Assurgit rutilans cui super astra domus,
 Largifluos olim qui de caelestibus imbres
 Thesauris, gelidas elicuitque nives,
 Qui madidas ventorum humeris innexuit alas,
 Nubesque aut agere aut solvere posse dedit,
 Dum sibi mortalis venienti lucis in oras,
 Posthabitis regum sedibus atque opibus,
 Lustra legit rigidae nusquam non pervia brumae,
 In duro acclinaus stramine molle latus,
 Deciduaque alget nive, nocturnisque madescit
 Imbribus, aut saevo flante aquilone riget,
 Iam nunc exemplo verbis potiore Sophorum,
 Quorum urbes implet fama Pelasgiades,
 Iam nunc caelestis doctrinae oracula promit,
 Quae cupienda homines, quae fugienda docens;
 Felicemque vocat titulos qui spernit avitos,
 Et patrias forti pectore divitias,
 Et quaecumque hominum generi malesuada voluptas
 Illita Circae pocula melle parat;
 Felicem, qui vitae ultro genus aerumnosum
 Instituit, largo et deterit imbre genas.
 Tempus erit quum Judaeae haec praecepta per urbes
 Divini promens pectoris ex adyto,
 Astantes longe populos, lateque docebit,
 Firmabit signis et nova verba novis.
 Qui tanto tamen exemplo inconcussus, honores
 Anxius aut fluxas quaerit avarus opes,
 Otia qui sequitur curarum nescia, blandae
 Nec potis est vitae avellier illecebris,
 Ostentisque novis, diaeque impervia vocis
 Huic ego fulminibus pectora inesse putem.

CAROLI ROTH.


AD NYMPHAS PALAESTINAE UT MARIAM ABEUNTEM IN
MONTANA OFFICII CAUSA COMITENTUR.

ELEGIA

Nymphae Tháborides Nymphae ; quae rura beata
Udaque nativis antra tenetis aquis :
Ite viae comites Mariae , quae Numine foeta
Visere Zachariae tecta , laresque parat.
Ite ; sed ante meis aures advertite dictis ,
Istaque sub memori condite jussa sinu.
Formosos quacumque pedes Divina Puella
Intulerit , facilis sit , pateatque via.
Transversi frutices absint , ramique caduci
Absit et hirsutis sentibus herba nocens.
Nec minus amotis purgetur scrupula saxi
Semita , inoffensum ducat ut illa pedem :
Tum laetum vestite solum florentibus herbis
Pallenti viola , purpureaque rosa.
Felices nimium , fortunatique colores
Quos premet imposito casta Puella pede.
Jamque aliqua e vobis comites praevertat et omnem
Spargat odorato praevia rore viam
Expressoque rosis succo contingat arenam ,
Ut gravis asperso pulvis ab imbre cadat.
Nec vos poeniteat flabello arcessere ventos ,
Illius et verno nectere flore caput.
Et modo praetensa soleni defendere lauro ,
Et modo marmoreae tergere frontis aquam.

Ast, ubi sol medios coeli succederit aestus,
 Aridaque impatiens terra caloris erit,
 Incoeptum rumpatur iter, fessamque Puellam
 Quercus frondoso protegat hospitio.
 Hic brevis herboso constructa e cespite mensa
 Ponatur, celeri deproperata manu,
 Quam super et flores halent, nomenque Puellae
 Pingat odoratis litera facta rosis.
 Dein alacres omnes, incinctae vestibus omnes
 Adsint, et placida mente quod instat, agant
 Illa ferat tonsis mantilia candida villis:
 Illic manibus puro e fonte ministret aquam.
 Pars cererem expediat calathis, pars sagina ponat
 Pocula, pars epulas officiosa gerat:
 Lactea Sicanio respersa coagula rore,
 Flavaque sub puro condita mella favo.
 Et dulces cerasos, et humi nascentia fraga,
 Et matutinâ mora legenda manu.
 Sed bonus in primis commendet seruela vultus,
 Vultus sinceræ pignora mentis habens.
 Postquam epulis fuerit perfuncta, quiescat in umbra,
 Dum fiat serae mollior hora viae.
 Singula quid moneam? Nymphae consurgite: celsos
 En migrat in montes Parthenis; ite simul.
 Finieram lactae surgunt, memoresque Puellam
 Certant officiis demeruisse suis.
 Illa ubi dilectos iniit peregrina penates,
 Et Matrem laetis jussit avcre sonis;
 Infans materna gestit lustratus in alvo,
 Oraque venturi conscia solvit Anus:
 Grandaevusque Pater luctatur gaudia voce
 Promere, sed vocem lingua moratur iners:
 Ipsa domus, credo, fremitu plausura secundo,
 Prodigiiis si non obstupisset, erat.

Finis primi voluminis.



INDEX.

<i>Philippo Monacellio Pisaurensium Pontifici</i>	
<i>I. E. Montanarius</i>	pag. 1
<i>Bucolicorum liber</i>	" 13
<i>Petri Bembi Benacus</i>	" 15
<i>Hieronymi Fracastorii Idylion</i>	" 21
<i>Nic. Part. Giannettasii Parthenis. Ecloga I.</i>	" 25
<i>Ejusdem. Genethliaca. Ecloga II.</i>	" 28
<i>Bartholomaei Boscovichii. Reges. Ecloga I.</i>	" 31
<i>Ejusdem. Xaverius. Ecloga II.</i>	" 33
<i>Ejusdem. Parthenis. Ecloga III.</i>	" 36
<i>Caroli Noceti. De laudibus D. Petri Apos. Principis. Ecloga.</i>	" 40
<i>Caroli Rotii. De Sancto Aloysio Gonzaga. Idylion</i>	" 46
<i>Francisci Contoli. Lamentatio de excidio Solimeo.</i>	" 49
<i>Angeli Tinelli. Magdalenae ploratus. Ecloga.</i>	" 52
<i>Vincentii Fugae. Mensis Majus M. V. dictus. Ecloga I.</i>	" 55
<i>Ejusdem. In festo S. Aloysii die. Ecloga II.</i>	" 58
<i>Ejusdem. Parthenis. Ecloga III.</i>	" 60
<i>Elegiacorum liber I.</i>	" 65
<i>Jo. Joviani Pontani. Ad Christum Redemptorem.</i>	" 67
<i>Ejusdem. De Christo.</i>	" 68
<i>Titi Strozae. J. C. Genethliacon.</i>	" 69
<i>Hieronimi Vidae. J. C. Opt. Max.</i>	" 74
<i>M. Publii Fontanae. De Nativitate J. C.</i>	" 76
<i>Francisci Maccabelli. De Puero Jesu.</i>	" 82
<i>Vincentii Montii. De Christo nato.</i>	" 84

<i>Benedicti Accolti D. V. M.</i>	" 86
<i>Ludovici Sergardii. De Conceptione Beatae</i>	
<i>Mariae Virginis.</i>	" 87
<i>Caroli Rotii. Divino Infanti.</i>	" 89
<i>Ejusdem. Ad B. V. in die Purifi-</i>	
<i>cationis.</i>	" 91
<i>Ejusdem. Ad S. Simeonem.</i>	" 92
<i>Raimundi Cunichii S. I. Ad Aquilonem de</i>	
<i>Puero Jesu.</i>	" 95
<i>Ejusdem. De acerbissimo Christi ac</i>	
<i>V. M. Cruciatu.</i>	" 98
<i>Alexandri Fagnolii. Ad Virg. Deip.</i>	" 103
 <i>Elegiacorum liber II. Bernardi Zamagnae</i>	
<i>Elegiac X. M. V. Matri Patronac.</i>	" 107
<i>Ad Magnam Matrem.</i>	" 109
<i>Ad Virginem sine labe conceptam.</i>	
<i>Elegia I.</i>	" 110
<i>Ad Virginem nascentem. Elegia II.</i>	" 113
<i>Ad Virginem Deo se in Templo di-</i>	
<i>cantem. Elegia III.</i>	" 116
<i>Ad Virginem nubentem. Elegia IV.</i>	" 119
<i>Ad Virginem Caelesti nuncio accepto.</i>	
<i>Elegia V.</i>	" 122
<i>Ad Virginem in Montana profici-</i>	
<i>scientem. Elegia VI.</i>	" 125
<i>Ad Virginem divino partu jam per-</i>	
<i>fecto. Elegia VII.</i>	" 128
<i>Ad Virginem se in templo lustra-</i>	
<i>turam. Elegia VIII.</i>	" 131
<i>Ad Virginem stantem juxta Crucem.</i>	
<i>Elegia IX.</i>	" 134
<i>Ad Virginem Terris discessuram.</i>	
<i>Elegia X.</i>	" 138
 <i>Elegiacorum liber III. Francisci Zanotti</i>	
<i>Mariae Reginae coelesti. Elegiae XIII.</i>	" 143
<i>Ad animam M. V. in immaculato</i>	
<i>ejus conceptu. Elegia I.</i>	" 145
<i>Ad M. V. nascentem. Elegia II.</i>	" 147

Ad M. V. se se in Templo offeren- tem. <i>Elegia III.</i>	" 149
Ad M. V. Ab Angelo salutatam. <i>Elegia IV.</i>	" 151
De M. Virgin. Elisabetham visente. <i>Elegia V.</i>	" 153
Ad M. V. De ejus Partu. <i>Elegia VI.</i> In B. Virg. Mariae Purificationem. <i>Elegia VII.</i>	" 154 " 156
De B. M. V. Juxta Crucem stantem. <i>Elegia VIII.</i>	" 158
De B. M. V. obitu. <i>Elegia IX.</i>	" 160
In funere B. M. V. Liconis votum. <i>Elegia XI.</i>	" 162
In funere B. M. V. Mopsi deside- rium. <i>Elegia X.</i>	" 163
In mortem B. M. V. Pastoris Lycidae querela. <i>Elegia XII.</i>	" 164
Ad B. M. V. in Coelum assumptam. <i>Elegia XIII.</i>	" id.

<i>Elegiacorum liber IV. Aloysio Gonzagae, et Stanislao Kostae Divis Patronis. Elegiae.</i>	" 165
Joannis Mariae Parthenii. S. Aloysii Gon- zagae in sanctioris vitae sectandae pro- posito constantia. <i>Elegia I.</i>	" 169
Ejusdem. Ad S. Aloysium Gonzagam ut assiduis lacrymis modum ponat. <i>Elegia II.</i>	" 171
Ejusdem. S. Aloysius Gonzaga jus- sus a Deo mentem avertere conqueritur <i>Elegia III.</i>	" 173
Ejusdem. S. Aloysii Gonzagae mo- rientis vota. <i>Elegia IV.</i>	" 175
Caroli Rotii. S. Aloysio Gonzagae pro ca- stitute vota. <i>Elegia V.</i>	" 177
Francisci Contoli. S. Aloysius Gonzaga Pa- trem per literas alloquitur. <i>Elegia VI.</i> Ejusdem. Ferdinandus Gonzaga, filio respondet. <i>Elegia VII.</i>	" 179 " 181

<i>Francisci Contoli. De futura S. Aloysii Gonzagae beatitate vaticinium. Elegia VIII.</i>	" 182
<i>Caroli Rotii. Margarita Kriska, Stanislawo Filio. Epistola.</i>	" 185
<i>Ejusdem. Stanislawi Kostae Margariae Matri. Responsio.</i>	" 190
<i>Elegiacorum liber. V. Variorum Elegiae.</i>	" 197
<i>Jo. Joviani Pontani. De Mundi creatione. Elegia.</i>	" 199
<i>Jacobi Sanazarrii. Ad Divum Jacobum Picenum. Elegia.</i>	" 203
<i>Ejusdem. In festo D. Nazarii Martyris. Elegia.</i>	" 205
<i>Ignatii Guillelmi Gratiani. Qui dixit ad mulierem etc. Elegia.</i>	" 207
<i>Ejusdem. De laudibus D. Thomae Aquinatis. Elegia.</i>	" 209
<i>Caroli Rotii. David Absaloni Filio perduelli. Elegia.</i>	" 212
<i>Ejusdem. Sancto Francisco Xaverio. Elegia.</i>	" 216
<i>Ejusdem. S. Joannis Francisci Regis epistola. Elegia.</i>	" 221
<i>Camilli Zampierii. Ad S. Job. Elegia.</i>	" 227
<i>Francisci Mariae Zanotti. Ad D. Philippum Nerium. Elegia.</i>	" 230
<i>Castrucci Bonamici. In Nativitate D. N. Elegia.</i>	" 233
<i>Ejusdem. Natalis Matris Dei. Elegia.</i>	" 236
<i>Alexandri Fagnolii. De Bassano Sacras conciones Forocornelii habente. Elegia.</i>	" 238
<i>Hieronymi Ferri. Angelo nuncianti Maria assentit. Elegia.</i>	" 242
<i>Ejusdem. Inferni rabies cognito Virginis responso. Elegia.</i>	" 243
<i>Francisci Contoli. Rachelis questus de sterilitate. Elegia.</i>	" 244
<i>Antonii Lachii. Ex Psalmo 41. Elegia.</i>	" 246

Josephi Petrucci. In Virginem parituram.

Elegia. " 248

Ejusdem. In Virginem Puerperam.

Elegia. " 251

Ejusdem. De animorum caelesti ori-

gine. Elegia. " 253

Ejusdem. Christus infans vitae Ma-

gister. Elegia. " 255

Caroli Ratii. Ad Nymphas Palaestinae etc.

Elegia. " 258



Pisauri die 4 januarii 1833.

VIDIT

Pro Illmo et Rmo Episcopo

PHILIPPO MONACELLI

ANTONIUS CAN. COLI

Prof. Dog. Th. in Ven Sem. Pis.

ac Exam. pro-synodalis

Pisauri die 7 dict. 1833.

IMPRIMATUR

Fr. PETRUS CAJETANUS FELETTI

Ord. Præd. S. Th. Prof. Inquis. Gen. S. O.

Ms 2017338

